

# 10 ASO

O SUESUEGA, TALOSAGA  
MA ANAPOGI

TUSIA E : DENNIS SMITH  
FA'ALILIUINA E : TUPITO LAMYUEN VOIGT

Copyright of English Version 2013 by Dennis Smith (Authorized Samoan Translation not registered but subject to all rights as English Version)

All rights reserved. No part of this publication may be reproduced, stored in a retrieval system, or transmitted in any form or by any means – electronic, mechanical, photocopy, recording or any other – except for brief quotations in printed reviews, without the prior written permission of the author.

Printed in the USA

Unless otherwise noted all Scripture quotations are taken from the Holy Bible, King James Version.

Scripture marked NIV are taken from the Holy Bible, New International Version. Copyright 1973, 1978, 1984 International Bible Society. All rights reserved throughout the world. Used by permission of International Bible Society.

ISBN: 978-0-9841085-3-4

Cover and text by Clayton Tini Lam Yuen (NiuHype.com)

# FAASOLOGA O MATAUPU

O le Faaogaina o le tusi lenei: o le 10-Aso o Suesuega ma Talosaga

1. O le Liligiina mai Faalua o le Agaga
2. O ni Suiga Vaaia
3. O le Papatisoga a le Agaga Paia
4. Maua Atoatoa Keriso
5. Usiusita'i mai le Loto
6. O le Faamaufaailoga ma le Luluuga
7. O Fua o le Agaga
8. Savavali ma le Agaga
9. Talosaga ma le Papatisoga a le Agaga Paia

Vaega Faaopopo 1 - O le mea na tupu i se tasi o Ekalesia

Vaega Faaopopo 2 – O se tala e uiga ia Colin Hone

# O LE FAAAOGAINA O LENEI SU'ESU'EGA

Na mafuta le au so'o ma Iesu mo le 3 ma le afa tausaga. Na nonofo i latou lalo o ona aao, ma faalogo i ana aoaoga ma faatonuga. Na latou molimauina lona faamalolo o ma'i, tutuli ese temoni, fafaga le afe ma afe o tagata mai nai meaai faatauva'a lava a se tamaititi, ma na ia toe faaola mai foi nisi mai le oti. Na ia faatonuina foi le au so'o e o e tala'i atu le tala lelei, faamalolo ma'i, ma tutuli ese le tiapolo, i lona Suafa. Ina ua toe foi mai le to'a fitusefulu lenei, na maofa i latou i mea na latou molimauina, ma latou faapea ifo: "Ua toe foi mai le fitugafulu ma le olioli, ua faapea mai: Le Alii e, ua usiusitai mai temoni ia te i matou ona o lou Suafa." Luka 10:17.

Na molimauina foi e le au so'o se faanoanoaga tele lava i le po o le Aso Tofi lea na pu'eina ma ave ai e le motu of tagata Iesu mai le faatoaga. O se mea mata'utia na latou molimauina i le faamasinoga o le faasalaina, faapea ma le maliu o Iesu i luga o le satauro i Kalevario. Na latou vaaia foi Keriso ina ua te'a lona toe tu mai i le tuugamau, ma toe faatasia i latou mo le 40 aso ae le'i toe afio a'e o Ia i le lagi. E ui lava e faapea na latou molimauina nei mea uma, ma latou malamalama i le maliu ma le toe tu mai o Ia mai le tuugamau, ae maise ai le fuafuaga o le faaolataga o le tagata agasala, ae paga lea, latou te le'i sauni lava e tala'i atu le tala lelei i le lalolagi e pei ona poloaia ai i latou e le Ali'i Faola.

"Ona maliu ane ai lea o Iesu, ua fetalai atu ia tei latou, Ua tuuina mai ia te au le pule i le lagi ma le lalolagi. O lenei, ia outou o atu e fai nuu uma lava ma soo, ma papatiso atu ia te i latou i le suafa o le Tama, ma le Atalii, ma le Agaga Paia; ia outou aoao atu ia te'i latou ia tausi i mea uma ua ou fai atu ai ia te outou; faauta foi, ou te ia te outou i aso uma lava, e oo lava i le gataaga o le lalolagi. Amene." Mataio 28:18-20

E leai, na iai lava le mea taua na misia e i latou ina ia mafai ai ona latou o e ta'u atu Keriso i le lalolagi, faasoa atu le tala lelei ma le malosiaga ma faamanuiaga faapitoa. O lea na faatonuina ai i latou: "Aua na papatiso lava Ioane i le vai; a o outou, e papatisoina outou i le Agaga Paia, e le tele ni aso e va a'i. Ae peitai, o le a maua e outou le mana, pe a afio ifo le Agaga Paia i luga ia te outou; e faui foi outou ma molimau ia te a'u i Ierusalema, ma Iutaia uma lava, ma Samaria, e oo lava i le tulu'iga o le lalolagi." Galuega 1:5, 8

Na poloaia le au so'o e Iesu ina ia faatali seia latou maua le papatisoga a le Agaga Paia ona faato'a o lea e tala'i le tala lelei ma faataunuu le galuega e

pei ona poloaina ai i latou. Ona latou faia lava lea e pei ona faatonuina, sa faatalitali lava. “Ua finafinau pea i latou nei uma lava ma le loto gatasi i le tatalo ma le aioi, atoa ma fafine, ma Maria le Tina o Iesu, atoa foi ma ona uso.” Galuega 1:14. Sa faatalitali i le tatalo ma le anapogi mo le sefulu o aso. Na feiloa’i latou i le potu i luga ma su’esu’e ai, tatalo, ma anapogi. E le gata i lea, o le mafutaga fo’i lea na faaleleiina ai latou lava, le tasi i le tasi. Fai mai le tamaitai o Elena Uaita: “O aso nei o le taapenapenaga o ni aso na matua’i suesue loloto ai lava le tagata ia ia te ia lava. Na lagonaina e le au soo le manaomia o le atiae o latou lava itu faaleagaga ma na aunagi atu i le Atua ina ia taapena i latou mo le galuega o le faaolaina o agaga. Latou te le i talosaga mo faamanuiaga mo i latou lava, ae na mamafa le avega o le sauni atu mo le laveaiga o agaga. Na latou iloaina o le tala lelei e fia talaiina atu i le lalolagi ma o le malosiaga e mafai ai lea mea e maua mai lea i le Agaga Paia, e pei ona folafolaina mai e Keriso. (Galuega a Aposetolo, itulau 37)

I le maea ai o le 10-Aso, na maoae se mea na tupu ai.

“Ua oo atu foi i le aso Penetekoso, sa iai uma lava i latou i le mea e tasi ma le loto gatasi. Ona faafuase’i mai lea o le taalili mai le lagi, peisai o le matagi ua agi tele mai, ua tumu uma ai le fale sa latou nonofo ai. Ua iloa foi e i latou o laulaufaiva peiseai o le afi ua vaevaeina, ua nofo i o latou luga taitoatasi. Ua faatutumuina foi i latou uma i le Agaga paia, ua afua ai ona tautala i gagana eseese, pei on foaiina mai e le Agaga o le gagana ia te i latou. Sa nonofo i Ieruselema tagata Iutaia, e ua matatau i le Atua, mai nuu uma lava o le lalolagi. Ua lagona foi lenei taalili, ona faapotopoto mai ai lea o le motu o tagata, ua fememeai, ina ua taitasi ma faalogo atu ia te i latou ua tautala mai i lana lava gagana. Ua segia uma o latou mauili, ma latou ofo ai, ua fai ma, “Faauta, e le o Kalilaia ea i latou uma o e tatala mai nei? E faapefea foi ona tatou taitasi ma faalogo atu i lana lava gagana na tupu ma ia?” Galuega 2:1-8

O le toatele o i latou mai Ierusalem na latou faalogo i le mea o loo tupu i le au soo, ma latou vaaia foi mea ua tutupu, na le mau tonu i latou. Ona tu ai lea o Peteru ma tau faamalamalaina le tulaga e faapea:

“Ona tulai lea o Peteru, atoa ma toatinoagafulu ma le toatasi, ua fai atu ma le leo tele ia te i latou, Sema e, o outou Iutaia e, atoa foi ma e ua nonofo i Ieruselema uma lava, ia iloa e outou lenei mea, ma ia faafofoga mai i a’u upu. Aua ua le ona nei tagata, pe ona outou masalosalo i ai, aua o le itula e iva lenei i le taeao; a o le mea lenei ua fai mai ai e le perofeta o Ioelu; O ona aso e gata ai, o loo faapea mai le Atua, e iu ina ou liligi ifo ai lo’u Agaga i luga o tagata uma lava; ona perofeta mai lea o outou atalii ma o outou afafine, e iloa faaaliga e o outou taulelea, e fai miti foi o outou toeaina. O ia aso foi ou te liligi ifo ai lo’u Agaga i luga o a’u auauna tane, ma a’u auauna fafine, latou te perofeta mai ai.” Galuega 2:14-18

Mai lea lava aso ua ta'ua o le Aso o le Penetekoso, le aso o le papatisoga a le Agaga Paia, na amataina ai fo'i ona alu atu le tala lelei i le lalolagi o ia ona po. E faitau afe ma afe na talia Keriso. (Galeuga 2:41, 4:4). O le papatisoga foi a le Agaga Paia na mafai ona mauaina e i latou uma e talitonu ia Iesu Keriso. O lea foi Agaga Paia o lo'o mafai ona maua e kerisiano uma i le aso nei. Ma o lenei polokalama o le 10-Aso o le a tatou aga atu nei iai, o talosaga ma le mauaina mai lea o le papatisoga a le Agaga Paia mo o tatou tagata.

Na fetalai mai lava Iesu: "...afai e loto gatasi se toalua o outou o i le lalolagi i se mea la te ole atu ai, e faia lea mo i laua e lo'u Tama o i le lagi" (Mataio 18:19). E maoa'e lava le malosia e maua mai i le tatalo faatasi. E maua foi le faamalosiaga ma le malosiaga faaleagaga e maua i mafutaga faakerisiano. Ona o lea talitonuga, e fautuaina ai ina ia saili ma filifili sau paaga, sau soa lua te mafuta i suesuega ma tatalo faatasi mo le 10 aso, pe faatasi i le mea e tasi, poo luga foi o le telefoni.

O le polokalama lenei e 10 mata'upu, faatasi ai ma ni faatalatalanoaga o ni lagona lava mai totonu o lou loto, faapea foi ma mea taua e talosia i lua talosaga mo nei aso e sefulu. Ina ia maua uma e le tou ekalesia faamanuiaga o lenei polokalama, e fautuaina ai ina ia potopoto le tou ekalesia mo nei aso e sefulu i po taitasi e sefulu, e pesepese, faitau, tatalo, ma faasoa e ala i polokalama ua faatulagaina i lenei tusitusiga. E pei foi ona ta'ua i luga, e tatau foi ona ia iai se tasi lua te soa mo lenei 10 aso. E taua i le aofia atoa lava ona faia lea mea ina ia maua ai faamanuiaga e pei ona faataatia mo le 10 o aso o lenei faatinoga.

E fautuaina foi ina ia lisiina nisi se to'alima lua te talosiaina, o nisi sa iai i le ekalesia ae ua faavaivai, poo nisi foi e le i iai lava i le ekalesia, ae tau lata ane i le mea o lo'o e alala ai. Valaau ma talanoa ia i latou nei ma ta'u iai o loo feagai lau ekalesia ma lana polokalama o le 10-Aso faapitoa mo talosaga, ma e te fia tatalo mo i latou i le sufulu o aso nei. Fesili foi iai pe o a ni mea latou te manana'o e fia talosiaina mo nei aso.

O le tatalo, o le malosia pito i maoae lava lenei i le lalolagi o loo tatou ola ma soifua ai. E manaomia lea mo le olaola faaleagaga o le tagata lava ia. O le mea foi lea e mafai ona faaogaina e aapa atu ai i isi tagata mo le Keriso e maua mai ai le ola. Mo le tatalo ma le ola faaleagaga o le tagata kerisiano, ua faapea mai Elena Uaita:

“O le tatalo o le manava ola lea o le agaga. O le mea lilo lea o le malosiaga faaleagaga. E leai lava se tasi mea e mafai ona suia le alofa tunoa, poo le tulaga o le soifua lelei o le agaga. O le tatalo na te tuufatasi le loto ma le puna o le ola ma o le sootaga lea o le musele o olaga tapuai o le tagata. O le le faamasani i le tatalo poo le le faia sooa o lea masani e pei ona matele iai le toatele o le au kerisiano i nei ona po e avea lea ma mea e matala ai foi ma le sootaga ma le Atua. E tuuaunoaina ai le naunau i mea faaleagaga, faapea foi le leai o lagona e

faamalosi ma faaolaola le soifua tapuai ma le faamaoni. ” Gospel Workers, p. 254

Na silafia foi e le tamaitai perofeta le manaomia o le tatalo i le laveaiga o nisi mo Keriso.

“E ala i tatalo, e te galue malosi ai foi mo le laveaiga o agaga, aua e pau foi lea o le auala e te pa’i atu ai i ni loto. E le o sau galuega a o le galuega a Keriso o loo i lou autafa, na te galueaina le loto.” Evangelism p.525

“E faafofoga mai le Alii i tatou talosaga mo le liliuina o agaga.” Messages to Young People, p.315

A’o e alo atu mo le faatinoina o lenei polokalama, o lea ua faataatia atu nisi o fautuaga mo lenei faatinoga, ae maise ai le aapa atu mo i latou ua afea i a outou talosaga, ina ia avea lea ma auala e te aumaia ai i latou i le lotoa ma le mafutaga a le ekalesia. E faamanuia le Atua i lau galuega pe a e tatalo ma galue mo i latou o i lau lisi tatalo. E le gata e faaaogaina oe e le Atua e aumai nisi mo lona malo, ae avea foi lea ma auala e faalatalata mai ai foi o Ia ia te oe. O lea na fai mai ai lana auaua perofeta o Elena Uaita e faapea:

“A o e galuega mo tali o au lava talosaga, o le a e mauaina foi le faailoa atu le Atua ia te oe... Amata nei e aapa maualuga poo luga atu foi. Ia faamaualugaina le taua o mea a le lagi i loo mea faatosiga a le lalolagi... A’oa’o e tatalo; a’oa’o ia malamalama ma ia maua le molimau ma le atamai, ona avea lea ma o oe e ala mai ai le viiga o le Atua.” The Upward Look, p.256

Ua saunia i le faaiuga o faitauga o aso taitasi ni faatinoga e aoga e ta’ita’iina ai oe i talosaga faapitoa lava o lenei 10-Aso.

A e filifili e te au ai i lenei polokalama, ua e ulu i se mafutaga o faamanuiaga o suesuega ma talosaga ma le Ali’i. E te maua faamanuiaga o se mafutaga vavalalata ma lou Alii Faaola; o le a e iloa ai foi le auala o le a faaaogaina faapitoa ai oe ina ia tosina mai ai nisi e tapena ai mo lona toe afio mai. A’o e mafuta atu i lau soa tatala ma i latou uma o le a iai i lenei polokalama, e te maua ma lagona foi se mafana o lou mafutaga ma ou lava uso faatalitali mo le Toe Afio mai o lo tatou Faaola. O isi foi o le mafutaga o le a avea i latou o se faamalosiaga mo lou lava tagata faatalitali.

Ia faaoga foi le taeao o nei lava aso e sefulu ina ia maua ai se lua mafutaga ma lou Atua e ala lea i sau tatalo faapitoa ae e te le’i alo atu i feau ma galuega, pe o le fanau foi i a’oa’oga i lea aso ma lea aso. Ia faia lea mea faapitoa lava i taeao uma o lenei faamoemoe. Na fautua mai Elena Uaita e faapea:

“Na Ia mauaina le faafouga o le papatisoga a le Agaga Paia. I le segisegi o itula o le taeao na fagua ai le Alii mai ana malologa, ma o lona Agaga faapea ona fofoga na faauuina i le alofa tunoa ina ia mafai ai ona

fesootai atu i isi tagata. O ana fetalaiga foi na aumai sa’o lava mai lafanua lafulemu o le lagi, ina ia mafai ai ona Ia fetalai atu i upu ua fetai ma le tau ia i latou ua mafatia ma saisaitia i puapuaga o le olaga.”  
Christ’s Object Lessons, P.140

E faia foi e Keriso lea mea mo oe pe a e ole atu ia te Ia. E momo’o o ia ina ia faauuina oe e lona Agaga a’o e sauni atu mo le aso fou. Na fausia lenei polokalama o le 10 aso mo le mea lava lenei, o le mauaina lea o le faauuga a le Agaga o le Atua mo le faatuputupuina o le ola faaleagaga ma molimau atu ai lea mo Keriso.

Ma o se tasi foi la o mea taua o lenei polokalama, o le tatalo lea ma anapogi. Ina ia mauaina le taua o lenei polokalama o le 10 aso, e taua le faatapula’aina o le auai i le mau mea fai o le olaga nei, e pei o faaitaitaiga nei: tu’u le matamata i polokalama faasalamasau i tv, pe faalogologo i pese faalalolagi ma ona po nei; taaalo i taaloga e le tusa ma tapula’a faakerisiano, faaogaina sese o le internet, talanoaina mataupu faalemanuia ma ni uo, au atu ma faama’imau taimi i faatasiga o tuinanau o mata poo le tino foi. Ia taumafai lava a taula’i le vaai i mea faale-Atua, mata’upu faaleagaga, ma faatinoga e viia ai le Atua; talanoa i mataupu faaleagaga, faalogo i viiga tau i le Atua, o polokalama o le tv faaleagaga, suesuega o le Tusi Paia, ma mea uma lava faapena. O le mea a tupu o le maua lea o mafaufau mama ma le manino e fesoota’i ai ma le Atua. O ituaiga anapogi nei e manuia ai le tagata ma faatupulaia ai foi le fiafia e mafuta atu i le Atua, ma faamanuiaina ai foi le olaga atia’e i lenei 10-Aso.

E mafai foi ona anapogi le kerisiano mai mea taumafa, e pei o le tuuina se ‘aiga o le aso, o le tuina o le faaogaina o mea inu poo mea’ai suamalie, tuu le faaogaina o aano o manu (povi, mamoe, moa, etc.), tuuina le tausami mea’ai falai ae faaoga na o meaai faasupo, poo le faaititia foi o mea’ai o ‘aiga ta’itasi mo nei aso e sefulu. O nei lava anapogi e siitia ai i luga le faatauaina o lenei 10-Aso ma siitua ai foi le manuia o le olaga fiataumafai o le kerisiano.



# ASO 1

## FAATOMUAGA

Ia Setema, 1999, na taitaiina ai a’u e le Atua i le suesueina o le Tusi Paia ina ia ou malamalama ma iloa lelei le papatisoga a le Agaga Paia, e ta’ua fo’i o le “faauuina” poo le “faatumulia” i le Agaga Paia. Na ou tatalo lava ina ia papatisoina a’u e le Agaga Paia. O le tusi lenei o se mea lea na maua mai i lea mafutaga ma le Atua e ala i suesuega, talotaloga, ma le anapogi; o faamanuiaga o loo maua pea, e o’o mai lava i le aso nei.

O le faatumuina e le Agaga Paia, ua taitaiina ai a’u e savavali faatasi ma Iesu, ma toe maua ai le lagona o le “ulua’i alofa” mo le Alii Faaola. Ua tele suiga i lo’u lava olaga e mafua mai ona o le mafuta mai o le Agaga Paia. Ua ou molimauina foi i la’u galuega le malosiaga e na o le Agaga Paia lava e mafua mai ai.

O la’u tatalo mo i latou uma lava e faaaogaina lenei polokalama o le 10-Aso ina ia faamanuiaina foi oe e pei foi ona tatalo le aposetolo o Paulo mo le au faatuatua i Efeso:

“Ina ia foaiina ia te outou e tusa ma le faulai o lona mamalu, ia faamlosia outou i le mana e lona lava Agaga i le tagata i totonu, ia nofo mau ai o Keriso i o outou loto i le faatuatua; ina ia mauaa ma faavaeina outou i le alofa, ia mafai ai ona iloa lelei e outou atoa ma le au paia uma, o le uiga o le lautele, ma le umi, ma le loloto, ma le maualuga, ia iloa foi le alofa o Keriso ua silisili ese e le mailoa, ia faatutumuina outou i le tumu uma lava o le Atua.” Efeso 3:16-19

### O SE MANATU

O le vaai i le mataupu o le papatisoga a le Agaga Paia e taua ai le iloa o le lua o vaega o le galuega a le Agaga Paia; muamua, ia taitai tatou ina ia talia Iesu ona papatisoina lea i le vai; lona lua, o le faatumuina o le tagata kerisiano ina ia ola e faia le galuega a le Atua. O Iesu o lo tatou faata’ita’i. Na fanau o ia i le Agaga ma tuputupu a’e seia o’o ina ua matua. Ona papatisoina lea o ia i le vai. Sa papatisoina o ia e le Agaga Paia i le taimi tonu o lona papatisoga i le vai. (Luka 3:21-22). I le maea ai o le faatumulia of Ia e le Agaga Paia, na sauni loa o ia e alu atu ma le malosiaga o le Agaga Paia e fetai’i ma Satani (e pei ona iai i le vao o faaosoosoga (Luka 4:1-13). Na faaaupagaina o Ia i le malosiaga e lauga ma aoao atu le malo o le Atua, ma faamalolo ma’i, faapea le tutuli ese o temoni (Luka 4:14).

Na fetalai mai lava Iesu o i latou uma e talitonu ia te Ia e tetele atu foi ni mea latou te faia lo o Ia (Ioane 14:12). A maua e le talitonu le papatisoga a le

Agaga Paia, o le a ia mauaina fo'i le malosiaga e na o le Agaga Paia e maua mai ai, le malosiaga e faia ai galuega tetele aua foi o le malosi na maua e Iesu o le a maua foi e ia. Ae le i faatumulia le tagata e le Agaga Paia, e mau pea le Atua i lea tagata aua o Ia na valaauina mai o ia ina ia talia Keriso ma ia papatisoina o ia i le vai. Ae o le a le mauaina le atoaga o malosiaga mai le Agaga seia mauaina le papatisoga a le Agaga Paia. O le mafuaaga lea na ta'u atu ai e Iesu i le au soo ina ia faatali mo le liligi mai o le Agaga i le aso Penetekoso (Galuega 1:4-5, 8).

E le'i iai uma lava tagata i le aso Penetekoso. O loo faamanino mai e le tusi o Galuega na faaauu pea ona papatisoina e le Atua le au faatuatua i le Agaga Paia ina ua te'a le aso Penetekoso. O le tasi o ala na faatupuina ai lenei mea o le tatalo lea ma le faaeeina o lima (Galuega 8:12-17; 9:17-18; 19:1-6). O le faataitaiga lea ua ou mulimuli ai foi. Ae o le faaeeina o lima e le tau faia i taimi uma. E mafai lava ona maua le papatisoga a le Agaga Paia e ui lea i le tuuina atu atoatoa o oe lava i le Atua ma talitonuina o le folafolaga a le Atua e tuuina mai e Ia lava le Agaga Paia i lona atoaga. (Luka 11:13, Kal 3:14).

## TALIA E ALA LE I LE FAATUATUA

O le taliaina o le Agaga Paia ua na o se mea e maua ona o le faatuatua. O le faatumulia i le Agaga Paia e maua mai lea mai le Atua, ae le maua mai i le o loo faaeeina ona lima i luga o lea tagata. O le faaeeina o lima ua na o se faatinoina lea o se mea e pei o le faauuina o se tiakono poo se toeaina pe a tofi. Atonu e le lagonaina se mea i le taimi o loo faataunuuna ai lenei sauniga. Ae ui i lea, e faaalii lava le mafuta mai o le Agaga pe a uma ona tatalo atu mo lenei faauuga ma le faatuatua.

## O LE A LE MEA E TUPU PE A MAUAINA E SE TASI LE PAPATISOGA A LE AGAGA PAIA?

A tatou talosaga atu i le Atua ia faatumulia i tatou i le Agaga Paia, o le a le mea e tupu? E iai ni nai faataitaiga o ni mea e tupu i le tagata ua ia mauaina le faatumulia i le Agaga Paia, e pei o le faatupulaia o le naunau e suesueina le afioga a le Atua, ua faateleina le naunau i talosaga, o suiga i le mana'o i mea o le olaga ma mea e leaga o le olaga nei, faapea ma le loloto o lona faatinoga o se olaga ua salamo.

E manaomia e le tagata talitonu le faatumulia e le Agaga Paia mo lana savaliga manumalo ma Keriso. Ua mausali lo'u talitonuga e le maua e se tasi Keriso i lona atoatoa e aunoa ma le papatisoga a le Agaga Paia. O le pine o lenei talitonuga o loo maua lea i le tala i taupou e to'a sefulu (Mataio 25:1-13) faapea ma nisi lava o faamatalaga a Iesu e uiga i le le iloa tonu o se tagata (ou te talanoa atili i nei tulaga i isi vaega o lenei tusi). E foliga mai o le papatisoga i le vai e faatusa lea i sauniga o le faaipoipoga, ae o le papatisoga a le Agaga Paia o le taimi lea ua faamausaliina ai le iloa e le tamaitai faaipoipo lana tane ina ua maea ai o lenei sauniga. O le a tetee malosi tele foi e Satani lenei

galuega aua na te iloa lelei lava o le faatumulia o se tasi i le Agaga Paia o le a motusia ai foi lona malosi mai le olaga o lenei tagata talitonu.

O le silafia ma maua faalogona o le faatumulia i le Agaga Paia e le faatusalia foi lea i le muai taliaina o Keriso o lo tatou faaola. E le faasilia foi le galuega a le tagata talitonu i lo le saili ina ia faatumulia mai lea e le Agaga Paia i aso fai soo, ma savavali i aso uma ma le Agaga i le manumalo.

Pe sailia lea mautinoaga o le papatisoga a le Agaga Paia mo le tagata lava ia pe mo le taitaiina o se tasi ia maua foi e lea tagata lea lagona, e manaomia lava ia faia ma le faamoemoe i le tatalo. E galue malosi foi Satani ia aua nei tupu lenei mea. Ia tatou galulue malolosi foi ina ia aua le teena lenei aoaoga aua o le teena foi lea o le Agaga. Ae ia tatou faia lenei mea e aumoa ma le manatu ua paia tele tatou, mitamita i o tatou lava manatu ua faapitoa lava na o tatou ua oo i se tulaga mama ma paia, faapea talitonuga faaseseina faapea ua tatou ausia le taunuuga o le faamoemoe (e pei ai i tatou o le tulaga pagatia ma faafitauli o le ekalesia i Laotikaia), poo le manatu foi ua le ausia se tulaga e taliaina ai le Agaga. Ua ou mauaina foi tulaga ua manatu ai nisi kerisiano ua faatumulia latou e le Agaga ma ua agavaa e tatalo atili ai mo lea faamanuiaga. E le i manatu Elisaia e iai se faafitauli o lenei tulaga, o le toe ole atu lea mo se faamanuiaga a le Agaga i luga atu pe tele atu foi mai le tulaga na maua e le na muamua mai ia te ia, e pei ona tatou maua i le 2 Tupu 2:9.

## FESILI E FAATALATALOA

1. O le a se mafuaaga na tusiaina ai lenei tusi?
2. Na faapefea ona malamalama le na tusia lenei tusi i le aoaoga o le papatisoga a le Agaga Paia ma ola ai foi?
3. O a nisi faaupuga e faatatau i le olaga ua mauaina mai i le papatisoga a le Agaga Paia?
4. O le a se faanaunaga a le aposetolo o Paulo mo le au faatuatua i Efeso? Efeso 3:16-19
5. O le a tonu lava le manatu e uiga i le papatisoga a le Agaga Paia?
6. O le a le faaitaiga na tuuina mai e Keriso mo le kerisiano e uiga i le mea e maua mai pe a mauaina le Agaga Paia?
7. O le a le mea e tupu i olaga o le tagata talitonu pe a na mauaina le papatisoga a le Agaga Paia?
8. O iai le Agaga i le tagata talitonu ae le i mauaina e ia le papatisoga a le Agaga Paia?
9. O le a le mea e le o maua i le tagata kerisiano pe afai na te le mauaina le papatisoga a le Agaga Paia?
10. O le a se tasi o faatinoga na faaoga e Peteru, Ioane, Anania, ma Paulo i le taimi na latou taitaiina ai le au faatuatua ina ia maua le papatisoga a le Agaga Paia? Galuega 8:12-17; 19:1-6
11. E faapefea la ona maua e le tagata talitonu le papatisoga a le Agaga Paia?

12. O a ni suiga e vaaia i le olaga a le tagata e saili le papatisoga a le Agaga Paia?
13. O le a le mea e faatauaina ai e le na tusia leni tusi le mauaina o le papatisoga a le Agaga Paia?
14. O le papatisoga i le vai e faatusa i le sauniga o le \_\_\_\_\_; ae o le papatisoga a le Agaga Paia ua faatusaina e pei o \_\_\_\_\_ o lea sauniga.
15. O le a ni tulaga o o tatou manatu e taofia ai le maua e i tatou o le papatisoga a le Agaga Paia?

## MEA E FAATAUAINA I TALOSAGA

- Ole atu i le Atua:
  - Ia taitai oe ina ia e malamalama i le papatisoga a le Agaga Paia
  - Ia papatisoina oe e lona Agaga
  - Faamanuia i latou ua e tusia i lau lisi tatalo

# ASO LUA O LE LILIGIINA FAALUA TETELE O LE AGAGA PAIA

O loo tatou ola ma soifua nei i le vaitau o le liligi faalua mai o le Agaga Paia. O loo faamatala mai i le tusi o Galuega le oo muamua ifo o le Agaga Paia. Na amataina i le aso Penetekoso ma ua ta'ua lea aso i le Tusi Paia o le "uaga muamua" o le Agaga Paia. O se taimi muamua lea na faaali faalauaitele ai le Agaga Paia a'o faatuputeleina le ekalesia ma le taitaiga a le Agaga Paia. O loo tatalaina foi lea tulaga i le au kerisiano i le taimi nei.

Ae o loo molimau le tusi o Ioelu faapea le Faaaliga i le toe liligiina mai o le Agaga Paia. Ua ta'ua lea tulaga e le Tusi Paia o le "uaga mulimuli". O loo tatou ola ma soifua nei i le va o nei faaaliga tetele o le Agaga Paia.

E tai tala tutusa lava nei tulaga, le "uaga muamua" faapea le "uaga mulimuli". O le "uaga muamua" na tupu ona o se tali lea i le nofo tatalo atu a le au faatuatua mo ni aso e sefulu ina ia faataunuu le folafolaga a Iesu; na amata faataunuu ai foi ona ua tali mai le Atua i talotaloga ina ia liligi ifo le Agaga Paia i le uluai uaga o le aso Penetekoso. O le uaga mulimuli o le Agaga Paia e taunuu pe a tali mai le Atua i talosaga a ona tagata, o i latou ua talitonu i ana folafolaga; ma o le tulaga lenei e faataunuuina ai le uaga mulimuli.

I le tusi o Galuega, tatou te molimauina ai le ta'ita'iga mautu a le Atua i lana ekalesia. E matua'i maoa'e foi le foliga mautu o lea taitaiga a le Atua i lana ekalesia aua o le Agaga Paia lava ia na te faaopoopoina mai le malosiaga e taitaiina ai lana ekalesia.

E faapefea la pe afai e faataunuuina le uaga mulimuli o le Agaga Paia? A tatou suesueina lelei lava le mea na tupu i le taimi ua tuana'i le uluai Penetekoso, tatou te maua ai le tai tutusa lava ma le uaga mulimuli, vagana ai le faaaliga o le malosia atu o le aafiaga o le au faatuatua nai lo le te'a o le aso Penetekoso. Se'i tatou vaai lelei lava la i le mea na tupu ina ua maea le aso Penetekoso, e pei ona faamatala mai e le tusi o Galuega.

Na folafola mai e Iesu se mea maoae e faatupuina i le alu ifo o le Agaga Paia (Galuega 1:4-5, 8). O le liligi ifo o le uaga muamua na tupu ina ua maea le 10 aso o talotaloga a i latou sa i le mea e tasi, ma na gatasi o latou loto i le

mea na folafolaina mai e Iesu (Galuega 1:14; 2:1). O le alu ifo o le Agaga Paia na tupu i le aso o le Penetekoso ina ua faatumulia i latou na tatalo e le Agaga Paia (Galuega 2:2-4). Na faamatala e Peteru mea ia na molimauina e tagata na potopoto ane i Ierusalema mo se aso faapitoa faa-Iutaia, e pei ona valoia mai e le perofeta o Ioelu (Ioelu 2:23). Na valoia e Ioelu le ulua'i uaga ma le uaga mulimuli a le Agaga Paia. Na valoia foi le faaali mai o le "O A'u" ia Isaraelu ae le'i afio ifo le Agaga Paia, o se faailo lea o le uluai oo mai o Iesu (Ioelu 2:27 ma le Ioane 8:58). O le taua o lenei faamatalaga i le valoaga a le perofeta o Ioelu ona o le ta'uina mai ai lea o le uluai uaga a le Agaga Paia, ma e mafai ona mauaina e le au talitonu uma lava (Ioelu 2:28). O le tulaga foi lenei na ta'uina mai e Iesu i le taimi na ia folafola ai le auina mai o le Agaga Paia mai lona Tama pe a foi atu i le lagi e tautua i lana galuega faa-faitaulaga (Ioane 14:16-17,26; Galuega 1:4-5).

O LE A LE MEA NA TUPU INA UA MAVAE LE UAGA MUAMUA A LE AGAGA PAIA?

O le a se mea na tupu ina ua mavae le liliaina ifo o le Agaga Paia i le uluai ekalesia? I le tusi of Galuega ua faamatalaina ai le malosiaga na maua e le au aposetolo a'o latou a'oa'o ma lauga atu i tagata. E faitau afe ma afe i latou na faalogo ma liua e talia Iesu le Faaola. (Galuega 2:37-38, 41; 4:4; 11:21). Na muai folafolaina mai e Iesu le afio ifo o le Agaga Paia ma lona malosi e galue pe a molimau atu (Galuega 1:8).

Tatou te molimauina foi le tutumau i mataupu na folafola e le au aposetolo, mafutaga, faapea le tatalo faatasi (Galuega 2:42). Na mausali lo latou talitonu i aoaoga a le afioga a le Atua, le Tusi Paia. Na suamalie ia te i latou mafutaga na amataina i le 10 Aso o talosaga na tuufaatasia ai o latou loto.

I le maea ai o le faaali ifo o le Agaga Paia i le aso Penetekoso (Galuega 2:44-45) na tuuese ai ni lagona loto faapito, ni uiga ai'u, pe manumanu i mea; na matuai naunau le au faatuatua e aapa atu e fesoasoani i soo se tasi e manaomia se fesoasoani.

Na faaauauina pea foi ia mafutaga i aso uma o talosaga i le malumalu ma totonu foi o latou lava aiga. Na maua e le uluai o le au faatuatua le tasi o o latou loto, faapea le tasi o o latou agaga i le fia malamalama atili o le auunaga mo Keriso ma aumai nisi ia te Ia. Na fiafia mai ai le Atua faapea ma tagata, o lea na liua ai le tele o nisi mo Keriso (Galuega 2:46-47).

O le tala lelei o le faaolataga na laugaina ma molimauina e le tele o tagata (Galuega 5:12-16). Na faamaloloina ma'i, na tutuli ese temoni, na talitonu le tele o tagata i le tala o le faaolataga ia Keriso.

O se tasi foi o mea matautia lava na molimauina i le tea ai o le aso Penetekoso o le faamaumauina lea o le taitaiga a le Agaga Paia i le ekalesia i ni auala faapitoa ma le maoae:

1. Na faaali ni mataupu taua ia Peteru e uiga i ni mea sese i totonu o le ekalesia o loo aafia ai ni tagata se toalua (Galuega 5:1-3).

2. Na faaali agelu mo le agai i luma o le galuega a le ekalesia ina ua toe faafoi mai Peteru mai le falepuipui (Galuega 5:17-20).
3. Na aveina faatonuga e le Agaga Paia faapea le Alii ia Filipino e faatatau i le Aitiope lea na manao le Atua ina ia aoaoina i le tala o le faaolataga (Galuega 8:26-29, 39).
4. Na tuuina e le Agaga Paia ia Peteru faatonuga tuu sa'o mai le Atua e faatatau tonu lava i le aveina o le feau o le tala lelei ma le taliaina o tagata o nuu ese (Gentiles) i le li'o o le au faatuatua (Galuega 11:12).
5. O le meaalofo o iloa o valoaga na tuuina lava e le Agaga Paia i le uluai ekalesia (Galuega 11:27-28; 21:9).
6. Na faatonuina e le Agaga Paia le uluai ekalesia ina ia tuu ese Panapa ma Saulo mo le galuega ua valaauina ai i la'ua e faia (Galuega 13:2).
7. O se faatasiga a le uluai komiti a le ekalesia na mafuta i Ierusalema e talanoaina ai le mataupu e uiga i le au faatuatua mai nuu ese na ta'ita'ia lava e le Agaga Paia (Galuega 15:28).
8. O le Agaga lava na taofia se malaga faamisionare sa fuafuaina, ae faatonu le mea e toe aga'i iai lenei malaga. (Galuega 16:6-7, 10).
9. Na faaalia i le aporetolo o Paulo ona saisaitiaga ma puapuaga o le a oo ia te ia (Galuega 20:22-23).

Ua faapea mai nisi o le tusi o Galuega sa tatau ona ta'ua o le tusi o Galuega a le Agaga Paia. Ou te tau auai foi i lenei manatu. O gaioga, faatonutonuuga, o le faatalitonuina e le Agaga Paia o le uluai ekalesia ina ua te'a le aso Penetekoso, o galuega uma lava a le Agaga.

Ou te manatu o kerisiano uma lava ua latou faitauina le tusi o Galuega e moomoo tele lava i le fia mauaina foi o ia faamanuiaga i lona olaga faapea lana ekalesia, e faapei foi ona manuia le uluai ekalesia o le Feagaiga Fou. O le tala lelei la lenei: ua mana'o le Agaga Paia ina ia tuuina mai faamanuiaga o le uluai uaga i luga o lana ekalesia o le aso nei. O loo fia tuuina mai foi se malosiaga e sili atu ona faapitoa i luga o lana ekalesia i le uaga mulimuli.

#### O LE A LE MEA E TUPU PE OO MAI LE UAGA MULIMULI?

Ae le'i toe afio faalua Iesu e pei ona Ia folafola mai, e faataunuuina lava le toe liliu ifo o le Agaga Paia i luga o ona tagata i le uaga mulimuli. Ua faamatalaina mai lea tulaga i le tusi o Faaaliga 18:1. E faapea o le a faamalamalamaina le lalolagi atoa i le mamalu o le Atua, o lona uiga faaalia atoa foi lea. O le valoaga lea o loo ta'u mai ai le taimi o le faafouga ma le toe fuataina maoa'e lava o le a tupu i le fanau faatalitali a le Atua. O le a faaali mai ai uiga moni lava o Keriso i ona tagata. E faapefea ona tupu lenei mea? E tupu pe a faatunuina le au faatuatua i le Agaga Paia (2Koronito 3:18), e le gata i le uaga muamua, ae o le uaga mulimuli foi ma le malosiaga mai le Agaga Paia.

Ua aga'i atu nei le ekalesia Aso Fitu o le Toe Afio Mai i le uaga mulimuli a le Agaga Paia e pei ona folafola mai. E pei ona tupu i le uluai ekalesia, o le toe tupu foi o le uaga mulimuli o le a faataunuuina pe a loto gatasi le fanau a

le Atua i le tatalo ma anapopogi faatasi mo le liligi mai o le Agaga i ona tagata. Na amataina mai i le tausaga 1990 le uunaina o tagata o le ekalesia e tusia ma lolomi tusi e uiga i le taua o le tatalo. I le galuega i le Tivise o Amerika i Matu, na faaopopoina ai foi le matagaluega faapitoa lava mo talosaga. Na faatinoina ai foi tuufaatasiga o polokalama tau talosaga fai faatasi. I totonu o ekalesia ma falesa taitasi, ua tofia lava i latou e faamaopopoina nei polokalama e faatauaina ma faatino fonotatalo ma talosaga a ekalesia ma aiga, i galuega ma nofoaga uma lava e maua ai le au faatuatua.

E lua lava ni mea taua na iloa i le taunuuga o le uaga muamua: (1) o le tatalo ma le (2) mauaina lea o le faatumuina, poo le papatisoga a le Agaga Paia. O mea foi nei o le a toe maua pe a faataunuuina le uaga mulimuli, i le tau faaumaina o le galuega a le Atua i aso o le iuga, o le tatalo, faapea le faauuga ma le papatisoga a le Agaga Paia.

#### O LE LAPATAIGA MATUIA

Ua tuuina mai e le tamaitai perofeta o Elena Uaita se lapataiga e ao ina faatauaina, o le sauni lea o tagata o le ekalesia mo le uaga mulimuli. Na ia tuuina mai lava se lapataiga ina ia tatou mauaina le uluai papatisoga a le Agaga Paia ina ia maua le uaga mulimuli a le Agaga Paia. Na faapea mai o ia:

“I le itu i sasa’e o le uluai uaga e oo mai lea i le taimi o le seleselega. E manaomia lea ina ia faaolaina ai fatu na totoina. I lalo la o le faasusuina o le uaga lea, e totago a’e ai le ola fou. O le uaga mulimuli, e pa’u ifo lea i le tau faai’ui’u o le tupu o le toga laau, ma faapulaina e sauni ai lea mo le seleselega. E faaaogaina e Iesu le ata lenei e faasino mai ai le tonu o le galuega a le Agaga Paia. A’o pa’u ifo le sau ma le uluai uaga e faasusu ma faaolaolaina ai le fatu na toto, ma le uaga i lata i le taimi o le seleselega, e faapea foi le aumaia o le Agaga Paia na te faaolaolaina olaga faaleagaga o le tagata faatuatua. O le ta’u matuaina o le fatu na toto e faatusa lea i le faamaeaina lea o le galuega o le alofa tunoa o le Atua i le agaga fia taumafai. O le malosiaga mai le Agaga Paia e faataga mai ai foi le amio faale-Atua i le olaga o le kerisiano, o se ua suia i le faatusa o Keriso.

“O le uaga mulimuli, e saunia ai le lalolagi mo le seleselega, ua tuu mai ai le ata o le tapena atu lea o le ekalesia mo le toe afio mai o le Atalii o le Tagata. Vagana ua pa’u mai le uaga muamua, e leai se ola; e le tuputupu a’e le laau. Vagana ai ua faia le galuega a le uluai uaga, e le faataunuuina ma se atoaga le galuega a le uaga mulimuli.

“E toatele nisi ua le mauaina le faamanuiaga o le uaga muamua. Latou te le’i mauaina faamanuiaga ua foai mai e le Atua. Ua tele nisi ua faamoemoe e faatali mo faamanuiaga e maua i le uaga mulimuli. E manatu e faato’a tatala o latou loto e talia le alofa tunoa ia maua ai faamanuiaga. Ae paga lea, ua faaseseina i latou.” (*Testimony to Ministers and Gospel Workers*, p. 506-507 emphasis added).



Ua faamautuina le taua o faamanuiaga o le uaga mulimuli e maua muamua mai faamanuiaga a le papatisoga a le Agaga Paia i o latou olaga mai le uaga muamua.

#### TATALO NEI LOA MO LE UAGA MULIMULI!

E le finagalo le Atua tatou te nofoa'i ma tau faatalitali mo le liligi ifo o lona Agaga i le Ekalesia i aso o le iuga. E tatau ona tatou mataala ma galulue ina ia tatou maua ia faamanuiaga. Na ia faatonu uluai kerisiano ina ia tatalo mo le oo ifo o le Agaga Paia e pei ona folafolaina, ma na faataunuaina lava lea folafolaga i le afio ifo o le Agaga Paia i le aso Penetekoso.

E tatau foi la ona tatou faia le mea lenei. Ia tatou tatalo ma le faatauanau ma saili le papatisoga o le uaga muamua i o tatou olaga. Ia tatou tatalo foi ma le faatauanau mo le liligi ifo o faamanuiaga o le Agaga i le uaga mulimuli (Sakaria 10:1).

E manino lava fautuaga e pei ona tuuina ma e Elena Uaita e uiga i le tatalo mo le uluai uaga:

“O le afio ifo o le Agaga Paia i luga o lana ekalesia o se vaaiga lea o se mea e tupu i le lumana'i; ae o se avanoa foi lea o se mea e mafai ona tupu i le taimi nei lava. Saili nei loa, ole mo le mea lea ia tupu nei, ma talitonu iai. O se mea ua tatau ona tatou mauaina nei, ma ua faatali mai le lagi e sasa'a mai ia faamanuiaga i luga o lana ekalesia.” (*Evangelism*, p. 701).

“O le fua o le tele o faamanuiaga a le Agaga Paia e mauaina e faatusaina i le maualuga o le mana'oga ma le faatuatua e faaali atu, faapea foi ma le mea e fuafua e faaogaina iai le malamalama ma le tamaoiga o le a maua mai” (*The Faith I Live By*, p. 53).

E le o lava na o le tatou tuu atu o tatou manaoga mo le Agaga Paia. Ae mana'o le Atua ina ia matua'i avatu ma le faatauanau o tatou mana'o i se auala faapitoa e lagona mai lava i lona nofoalii.” (*Fundamentals of Christian Education*, p. 537).

“Ua faaputu ma ua tele naua le mamalu ua faaputupuina mo le faaumaina o le galuega a agelu e toatolu. Mo tatalo ua momoli atu i le nofoalii aua le folafolaga o le liligi ifo o le Agaga Paia, e le o leiloa lava ia talosaga. Ua faaputupuina foi nei talosaga, ma ua toe lava o le sasa'a mai loa ma pei o se lolo o faamanuiaga faalelagi ina ia faamalamalamaina ai le Atua alofa moni.” (*Manuscript Release*, Vol. 21:155).

O kerisiano uma sa soifua ma ola i lalo ifo o le malosiaga o le uaga muamua talu mai lava le aso o le Penetekoso. Ua oo mai le taimi mo le uaga mulimuli, ma ua oo mai. Ae paga lea, ou te faamanatu atu, o loo fai uma foi e le tiapolo soo se mea lava ina ia aua ai ona tupu lenei mea; aua ua iloa e ia o le faaumaina foi lenei o lana pule i le lalolagi. E taumafai o ia e faapisi i tatou i le mau gaogaosa o lenei olaga ma faagalaloina ai lava le tatou saili atu le

Atua ma lona Agaga mo faamanuiaga uma o le uaga muamua. Na lapata'i mai lava Iesu o le a tupu lenei mea i le Luka 21:34.

O le fesili e tula'i mai e faapea: Ua tatou sauni ea e saili atu le Atua ma o tatou loto atoatoa? Ua pau lava lenei o le auala tatou te maua ma iloa ai o Ia, e pei ona iloa ai e taupou popoto e toalima (Jeremia 29:13). Muamua, ia tatou saili i aso faisoo le faatumulia ma le papatisoga o tatou tagata e le Agaga Paia. Lua, faatasi ai ma le lagona o le tuuina atu atoatoa o o tatou tagata i le Atua, e tatau loa ona tatou faatoga atu ia te Ia i le ao ma le po ina ia faafouina i tatou taitoatasi faapea ma le ekalesia (Isaia 62:6-7; 2 Nofoaiga Tupu 7:14). I le ma lea, ia tatou tatalo e le aunoa mo le liligiina mai o le Agaga Paia ia naua'i ma le matua malosi tele (Sakaria 10:1).

Ua tatou sauni ea e fai e pei ona faia e le au faatuatua i aso a o lumanai le Aso Penetekoso? Afai o lea, i le taimi a le Atua, tatou te mauaina ai e le gata o i tatou taitoatasi, ae faapea foi le ekalesia.

#### FESILI E FAATALATALANOA

1. O a tulaga ia e ta'ua mai i le Tusi Paia e liligiina mai ai le Agaga Paia? Ioelu 2:23
2. O le a le igoa ua ta'uina ai le liligiina ifo o le Agaga Paia i le aso Penetekoso? Ioelu 2:23
3. O tusi o le Tusi Paia o Ioelu ma le Faaaliga o loo ta'ua mai ai le liligiina ifo o le Agaga Paia. O le a le igoa ua faaigoa ai e le Tusi Paia le tulaga lea?
4. O a ni tulaga e tai tutusa ai le liligi ifo o le uaga muamua faapea le uaga mulimuli?
5. O le a le taimi e tupu ai le uaga muamua? Ioelu 2:27-28
6. O le a se faaupuga a Peteru e tatou te iloa ai na malamalama o ia i le mataupu lenei? Galuega 2:16
7. O le a seisi faaupuga o loo faa'oga e faamatala mai ai le uluai uaga o le Agaga Paia? Galuega 1:4-5
8. O le a foi le folafolaga a Iesu mo i latou uma lava e maua le papatisoga a le Agaga Paia? Galuega 1:8
9. O le a le mea na tupu i le uluai ekalesia ina ua latou maua le uaga muamua, le papatisoga a le Agaga Paia? Galuega 2:37-38, 41; 4:4; 11:21
10. O a nisi mea na tupu i le au kerisiano ina ua latou maua le papatisoga a le Agaga Paia? Galuega 2:42; 2:44-45
11. O a ni auala o loo faailoa mai e le Tusi Paia na taitaiina e le Agaga Paia le galuega a le ekalesia ina ua latou mauaina le faamanuiaga o le uaga muamua?  
Galuega 5:1-3  
Galuega 5:17-20  
Galuega 8:26-29, 39  
Galuega 10:9-14; 28  
Galuega 11:12

Galuega 11:27-28; 21:9

Galuega 13:2

Galuega 15:28

Galuega 16:6-10

Galuega 20:22-23

12. O le a le mea o le a tupu pe a taunuu le uaga mulimuli a le Agaga Paia?  
Faaaliga 18:1
13. O le a le mamalu o le Atua? Esoto 11:18-19
14. E faapefea ona faaali mai le mamalu ma foliga o le Atua i le lalolagi?  
2 Koronito 3:18
15. O a ni tulaga faaaliga mai e tai tutusa ai le uaga muamua faapea ai ma le uaga mulimuli a le Agaga Paia?
16. O loo faamatalaina mai se manatu a le tamaitai perofeta o Elena Uaita i le amataga o lenei mataupu, e faatusatusa ai tulaga o le uluai uaga faapea le uaga mulimuli. O a la ni tulaga e faamatalaina ai le taua o nei mea pe a tutupu?
17. O le a la se lapataiga a le tamaitai perofeta i le mea o le a tupu ao tatou faatalitali mo le faamanuiaga o le uaga mulimuli ae faatuatua'ni le mauaina o faamanuiaga o le uluai uaga ma le papatisoga a le Agaga Paia?
18. Aisea na liligi ifo ai e le Atua faamanuiaga o le uluai uaga a le Agaga Paia?  
Galuega 1:14
19. Aisea na liligi ifo ai e le Atua faamanuiaga a le uaga mulimuli a le Agaga Paia? Sakaria 10:1
20. O le a le mea tatou te faia a o tatou sauni atu mo le toe afio mai o Keriso?  
Jeremia 29:13  
2 Nofoaiga Tupu 7:14  
Efeso 5:18  
Isaia 62:6-7  
Sakaria 10:1

#### O LE FAATAULAIGA O TALOSAGA

- Tatalo i le Atua ina ia:
  - Taitai oe ia e malamalama i le uluai uaga ma le uaga mulimuli a le Agaga Paia
  - Papatisoina oe e lona Agaga Paia ma ia tapena oe ia maua le uaga mulimuli
  - Faamanuia i latou uma o loo i lau lisi tatalo

# ASO LONA TOLU O SE SUIGA VAAIA

A e faitauina le tusi o Galuega, e tasi se mea e manino mai i mataupu uma lava o i lenei tusi. Na tupu tele le ekalesia ina ua mavae le aso Penetekoso. Na taitai le Agaga Paia i le galuega a le Atua, ma e afe ma afe i latou na liua ma talia le tala ia Iesu Keriso. Na iai foi ni faafitauli na tulai mai ona o lea faaopoopo o le tupu o le ekalesia, e pei foi ona faamatala mai i le tusi o Galuega mataupu e 6 ina ua tuulafoaina tina ua oti a latou tane. O lea na taitaiina ai e le Agaga Paia le au aposetolo e 12 ina ia valaauina se faatasiga a le au faatuatua; mai lea faatasiga, e to'a 7 tiakono na filifilia. O o latou agavaa e faigofie lava: "ia tauleleia, tumu i le Agaga Paia, ma ia matua le mafaufau" (Galuega 6:3).

## E LE LAVA NA O LE PAPATISOGA I LE VAI

O agavaa e ao ina ia vaaia ona faato'a faaaogaina lea e fai ma se taiala. O lea la, o le agavaa o le faatumuina e le Agaga Paia e ao lava ona vaaia i le olaga o le tagata. Ae e iai foi le fesili: e le faatumulia ea le tagata e le Agaga Paia i le taimi o lona papatisoga? Atonu o le tali o lea fesili, o le leai; aua foi a na faapea, se meamanu o le tofiga o le tiakono ua le manaomia. O le faaitaiga: a faapea ua tau su'e se tagata mo se galuega, ma o tagata uma lava e lanu uliuli laulu, ona le aoga lea o se faatonuga e su'e mai uma tagata e lanu uliuli laulu.

O le mea na tupu i le au faatuatua mai Samaria e faamautuina ai le manatu lea e faapea e le o tagata uma lava sa papatisoina i le vai o le a faatumuina i le Agaga Paia. I le Galuega 8, tatou te faitauina ai e faapea na papatisoina e Filipi nisi o alii ma tamaitai, ma na iloaina mai e le au soo sa i Ierusalema, ona auina atu loa lea iai o Peteru ma Ioane i Samaria. O le faamatalaga la a le fomai ia Luka e faapea:

"Ua o mai foi i laua, ona tatalo lea mo i latou, ina ia maua e i latou le Agaga Paia; aua o ona po ia e le'i afio ifo ai o ia i se tasi o i latou; ua na ona papatisoina o latou i le suafa o le Alii o Iesu. Ona la faaee atu lea o latou lima ia te i latou, ona maua lea e i latou o le Agaga Paia."  
(Galuega 8:15-17).

I le filifiliga o le au tiakono e to'a fitu, o alii na iloa e le'i tumu i le Agaga Paia na le filifilia i latou. O le tulaga lea na iloa ai, o le faatumulia i le Agaga Paia o se mea e iloa ma o se mea uiga ese lava. E faapei i nei uiga? E foliga mai o i latou ua faatumuina i le Agaga Paia na foliga ese mai lava o latou uiga mai le toatele o le au faatuatua. E foliga mai o le agavaa o le faamaoni na ese mai lava o latou olaga na vaaia, olaga manumalo i le taitaiga a le Agaga Paia.

O le valaauina o i latou e “auauna atu” e foliga mai o le faatumulia i le Agaga Paia ua avea ai latou e auala mai ai faamanuiaga mo nisi. O latou olaga ua ala mai ai faamanuiaga vaaia e le maua ia te i latou e le o faatumulia i le Agaga Paia.

O NISI FOI O KERISIANO I TAUSAGA UA TUANA’I LATOU TE AU AI FOI I LEA MANATU.

O nisi foi o kerisiano mai tausaga ua tuana’i sa au ai foi latou i lenei manatu, e pei o le faifeau lauiloa o Dwight L. Moody. Na tusia e ia e faapea:

“E toatele le fanau a le Atua e toeitiiti lava le iai se ola ma e leai foi se malosi e faia ai ni galuega. Ae peitai, a pa’i mai loa iai le Agaga Paia, ona foliga mai lea ua ese lava ma maoa’e o se liuga o le olaga i galuega fai. A faapea e le aoaina e le Tusi Paia le mea lenei, o le a ou faasa’o atu: ou te talitonu e mafaia ona fai ni mea i se vaiaso mea na tatou le mafai ona fai i se tausaga atoa pe a tatou maua se papatisoga fou....

“Ua toatele i latou ua fai mai ona sa faatumuina i latou muamua, o le a faatumuina ai latou i taimi uma lava; ae paga lea, uo o e, o i tatou ua na o ni vaa e mama, ma e tatau ona tuu mai i lalo o le vai e tafe ifo e faatumuina ai pea lava i taimi uma ...Ia tatou tumau pea ia latalata atu ia te Ia. (*They Found the Secret*, p. 85-86).

SAILI PEA LE PAPATISOGA A LE AGAGA E LE AUNOA

Fai mai Paulo o le faatumulia o le tagata faatuatua i le Agaga Paia ua na o se mea e mafai foi ona toe le iloa atu. Na lapatai atu Paulo i le ekalesia i Efeso e faapea:

“Aua foi ne’i ona outou i le uaina, o le mea e ulavale ai; a ia faatumuina outou i le Agaga.” (Efeso 5:18).

O le veape i le gagana Eleni o le “tumu” o se upu faatino e faifai pea. Na ta’u atu e Paulo i le au faatuatua ina ia faaauau pea le faatumuina i le Agaga Paia. O aso uma lava ia ole atu i le Atua ina ia liligi mai pea le Agaga. O se folafolaga e tatau ona tatou taofi mau ina ia maua ai pea lava pea. Atonu o se mea foi lea na fuafuaina e le Atua ina ia tatou maua atili ai pea le sootaga ma Ia i aso fai soo, ina ia faatumulia ai pea tatou e le Agaga.

O SE EKALESLIA UA FAATUMULIA E LE AGAGA PAIA

“O ni kerisiano ua faatumulia i le Agaga o le a avea i latou ma mea e maua ai foi ma se ekalesia ua faatumulia i le Agaga Paia. Se’i tatou manatunatu i se ekalesia e le faatumulia e le tupu ai lenei mea, e le o iai le Agaga. O loo faamatala mai i le tusi o Faaaliga mataupu e 3 foliga o le ekalesia a le Atua i aso o le gataaga. O loo faaogaina ai le upu o le “mafanafana” e faamatala mai ai lea ekalesia (Faaaliga 3:14-16). E le o gatasi upu o le “mafanafana” ma upu “faatumulia i le Agaga”. O le tagata talitonu e le mafai ona tupu ai mea uma e lua; a le maalili, e vevela. O le mea lea e faigofie ai ona malamalama se iuga o lenei manatu. O le faatumulia i le Agaga

Paia e suia ai le au faatuatua mai le “mafanafana”, ae e avea ai ma nisi ua faaali atu le olaga maualuga ma le pupula o le Atua, e usiusita’i i le Faaola o Iesu Keriso.

O le faataoto i taupou e to’ a sefulu e faamautuina ai foi lenei tala moni (Mataio 25:1-12). O taupou popoto na sauni e faafetaia’i le faato’a faiava na iai a latou suauu faaleoleo. Ou te talitonu o suauu faaleoleo nei e faasino i le papatisoga ma le faaumulia i le Agaga Paia. O loo faaluaina mai foi e Elena Uaita lenei manatu e faapea:

“O le igoa o taupou “valelea” e faasino lea ia i latou e le o i latou loto le galuega faamaoni e pei ona finagalo mai ai le Tama. O le afio mai o Keriso e le suia e valelea ina ia popoto. O le ekalesia foi e faasino iai le au taupou valelea e faasino foi lea i le tulaga o le ekalesia faa-Laotekaia. (*Review & Herald*, August 19, 1890).

A tatou maituina le mea na tupu i le uluai ekalesia i le tusi o Galuega, ona toe faatusatusa mai lea i le ekalesia i ona po nei, ou te tau faamautuina ai lea o le manatu lenei e faapea, ua foliga mai ua le o faatumulia le ekalesia i le Agaga Paia. O lea manatu e tau aafia ai ma le ekalesia Aso Fitu o le Toe Afio Mai. O lona uiga ea la ua le faaaogaina le ekalesia Aso Fitu e le Atua e faauma lana galuega? E leai, leai lava. O le uiga, ua fia faaaogaina e le Atua lana ekalesia ma ona tagata i se tulaga maualuga lava e maua pe a faatumulia ona tagata i le Agaga Paia. O lona finagalo maualuga lea.

Mai faamaumauga o ekalesia mai anamua o loo atagia mai ai le tulaga o le lotu kerisiano i aso nei. O le tele lava o le au faatuatua totino o se ekalesia, e oo foi i faifeau, ua tau le tuueseina ni taimi faapitoa a le tagata lava ia mo tatalo ma suesueina o le afioga a le Atua. Ua tele lava i kerisiano ona au atu ai i lotu faatasi a ekalesia e na o le faatasi lava i le vaiaso; ona pau ai lava lea. O sauniga tatalo i ogatotonu o vaiaso ua tele lava ina le toe faia, ae a fai foi, ua na o se toaititi lava o ni tagata e au ai. O tulaga ea ia e faaali mai ai se ekalesia poo ni kerisiano ua faatumulia i le Agaga Paia? Ailoga o se tulaga lelei lea mea.

E iai se manatu e faapea a na ua alu ese atu le Agaga Paia mai le ekalesia ma ona tagata i le aso, e talitonu e faaauau lava galuega ma mea fai ua masani ai tagata, e pei lava e le i alu ese le Agaga Paia, e matua le iloa lava. Ou te manatu lava, ona o a’u o se kerisiano ma se faifeau foi o le tala lelei, e mafai lava ona ou pisi ma faatino fuafuaga o le galuega ae aunoa ma le fuafua faatasi ma le Agaga Paia. Ou te masalo lava o le tele o taimi ua faatumuina taimi o fuafuaga i galuega fai mo le ekalesia i manatu faaletagata lava ia, ae le o faia faatasi ma le Agaga Paia.

E FAAPEFEA FOLIGA O LE KERISIANO UA FAATUMULIA I LE AGAGA?

E iai ni nai tulaga o loo faamatalaina mai i le Tusi Paia e tau maua ai e i tatou foliga o le kerisiano ua faatumulia i le Agaga Paia. O Peteru o se faataitaiga lelei lava, i le taimi ae le’i tupu lea mea ia te ia, ae faapea ma le

taimi ua uma ona maua e ia le Agaga Paia. A o le'i mauaina e Peteru le Agaga Paia, sa vaivai o ia, foliga fefe ma mata'u; e tele lava ina faia a na galuega ma le faamoemoe i lona lava malosi. I ni nai vaiaso a o lumanai ai le aso Penetekoso, na ia faatolu o na faafitia lona Alii Faaola. Ae na avea ia o se tagata na iloa atu ai se suiga tele ina ua faatumuina o ia e le Agaga Paia. Na tele se suiga i le loloto o lona olaga. I le tusi o Galuega mataupu e 4, o loo faamatala mai ai le faatonuga a ta'ita'i o le au Iutaia, mo Peteru, ina ia aua le toe tautala pe a'oa'o atu foi i le suafa o Iesu (Galuega 4:18). Ina ua maua e ia le Agaga Paia, ua aveeseina ai le mamafa tu o le avega o le fefe; o lea na la tali atu ai ma Ioane e faapea: "Pe tonu i luma o le Atua, ona ma faalogo ia te outou, a e ma te le faalogo i le Atua, ina filifili ia outou. Aua ma te le mafaia ona tautala i mea ua ma vaai iai ma faalogo iai." (Galuega 4:19-20).

I le Galuega 18 ma le 19, tatou te maua ai le tala ia Paulo ma Apolo. O le tasi ua tumu i le Agaga Paia ae o le tasi e leai. Tatou te faitau le tala ia Apolo, masalo lava o ia o se faifeau aoga mo Keriso. E fofoga lelei, ma o se failauga maoa'e foi o ia. Ae paga lea, na a'oa'o o ia e uiga ia Iesu ma le papatisoga i le vai. Na te le'i malamalama i le papatisoga a le Agaga Paia. Ae ui i lea, na faaogaina ma taualoa lava o ia, ma e na avea ia ma se tagata malosi i le galuega. O lana seleselega e to'a 12 na liua mai ai.

O Paulo e le'i tutusa ma Apolo i le agavaa e folafola atu. Fai mai o lana tautala ma lona tino foi e foliga vaivai (2 Koronito 10:10). O nisi foi taimi e tau le o nisi e faalogologo ia Paulo. Ae na malamalama ma iloa lelei e ia le taua o le laugaina o le papatisoga a le Agaga Paia faatasi ai ma mataupu moni ia Keriso. Na maoa'e le galuega a Paulo, e pei ona faamatalaina mai e faapea: "...o lea na faalogo ai i le afioga a le Alii o Iesu o i latou uma lava e ua nonofo i Asia, o Iutaia atoa ma Eleni." (Galuega 19:10).

#### E GALUE LE AGAGA I NI AUALA E FAIGATA I ISI TAIMI ONA ILOA

Atonu o le tasi lea o mafuaaga e faigata ai ia i tatou ona mausali le tatou sailiga ma vaai e pei e le taua le Agaga Paia i o tatou lava olaga, ae maise ai foi le ekalesia, ona o le tele o nisi taimi e faigata ona tatou iloa le galuega a le Agaga i o tatou lava olaga. A galue le Agaga e le foliga mai ua le maua ai se to'a ma se filemu ia i tatou poo le ekalesia foi. Tatou te manana'o uma lava ina ia manino mai mea e tutupu; ma ia tutupu mea e tusa ai ma a tatou lava fuafuaga. O isi taimi ua foliga mai ua tuai pe tele vave foi ona tutupu mea tatou te mananao ai, ona tatou popole loa lea.

E le'i popole tele le uluai ekalesia ona o tulaga faapenei i le galuega a le Agaga. E le'i tele ni fale ma mea totino a le uluai ekalesia, poo ni mau tulaga faalapotoga, ma na to'aititi foi le au faigaluega. Ae tatou te maua mai i le tusi o Galuega 2:41, na 3,000 na faaopoopoina mai i le ekalesia, toe 5000 na faaopoopo i le Galuega 4:4, mea uma ia na tutupu ae luman'i le tofiaina o ni tiakono.

Ou te masalo a na tutupu nei mea i nei aso, e toatele nisi o le a faateia ma le mautu mafaufau e uiga i le galuega. Ua ou molimauna uso a ekalesia ma

ta'itai foi ua tau faavaivai ona o le auala e galue ai le Agaga ae latou te le'i malamalama ai, e le o auala ia na latou manana'o iai. O le faafitauli ona e ese lava ala e galue ai le Agaga Paia, e le tusa ma manatu o tagata. Ua ou vaaia taimi ua aafia ai manatu faapea i le tuputupu o le ekalesia faapea foi tulaga o a'oga.

E ita tele Satani pe a faatumulia kerisiano i le Agaga Paia. Tatou te vaaia le tulaga lea i auala na taumafai ai le tiapolo e faalavelave a'o gaioi ma galue le Agaga i le au aposetolo ina ua te'a le aso Penetekoso faapea foi ma le mea na tupu ia Setefano.

#### O NI MEA MAOA'E NA MAUA

O galuega e faia faatasi ma le Agaga Paia e maua mai ai ni fua e maofa ai le tagata. O mea e foliga i le vaai a le tagata e faatauvaa, ae a faia faatasi ma le Agaga Paia ma lona malosiaga, e manuia. O galuega e faia ma le faamoemoe i le atamai ma le malosi o le tagata ae le faatumuina i le Agaga e fai fua lea.

Na faamatalaina e le alii o Simi Simipala (Cymbala) se tala e faaata mai ai le malosiaga a le Agaga Paia i galuega pe a faia faatasi, o le tagata ma le Agaga Paia. Na faapea i le tausaga 1921, na malaga ai ni misionare i Aferika, o le alii o Tavita, o lona faletua o Savea, faapea si o la alo e lua ona tausaga. Na o mai latou mai le atunuu o Suetena (Sweden). Na feiloa'i i latou ma se tasi aiga faamisionare foi mai se tasi o atunuu i Europa, ma latou filifili ai e Malaga faatasi i totonu lava o Aferika, i ni vaega mamao mai aai e tumutumumu ai tagata. Na latou taunuu loa i se tama'i aai e igoa ia Natolera. Ae na teena i latou e le alii sili o lea nuu ona na manatu o le a le fiasia latou atua pe a faataga nei papalagi i le latou nuu. Na o loa nei misionare ma fausia si a latou tama'i fale e fau i palapala malo, e le mamao mai le aai lea o Natolera.

Na faaauau pea lo latou tatalo ina ia pa'i atu i loto o tagata o lenei nuu, ae le'i iai lava se suiga o nei tagata. Na fiu, ma e na filifili ai loa le tasi o ulugalii misionare nei e faapea o le a toe foi latou i le aai na o mai ai.

E faalua i le vaiaso ona alu atu se tasi o talavou mai le nuu o Natolera e faatau atu fuamoia ma moa i le aiga o Tavita ma Savea. O le talavou lenei e toatasi lava na avea ia ma fesootaiga a le au misionare ma le nuu. Na maua ai loa le manatu o Savea e sili ia pe a talanoa i le talavou faatau fuamoia ma moa lenei e uiga i le alofa o Iesu. Na faamanuiaina ana taumafaiga ina ua talia e le talavou lenei mai le nuu le tala ia Iesu Keriso le Faaola.

Sa faamanuiaina le ulugalii misionare lenei ma na toe fanau ai se la pepe na faaigoaina ia Aina. Sa faigata le tuu eseeseina o Savea ma lana pepe ona sa maua foi o ia i le faama'i o le mumu. Na faateteleina le faigata o lona ma'i, ma na maliu ai lava o ia e tusa ma le 17 aso talu na fanau lana pepe. Na faavaivai tele le alii o Tavita. Na ia eli le tuugamau ma tanu ai si ona faleaua, ma toe foi atu i le aai o loo iai le ulugalii misionare lea sa latou malaga faatasi mai, ma tuuina iai si ona afafine lea na fanau i le nuu o Natolera. O lana tala, "o le a ou toe foi i lo'u atunuu o Sweden. Ua leai so'u toalua ma e le mafai foi ona ou tausia lo'u afafine. Ua faaleaga e le Atua lo'u olaga."



O le ulugalii lenei na tuuina iai le pepe o Aina ina ia tausia, na mama'i foi ma maliliu i la'ua totonu o le 8 masina. O si pepe o Aina, na tuuina atu o ia i se aiga misionare mai Amerika, ma na suia ai le igoa o lenei teine ia Akenese, ona latou toe foi i Amerika ma le pepe lenei o Akenese ina ua 3 tausaga lona matua. Na faaauau le galuega faafaifeau a lenei aiga i le Setete o South Dakota. Na tupu lenei teine o Akenese ma ina ua matua ma ua agavaa e aoga i se kolisi, na 'au ai atu loa lea o ia i se kolisi lotu i le aai tele o Minneapolis. O ina na feiloa'i ma faaipoipo atu ai o ia i se alii e igoa ia Dewey Hurst.

Sa galulue lenei ulugalii mo le Alii, ma na faamanuiaiina i la'ua i se fanau e to'a lua, o se tama ma se teine. Na avea le faifeau o Dewey o se peresitene o se aoga lotu i Seattle, Washington, o se aai e toatele ni tagata mai le atunuu o Sweden e faamautu ma nonofo ai. O le talaaga o tagata mai ia atunuu na faataua lava e lenei tamaitai o Akenese. I se tasi la aso, na ia mauaina ai se nusipepa na iai se ata o se koluse pa'epa'e o faailoga ai se tuugamau faatauvaa lava, ma o le igoa i luga o le koluse pa'epa'e lea, o le igoa o Savea. Na faavave atu loa Akenese i se tasi o faiaoga e malamalama i le gagana faa-Suetena (Swedish) ina ia faaliliu le tala o le koluse pa'epa'e.

Na faamatala e le faiaoga lenei ia Akenese e uiga i se ulugalii misionare na o i le nuu i Aferika o Natolera. Sa fanauina e le ulugalii misionare lenei se pepe teine ma e na maliu le tina i nai aso na te'a ai. Na faamatalaina mai i lenei tala se talavou o le nuu o Natolera na taliaina Keriso; ma e ina ua toe foi le misionare papalagi, na galue lava le talavou lenei ma tala'i le alofa o Keriso, ma i'u ai ina talia e le alii sili o le nuu le talavou lea e fausia se a'oga i totonu o le nuu. Faatasi ai ma tamaiti o le a'oga, na faasoa lava ma ta'uta'u i tagata o le nuu o Natolera le alofa o Iesu Keriso, lea na faasoaina mai e le faletua o se misionare, o lona igoa o Savea, ma na oo lava ina talia uma e tagata o le nuu lenei Iesu Keriso. Na ta'uta'u atu e fanau aoga i latou matua le tala o le faaolataga, ma na i'u ai ina liua uma lava tagata o le nuu e avea ma kerisiano, e oo lava i le alii sili o le nuu o Natoleralea na teena misionare papalagi ona o le fefe ne'i le fiafia o latou atua faapaupau. Fai mai le tala i le nusipepa lea, e tusa e 600 le au kerisiano o le nuu lenei o Natoleara.

Na mavae nai tausaga e le tele, ona maua ai lea o se avanoa e Akenese e malaga ai i se fono faale-ekalesia i Lonetona i Peretania, sa feiloa'i ai ma se faifeau na ripoti mai e 110 afe tagata kerisiano i le atunuu o Zaire i Aferika. Na fesili Akenese pe le'i fetau i o ia i se ulugalii misionare e igoa ia Tavita ma Savea. "Ioe lava, o Savea na ta'ita'ina a'u ia Iesu. O a'u o le tama lea na alu atu ma faatau moa ma fuamoa i le ulugalii misionare lena ae e te le'i fanau. I aso nei, e faataua ma faamanatuina e le matou nuu lou tina." Na la fetagisi ma feiloa'i aua o lenei ua toe ta'ita'ina mai e le Atua i laua e feiloa'i i se auala faapitoa. "E tatau lava ona e malaga atu i Aferika aua o lou tina, o

se tagata ta'uta'ua tele i tala faasolopito o le matou nuu," o le tala lea a le alii faifeau Aferika lenei.

Na saunia e le Atua se auala e malaga atu ai Akenese e asia le nuu ma le tuugamau a lona tina o Savea, ma vaaia le koluse pa'epa'e lea na vaai muamua ai i le ata o le nusipepa. Sa to'atuli Akenese i autafa o le tuugamau, ma tagi a'o faafetai o ia i le Atua mo le galuega a lona tina.

O seisi vaega o le tala lenei, na maua foi se avanoa e feiloa'i ai Akenese i lona tama o Tavita i le atunuu o Sweden. Na toe faia seisi toalua o Tavita, na iai foi se la fanau ua matutua, ma ua gasegase foi o ia. O Tavita, na ola lava ma lona ita tele i le Atua ona o mea faigata na tutupu i lona olaga. Ae ona o le asiasiga atu a Akenese, na toe faafouina ai lona alofa i le Atua ma maua ai sona filemu. E lua ni masina talu le asiasiga ma le feiloaiga ma Akenese, ae maliu loa lona tama, le alii o Tavita.

Pe e le tatau ea ona tuu atu atoatoa i tatou, selau pasene, i le Atua, e aunoa ma se toe taofiofia o nisi mea o lenei olaga e faalavelave i le tatou mafuta atu i le Atua? A tatou tatalo atu ma le faatuatua i le Atua e papatiso mai tatou e lona Agaga, e tali mai lava e Ia o tatou mana'o. Ona avea lea o o tatou olaga ma ni faamalosiaga i nisi; e avea foi tatou ma auala e taitaiina ai nisi i le Atua ma lana faaolataga.

## FESILI E FAATALATALANOA

1. O a ni agavaa taua na manaomia i tiakono e to'a fitu? Galuega 6:3
2. O le a le agavaa ina ia faatumulia i le Agaga Paia e faaata mai ai e le kerisiano le papatisoga a le Agaga Paia?
3. O le a se mea taua mai le tala o le au faatuatua Samaria e a'oa'o mai ai le papatisoga i le vai ma le papatisoga i le Agaga Paia? Galuega 8:12-17
4. E faapefea ona iloa tonu e le kerisiano ua faatumulia se tagata i le Agaga Paia ina ia mafai ai loa ona tofi o ia e avea ma se tiakono?
5. O le a le mea na tusi e le alii o Dwight L. Moody e faatatau i le papatisoga i le Agaga Paia?
6. O le a se tala a Paulo e uiga i le faatumulia e le Agaga? Efeso 6:18
7. Mata ua faatumuina le ekalesia i Laotekaia i le Agaga e pei ona faamatala mai i le tusi o Faaaliga? Aisea? Faaaliga 3:14-16
8. O le a le mea ua fai mai ai le Atua na te faia i le au kerisiano Laotekaia pe a leai se suiga o i latou?
9. O a ni foliga o le ekalesia e faaali mai ai ua le o faatumulia i le Agaga Paia le ekalesia i nei ona po?

10. O le a le mea na eseese ai taupou popoto ma taupou valelea i le faataoto a Iesu? Mataio 25:1-12
11. O le a sou manatu i le suau faaleoleo o le faataoto a Iesu?
12. O le a le mea na faia e Peteru ae le i mauaina le papatisoga a le Agaga Paia? Mataio 26:69-74
13. O le a se suiga na oo ia Peteru ona o le papatisoga a le Agaga Paia? Galuega 4:18-20
14. Sa faatumulia ea Apolo e le Agaga? Galuega 18:24-25
15. O a ni mea na maua mai i le galuega a Apolo? Galuega 19:12
16. Na faatumulia ea Paulo i le Agaga Paia? Galuega 9:17-18
17. Na lelei ea se lauga a Paulo e pei o Apolo? 2 Koronito 10:10
18. O a ni fua o le galuega a Paulo i Asia? Galuega 19:10-11
19. O le a se mea e tupu pe a faataga le Agaga Paia e ta'ita'ia le galuega a le Atua?
20. Na iai se popolega i le ulua'i ekalesia ina ua afe ma afe tagata o le ekalesia ae e le'i mautu ni aufaigaluega tiakono, o toea'ina, faapea foi le leai o ni maota tapua'i a le ekalesia?
21. O le a se manatu a Satani e uiga i kerisiano ua faatumuina i le Agaga Paia?
22. O le a le mea e manaomia e le tagata faatuatua ina ia manuia ai lona olaga faakerisiano ma faamanuiaina ai foi lana auaunaga i le Alii?

## TALOSAGA

- Ole i le Atua ina ia:
  - Papatisoina oe e lona Agaga
  - Ia vaaia e isi le eseese ua iai nei lou olaga taumafai
  - Faamanuia i latou o i lau lisi tatalo

# ASO LONA FA O LE PAPATISOGA A LE AGAGA PAIA

E toatele kerisiano e le ‘au ai i ekalesia faa-Penetekoso ona e fefefe i le manatu o le “papatísoga a le Agaga Paia”. E foliga e tau lata lea faaupuga i faiga lotu foi ia e matuai malosi tele ma tau mafuli i le pisapisao ma pei ai o ni faiga siva ma le foliga ai o ni tapuaiga i le Atua. O le papatísoga a le Agaga Paia e mafai lava ona maua ma vaaia ai ni tulaga o le faagae’etia o le tagata faatuatua. Ua tele foi i latou e ta’ua faatasi le tautala i gagana eseese ma le papatísoga a le Agaga Paia. O le mea moni lava, o le tautala i gagana eseese o se tasi lea o mea alofa a le Agaga Paia, ae le o se mea ia matuai iai ina ia maua mai ai le papatísoga a le Agaga.

## O LE FUAFUAGA A SATANI

E matuai le mana’o lava satani ina ia e malamalama pe e te mauaina le papatísoga a le Agaga Paia. O le mea lenei ua ia taumafai ai lava ia faanefu lea mataupu o le Tusi Paia. Na malamalama lelei lava le tamaitai perofeta o Elena Uaita i lea taufaasese a le tiapolo o tagata faatuatua:

“Talu ai ona o le taua tele o le galuega a le Agaga Paia mo le ekalesia a Iesu Keriso, ua faateteleina ai foi faiga taufaasese a Satani ia le iloa ai tonu lava e le au faatuatua galuega a le Agaga, ma galo ai le puna moni o le malosiaga ua folafolaina mai e le Tama mo lana fanau.” (*The Great Controversy, p.viii*).

O le papatísoga a le Agaga Paia ua na o se galuega faapitoa lava a le Agaga Paia ina ia faatumuina ai le ola o le tagata faatuatua. O le papatísoga lena e ta’ua foi o le faatumuina poo le faauuina faapitoa ua leva lava ona iai, ina ia mafai ona faaaogaina talu mai lava le 2000 tausaga talu mai le aso Penetekoso. Na faatusa lava e Peteru le liligi ifo o le Agaga i le uaga muamua e pei ona tautala iai le perofeta o Ioelu (Galuega 2:16-21).

## O LE FAATINOGA MA LE FAATAITAIGA A IESU

O Iesu o ia lava o le faata’ita’i o mea uma lava. I lona lava olaga tatou te vaaia ai le papatísoga a le Agaga Paia, o se mea faapitoa, e ese mai i lona papatísoga i le vai. O lona papatísoga lea na maua ai lona malosi faapitoa na manumalo ai ia Satani, ma faaaupuga ai o Ia mo lana galuega o le a’oa’o ma tala’i atu.

O le faaitaiga mua lava mai le lagi a Keriso o le auala foi lea mo kerisiano uma lava. O Keriso na fanau mai i le Agaga (Luka 1:35). Na ta'ita'i ia e le Agaga a'o tuputupu a'e o ia e avea ma tagata matua (Luka 2:52). Na maua e ia le papatisoga i le vai, mulimuli ane ai le papatisoga a le Agaga e tali ai ana tatalo (Luka 3:21-22). Ma e amata mai i lea taimi na faatumulia lava o Ia i le Agaga (Luka 4:1). Mai lona mauaina o le papatisoga a le Agaga, faapea le faatumulia ma le faauuga, na lava sauni o ia e faafeagai ma Satani, ma manumalo ai i taimi uma lava sa fetau ai ma lona fili (Luka 4:2-13). Na faia ai loa lana galuega faatasi ai ma le malosiaga mai le Agaga Paia (Luka 4:14; Galuega 10:38).

#### O SE MEA E TUPU I SE TAGATA TALITONU E LE'I MASANI AI

O se mea fou e faia e le tagata talitonu, ae le'i masani ai, o le mulimuli lea i faaitaiga a Iesu. E fanau fouina le kerisiano i le Agaga ma papatiso (Ioane 3:5-8). Ae peita'i, o le papatisoga i le vai, ua na o se amataga lea. E ao foi i le ua talitonu ia Iesu ona papatisoina e le Agaga Paia (Luka 3:16, Galuega 1:4-5). O le papatisoga lea e le Agaga paia na mafai lava ona maua e amata mai i le aso Penetekoso. O le faatumulia i le Agaga Paia e matua'i manaomia e le kerisiano ina ia maua e ia le malosiaga e ola ai i se olaga manumalo ma molimau atu ai mo Keriso (Galuega 1:8).

Na folafola mai lava e Iesu e foa'i mai le Agaga ia i latou uma lava e ole atu (Luka 11:13). Ae fai mai foi Paulo e mafai ona tatou maua lea mea alofa pe a tatou faatuatua (Kalatia 3:14). O le mauaina la o lenei meaalofa e matuai taua tele, o lea na faatonu mai ai tatou e Paulo "ia faatuuina tatou i le Agaga" (Efeso 5:18). E le o se mea tatou te filifili iai. O se mea e tatau lava ona iai i le tagata talitonu pe a fia iai se suiga talu ai le upu lelei e pei ona folafola mai e Iesu Keriso.

Fai mai Iesu o le a faia galuega lelei e le tagata ua talitonu, ma e mafai foi ona sili atu le tetele o ia galuega lo mea na Ia faia. (Ioane 14:12). A'o femaliua'i Keriso i luga o lenei fogaeleele, na o le tasi lava le mea sa mafai ona iai o Ia. Ae ina ua alu a'e o ia i lona Tama, ua mafai loa ona tele mea e mafai ona iai o Ia i lenei lalolagi e ala lea i le ulufia o le au faatuatua e lona Agaga (1 Ioane 3:24; Ioane 14:16-18). O le mea lenei ua tuuina atu ai i le au faatuatua le malosiaga ia latou faia ai galuega e ala mai i le Agaga Paia, ma o galuega nei o le a maoae ona e tele mea e mafai ona faatino ai.

O le faataunuaina o le folafolaga a Iesu na vaaia lava i le aso Penetekoso. Na tala'iina le tala lelei, na liua tagata e toatele, loto gatasi ma fialia le au faatuatua ma faamalolo e mama'i. (Galuega 2:46-47; 5:15-16). O le galuega foi lenei na faia e Iesu ao iai o Ia i le lalolagi.

#### MAUAINA O LE PAPATISOGA A LE AGAGA PAIA INA UA TUANA'I LE PENETEKOSO

E le'i iai uma le au faatuatua i le aso Penetekoso. Ona o lea tulaga, o le mea la e tatau ona fesiligia, na faapefea la ona maua e le au faatuatua le papatisoga a le Agaga ina ua te'a le aso Penetekoso? O le tali o loo maua lea i

le tusi o Galuega. Na iai taimi na tupu ai lenei mea o le faaali mai o le Agaga Paia a’o lauga Peteru ia te i latou (Galuega 10:44-46; 11:15-17). Na faaali mai foi e le Atua i le ekalesia e faapea o le faamanuiaina i le papatisoga a le Agaga Paia, o le tuuina lea o lima a le au aposetolo ia faamanuia ai le au faatuatua (Galuega 8:12-17; 19:1-6). O loo maua mai i le tusi o Galuega e 8 le faamanuiaina o i latou mai Samaria na taitaiina e le Agaga ina ia talia le tala lelei ma latou papatiso ai. Ae latou te le’i mauaina le papatisoga a le Agaga Paia. Na o mai Peteru ma Ioane may Ierusalem faapitoa lava ina ia faaee o la lima ma tatalo mo papatisoga a le Agaga Paia ia maua e i latou. O se tulaga manino lava lenei, e iloa le eseese o le papatisoga i le vai ma le papatisoga a le Agaga Paia. E matuai esese lava mea nei pe a tupu. O le Agaga e taitaina le tagata ina ia talia Iesu ma papatisoina i le vai. O le papatisoga e le Agaga Paia e ma’oti lava le eseese mai le papatisoga i le vai. O loo ta’ua mai le maua e Paulo o le papatisoga e le Agaga Paia e ala lea i le faaee o lima i le tagata ua faatuatua ma talia le tala lelei ia Iesu. (Galuega 9:17). I le tulaga ia Paulo, na muamua ona maua le papatisoga a le Agaga Paia ae le i papatisoina o ia i le vai. O lenei faaee o lima ma tatalo e faia lea e se tasi ua talitonu ma o ia foi ua ia maua le papatisoga a le Agaga Paia, e iloa i la latou amio.

A faaali se manaoga mo se tatalo ma le faaeeina o lima ia maua ai le papatisoga a le Agaga Paia e se tasi, o le faaitaiga o se tatalo e mafai lava ona faaoga pe a manaomia e faapea:

“Le Tama o i le lagi, matou te o atu i le mea o e afio ai i le suafa o lou Alo o Iesu Keriso. A o e iai i lenei lalolagi, na fetalai Iesu, i lo matou leaga na mafai lava ona matou avatu meaalofa i matou fanau, e faapefea la le tele o faamanuiaga mai le Agaga Paia e maua pe a matou ole atu?” Ma o lau auauna foi o Paulo na ia fai mai matou te maua mea alofa mai le Agaga Paia i le faatuatua. Le Tama e, matou te o atu i ou luma matou te saili ma manaomia le papatisoga a le Agaga Paia mo \_\_\_\_\_ . I le suafa of Keriso Iesu matou te ole atu ina ia faatumulia \_\_\_\_\_ i lou Agaga Paia ma ia mafuta lou Agaga ina ia vaaia ai le suiga o lona olaga, ma vaaia ai foi Oe i le olaga o \_\_\_\_\_ . Ou te tatalo atu ia vaaia fua o le Agaga i le olaga o \_\_\_\_\_ ina ia avea ai o ia o se molimau ola ma le faatasi mai o lou Agaga Paia. Faafetai Iesu mo taapenaga o o matou loto. Faafetai mo le sapaapaia o a matou galuega. Faafetai. Faafetai mo le faafofoga mai i a matou talosaga. Amene.”

E le tau faaeeina ni lima i se tasi ua manaomia le papatisoga a le Agaga Paia. Ina ua ou faasoa le manatu lenei ma le matou ekalesia, na mana’o ai loa se tasi o le ekalesia e saili le papatisoga a le Agaga i le afiafi lava lea. Na molimau o ia ina ua maea le talosaga na ia lagonaina le filemu na te le’i faalogoina muamua lava.

I se tasi foi taimi na ma faasoa ai ma se faifeau Aso Fitu na ta’u mai ai se mea na tupu ia te ia. I se tasi aso sa galue ai i lana faatoaga ma faasolo ona

mafaufauga i lana galuega faafaifeau, e pei lava o le mea e fai e tele o faifeau pei foi o ia. A’o faasolosolo ona mafaufauga, na lagona ai e ia se leo o musumusu mai ia te ia, “ole mai mo lo’u Agaga.” Le taimi lava lena na tatalo lemu ifo ai i le Atua mo lona Agaga Paia. Fai mai le faifeau o le taimi lava lea na lagona ai e ia se faalagona o se filemu i lona loto na te le’i faalogoina muamua lava.

E le faatapulaaina e le Atua auala tatou te maua ai le papatisoga a le Agaga Paia. Ae ou te iloa o le sauniga o le faaeeina o lima a’o tatalo mo le faatumulia i le Agaga o se sauniga matagofie tele lea. Ua na o se mea matagofie tele lenei e faataunuuna ma maua ai se lagona o le filemu mai le Atua faatasi ma seisi o le au faatuatua.

UA VALAAU LE ATUA INA IA MAUA UMA E AU KERISIANO LE PAPATISOGA A LE AGAGA

Na faamatala mai lava e Elena Uaita e faapea:

“O le mea ua manaomia e i tatou o le papatisoga lea a le Agaga Paia. A aunoa ma lea mea, e le sili atu i tatou nai lo le au so’o a Iesu ina ua mae’a le faasatauroina o le Alii Faaola.” (*Review & Herald*, Feb. 18, 1890).

“Ia faatauaina e le au faatuatua le manaomia tele o le papatisoga a le Agaga Paia, le faapaiaina o le ekalesia, ina ia latou ola, tuputupu, ma ave’a ai o ni laau e fua tele mai i le faatoaga a le Alii.” (*Testimonies to the Church*, Vol. 6, p.86).

A faitauina e se tasi faamatalaga a Elena Uaita e uiga i le papatisoga a le Agaga Paia, e manino mai ai lava na iloa lelei e ia le taua o le tulaga lenei, ma ia faamalosi mai ai foi i tatou uma e saili lea papatisoga. E manino lava foi ia te ia le manaoga lenei o le papatisoga a le Agaga a o tau faamae’a le galuega o le faaolaina o tagata o le Atua faapea le lalolagi.

O nei foi faamatalaga e faailoa mai ai e le te’ite’i lava ua maua e le kerisiano le papatisoga a le Agaga Paia i le taimi ua salamo ma liua ai, poo le papatisoga lea i le vai. Ana faapea ua lava lea, se meamanu e le ta’uina mai e ia mo le au kerisiano e manaomia le papatisoga a le Agaga Paia.

Ou te talitonu na fia faaalua mai lava e le Atua i le ekalesia le taua ma le manaomia tele o le papatisoga a le Agaga Paia i le tausaga 1928 lea na laugaina ai e Elder LeRoy Froom i le fono tele (General Conference) a le ekalesia, na ia faapea mai ai: “Ua ou talitonu faamaoni lava o se mafuuga lenei o faaletonu i nisi o tulaga ma faaiuga ua faia mo le ekalesia. E le tatau lava ona tatou o, aua o le tatou galuega o le auauna atu e amata muamua i le faauuga faa-Penetekoso a le tagata taitoatasi lava ia.” (*The Coming of the Comforter*, p. 94).

Fai mai a ia:

“E iai se mea e mafai ona tupu e maoa’e ma e sili atu foi loo le lagona e maua pe faato’a faailoa mai e le Agaga Paia i le tagata le agasala, pe a fanaua mai le ola fou i se agaga, ma faatumulia ai i le Agaga Paia. A le tupu le mea lenei, o le molimau o le a vaivai, o le olaga faaleagaga foi ua le atoatoa. Ua toatele i latou ua oo i le papatisoga i le vai ona gata ai loa lea iina.” (*Ibid.* p. 142-143).

O le aoaoga a le Toeaina o Froom na taitaiina ai o ia i le talitonuga e faapea o le papatisoga o le salamo, le papatisoga lea i le vai, e le lava lea. Fai mai o ia o le faatumulia o le loto o le tagata i le Agaga o le talitonuga foi lea e faapea mai ai o le faatumulia i le Agaga e matuai manaomia ina ia maua ai e le tagata talitonu le manumalo i le taimi o puapuaga a’o lumanai le toe afio mai o Keriso.

“Ua na o se tulaga fesoota’i lea e maua, e ui lava ina ua faamaualugaina se lagona o le tagata i le va ma le Matai, ae o loo faatonuina mai lava i le Efeso mataupu e lima.” (*Ibid.* p. 170).

#### AUA NE’I FAASESEINA E SATANI

Ua tele ni faamatalaga taufaasese ua nunumi ai tele le mataupu o le mea e tupu i le tagata pe a ia maua le papatisoga a le Agaga Paia. E matuai mata’u ma fefe Satani i le tulaga lea pe afai e tupu le mea lenei i se tagata kerisiano. Na te iloa o le papatisoga e le Agaga Paia e motusia ai lona malosi mai le olaga o le tagata ua talitonu, ma avea ai lea tagata o se molimau ola mo Keriso ma faamuta ai foi le galuega a Satani i le lalolagi. O le mafuaaga lenei ua fai ai e le tiapolo soo se mea lava ina ia faanunumi ai le mataupu lenei, le malamalama ai foi le au kerisiano ma masalosalo ai.

“E matuai leai lava se mea e fefe ai tele Satani nai lo le avea lea o tagata o le Atua ma e latou te aveeseina mea o loo faalavelave i le auala e faaaogaina e le Atua e liligi ifo ai le Agaga Paia i luga o lana ekalesia. A tapenaina lea auala mo le Agaga o le Atua, ona maua mai ai foi lea o faamanuiaga. ” (*Review & Herald*, March 22, 1887).

O le mauaina foi o le Agaga e le faapea o le a oo ai loa i se tagata ni faalagona ua maua atu nai lo lagona ua masani ai lava le tagata faatuatua ia. E mafai lava ona saili ma tali mai le faatumuina o le tagata faatuatua i le Agaga Paia, ae le faalogoina se suiga i lea taimi. E faaali mai lava o Ia i seisi auala. Ae o se suiga e ono tupu i lea tulaga e amata tupu mai lea i se suiga mai totonu o le loto o le tagata faatuatua. O le a maua se malosiaga fou o le manumalo e auauna atu ai.

E finagalo le Atua e tuuina atu i lana fanau le matagofie o le papatisoga a le Agaga Paia. Ae a faapea la e fia mauaina ma tupu lea mea, e tatau lava ona tatou ole atu ma le faatuatua ma talitonu mautu lava na te faaeeina mai lenei lagona matagofie ma le lelei. E manaomia foi e tuu atu atoatoa tatou i le Atua.



“Ia aveese mai le loto o mea leaga uma ae faaavanoa mo le Agaga. O le faaali atu ma tuua le agasala, e ui i le tatalo ma le toe tuuina ato atu o le tagata mo le Atua, na avea ai le au uluai soo ma nisi ua sauni e talia le liligiina ifo o le Agaga Paia i le aso Penetekoso.” (*Testimonies to Ministers*, p. 507).

#### O NI MEA E TUPU IA I LATOU UA MAUAINA LE PAPATISOGA A LE AGAGA PAIA

O loo tele ni faamaumauga o ni mea na tutupu i le au kerisiano na saili ma mauaina le papatisoga a le Agaga Paia. E faapea le tala e uiga ia Ioane Uesele, o le muaau o le ekalesia Metotisi, na ia faasoa mai e faapea:

“Taluai ai lona lava le mautinoa i lona malosi faaleagaga, le fiafia ma le lagona faavaivai, na faamasani atu ai o ia i ni tagata kerisiano ua faatumulia i latou i le Agaga Paia, na mafai ona suia ai lona lava olaga i se auala faapitoa; o lea na filifilia ai e le alii o Uesele e saili foi e ia le faatumulia o ia i le Agaga.

I se tasi o se faatasiga na faalogo ai o ia i se faamatalaga sa faitauina mai e Matini Luteru e uiga i le suiga mai i totonu o le loto, ma ia faapea mai ai e mafaia ona tupu lea mea e le Agaga Paia i le loto o le tagata faatuatua. O le faatasiga lava lea na papatisoina ai Ioane Uesele i le papatisoga a le Agaga Paia. Na faamatala e ia se lagona ese na oo ia te ia i lea lava taimi i lona foi olaga faaleagaga. Fai mai a ia, “Na ou lagonaina se mafanafana ese lava i lona loto.” Na alu ese mai Ioane Uesele ma se vaaiga fou, se lagona e faamalosia ai lona fia galue mo le Atua, faapea ma se malosiaga fou. “E ui e le’i iloa e nisi o ia e oo mai i le taimi na tupu ai le mea lenei ia Uesele, na avea lenei mea ma faamalosiga na laugaina ai e ia ni mataupu fou na suia ai ni malo tetele se toatolu.” (*Living in Our Finest Hour*, p. 76-77).

“Ua avea kerisiano ma nisi ua nofo sala talu le le taliaina o le Agaga Paia, o le agasala talu le le salamo. Ae maise lava foi ona ua mauaina se malamalama fou, ua atili ai le tele o le sese ma le agasala.” (*Ibid.* p. 78).

Le tamaitai o Katerina Masele na ia tusia se tusi e faaigoaina “O le Tagata e Igoa Ia Peteru”, na tusia mai ai e ia e faapea:

“Na mana’o tele o ia ina ia maua e ia lea papatisoga. I le taimi lea, e leai nisi e faaee ni lima i luga o ia, o lea na matua’i lagonaina ai lava e ia se manaoga o mea alofa a le Agaga i se auala vave lava. Na ou iloa foi o le tatou taliaina o le tasi nei o meaalofa a le lagi, i se taimi vave lava, e le tatau foi la ona tatou faapea ua tatau foi e le lagi ona tali mai loa i tatou olega faatopetope faapea. O le tulaga lea ua tatou taumafai ai e faamoemoe i mea tatou te vaaia ae le o le faatuatua; ou te iloa e ui ina ou te le teena le moni o nei tulaga, ae tatau foi ona ou faaetete i le faapea o mea e tutupu ona o se lagona faagaetia ma maua i se taimi vave lava e faamaonia ai so’u papatisoga e le Agaga.”

“O le aso muamua sa leai lava se suiga o se lagona po se mea na tupu. Ou te le’i lagona se faatupulaia o ni lagona poo se fiafia fou. Ae ina ua oo i isi aso na sosoo ai, na matuai lagonaina ai loa le oo mai o le filemu i totonu o lo’u loto. O lea aso ma lea foi aso ua faaalua mai ai lava le maua o le fesoasoani mai le lagi, ma taitaia ai lo’u olaga.”

“...Na ia mauaina ai foi le mautinoaga o le faatasi mai o le Agaga e faamaualugaina ai le taua o le malosiaga e molimau atu ai le suafa o Iesu i isi. Fai mai a ia, ‘Ona ulu mai lea o le AGAGA i lo’u olaga tatalo ma faatonutonu foi lea tulaga. Na avea foi le Agaga o se faasino ala i a’u tusinga. I ni masina ma ni tausaga na mulimuli ane, na auaua’i lava ona pulea ma faatonutonu isi vaega o lo’u olaga, e iai le itu tau i le soifua maloloina, tulaga tau tamaoiga, o faaunauga o mea e atia’e o lo’u lava olaga, ae maise foi o le vaega mai a tagata ia te a’u. O lea ua ou iloa ai o le papatisoga a le Agaga Paia e le o se mea e na’o na tupu i se taimi e tasi, ae o se mea e tuputupu pea i lo’u olaga atoa.” (Ibid. p. 93).

Fai mai foi le tamaitai o Katherine, “O se ekalesia e le iloa ma le amana’ia le Agaga, o se ekalesia tete’e lea i le Atua.” (Ibid. p. 78).

Faasoa mai Dwight L Moody, se failauga ta’uta’ua lava e faapea:

“Ina ua faatumuina o ia i le Agaga Paia, o tulaga mautinoa lava, e ulufale ma tumau le Agaga i tagata faatuatua uma, ma o se mea mautinoa lava foi, e aofia ai ma le meaalofoa a le Agaga Paia o le auauna atu. O le meaalofoa lea e foliga mai e matua ese mai lava, e ese mai i le mautinoaga i le taimi e liua ai le tagata.” (Ibid. p. 87).

E pei la o ia molimauina i luga, o le papatisoga a le Agaga, atonu e le vaaia pe lagonaina ai se mea e tele e tupu i le tagata. Ae e faaali mai lava le Agaga i le tagata faatuatua i se auala faapitoa. O le mafuta mai o le Agaga i totonu o le tagata faatuatua e suia ai le ola o lea tagata mai totonu ma le loloto o le loto o lea tagata. E faaali mai ai lava le malosiaga o le manumalo ma le fia auauna atu. Ae a fia maua la lea papatisoga, e manaomia tatou te olega atu ma le faatuatua ma le talitonu na te foa’i mai. Ma e manaomia foi ina ia tatou tuuina atoatoa i tatou i le Atua. O se olega e le faataga fai na ona faataunuu i laugutu.

#### SAILI LE PAPATISOGA I ASO UMA

E tatau foi lava i le tagata ona faafou le faatumuina i le Agaga Paia i aso fai soo. E pei ona fai mai Paulo, “Ou te oti i aso uma” (1 Koronito 15:31). O le oti o le tagata ma le faatumulia i le Agaga o le mea e tatau lava ona tupu pea i aso uma. E le o se mea e na’o le tupu lava faatasi ona pau ai lava lea. Fai mai Paulo “ua faafouina lea i totonu i lea aso ma lea aso.” (2 Koronito 4:16). Tatou te manaomia lea faafouga mai le Agaga i o tatou olaga i aso uma. O le faatonuga a Paulo ina ia “faatumuina pea i le Agaga Paia” o se veape faitaga e faaauu pea (Efeso 5:18), ia faatumuina lea i aso fai fai pea. O lea tulaga e

taita'ina lava e le Agaga Paia. O lea foi na tusia ai e Paulo: "Aua o i latou uma ua taitaiina e le Agaga o le Atua o atalii i latou o le Atua." (Roma 8:14).

O se veape faitaga faaauau pea lea foi faamatalaga a Paulo. O lea la, ia tatou mauaina le Agaga i aso fai soo ina ia taitaiina ai tatou e le Agaga o le Atua, e pei ona Ia manaomia ai se tatou tali mautu. A tatou fia mauaina la le papatisoga a le Agaga Paia, e tatou foi la ona avea o se mea ia tatou faia pe a tatou alafa'i mai i taeao uma.

O Keriso o lo tatou faaita'i lea i mea uma lava. Ia maitau mai le tusitusiga a le tamaitai o Elena Uaita o loo faapea mai ai o ia e uiga i le papatisoga a le Agaga Paia:

"Na faafouina pea lona mauaina o le papatisoga a le Agaga Paia i aso uma. I le taeao segisegi lava e fagua ai o ia mai lana malologa, ona maua foi lea e ia o le faauuga o lona agaga faapea ona laugutu i le alofa tunoa ina ia mafai foi ona tuu atu ma faasoa atu foi i nisi." (*Christ Object Lessons*, p. 139).

#### O FAAMANUIAGA PE A MAUA LE PAPATISOGA

O le papatisoga a le Agaga Paia e maua ai le malosiaga e molimau atu ai ma maua ai foi fua o le amio a Keriso i le olaga o le tagata. I le faamatalaga atamai a Paulo ua faapea mai ai:

"A o i tatou uma , o loo vaavaai i tatou i le pupula o le Alii ma o tatou mata, e le ufitia, ua liua ai i tatou ua foliga i ai nai le pupula, faapei ona maua ai mai le Alii, o ia o le Agaga." (2 Korinito 3:18).

O le pupula o le Atua o lana amio foi lea (Esoto 33:18-19). Fai mai Paulo o le tagata ua talitonu e tupu o ia i le amio a Keriso "mai le pupula i le pupula", ona o le Agaga o le Alii ua mau i totonu ia te ia.

O le faatumulia i le Agaga o le Atua o le a "faatoatoaina ai outou e ia i galuega lelei uma lava, ina ia outou faia lona fimgalo, ia galue o ia i totonu ia te outou le mea e malie i ona luma ona o Iesu Keriso, ia ia te Ia le viiga e faavavau, faavavau lava" (Eperu 13:21).

Na toe faamautuina foi e Elena Uaita le atina'e o le amio o le ua faatumuina e le Agaga, e faapea:

"A pulea loa e le Agaga o le Atua le loto o le tagata, o le a suia loa lea o lona olaga. Ua tuueseina mafaufauga agasala; ua le o toe fia faia ni uiga leaga, ae o le alofa, loto maualalo, ma le filemu ua suia ai le ita, matau'a, ma le olaga faavevesi mea. E suia le olaga faanoanoa e le ola fiafia, ma o le olaga e atagia mai ai le malamalama o le lagi." (*Desire of Ages*, p.173).

#### E MAFAI ONA TATOU FAIA MEA E FAANOANOAINA AI LE AGAGA

E mafai ona tatou faia mea e faanoanoaina ai le Agaga (Efeso 4:30). A tatou le saili ia te Ia i aso fai soo, ma mulimuli i le mea e taitaiina ai i tatou, e fai ifo lona malosi ma vaivai ai lo tatou olaga faakerisiano.

E le faamalosi i tatou e le Atua. E tele lava le aafiaga o o tatou olaga pe a tatou maua le papatisoga a le Agaga Paia. Tatou te lagonaina lona faamalosi mai. E maua lava le faamalosi a le Agaga i aso uma ina ia tatou usiusitai ai i le Atua. O le a valaauina foi tatou ina ia suesue le afioga a le Atua faapea ma le agaga o le tatalo atili ai pea. O lona Agaga e mafua ai ona tatou mananao e alolofa i le amiotonu ma inoino i le agasala. Ae paga lea, ua ia i tatou foi le saolotoga e teena ai musumusuga a le Agaga o le Atua. A tatou faia lea mea, ona amata lea o le tulaga ua tatou teena ai ma faa-faanoanoa le Agaga.

E tele lava ni fautuaga a Paulo ua tuuina mai ina ia aua ai ona tatou oo i lea tulaga pe faia foi lenei mea i le Agaga. O fautuaga a Paulo ua tuuina mai i le tagata kerisiano e fesoasoani lea ina ia maua ai le atoatoaga o le taitaiga a le Agaga i o tatou olaga. E pei foi ona fai mai o ia i le tusi o Efeso e faapea:

“O lenei, ia outou tuu ese le pepelo, ia tautalatala faamaoni taitasi ma le la te tuaoi; aua o itu tino lava i tatou o le tasi i le tasi. A outou ita, aua le agasala ai; aua ne’i goto le la o ita pea outou. Aua foi ne’i tuuina atu e outou se mea e mautu ai le tiapolo. O le gaoui aua ne’i toe gaoui, a e lelei ina faamalosi o ia i galuega a ona lima i mea aoga, ia maua e ia se mea e avatu i e ua matitiva. Aua ne’i alu atu se upu leaga ai o outou gutu, na o le upu lelei e ati a’e ai mea aoga, e tupu ai le lelei i e faalogologo iai. Aua foi tou te faatiga i le Agaga Paia o le Atua, ua faamaufaaailogina ai outou ia te ia, seia oo i le aso e faaolaina ai. Ia te’a ma outou upu faafiufiu uma lava, ma le lotoa, ma le ita, ma le leo tele, ma le upu faaleaga, atoa ma le loto leaga uma lava. A ia outou feagaleleiai, ia femutimutivalea’i lo outou alofa, ia fefaamagaloi outou, faapei ona faamagaloina outou e le Atua ia Keriso.” (Efeso 4:25-32).

“Matou te aoi atu foi ia te outou, le au uso e, ia outou apoapoai atu i e amio faatalanoa, ia faamafanafana i e loto iti, ia fesoasoani i e o vaivai, ia outou onosai i tagata uma lava. Ia outou, ne’i tau atu e se tasi le leaga i le leaga i se tasi tagata, a ia outou tausisi e le aunoa i le mea lelei, o le tasi i le tasi, atoa ma tagata uma lava. Ia outou saga olioli pea lava; ia tatalo e le aunoa; ia outou faafetai i mea uma lava, aua o le finagalo lea o le Atua ia te outou, ia Keriso Iesu. Aua tou te tineia le Agaga.” (1 Tesalonia 5:14-19).

Na iloa lelei lava e Paulo a mafuta le Agaga o le Atua i le loto o le tagata talitonu, o le musumusuga lea e faia ai e ia mea lelei uma. A le talia lea musumusuga, o lona uiga, o le a tatou faafiufiu i le Agaga Paia.

A e faalogoi’fo ua e faafiufiu i le Agaga, aua le faanoanoa ai. Ae ole atu i le Atua ia faamagaloi mai oe (1 Ioane 1:9); e faia lava e Ia le faamagaloina o oe. Ona e fesili atu lea ina ia faafouina oe e lona Agaga, ma e tali mai lava o Ia (Luka 11:13). Ole atu ma lou faatuatua, ona e mauaina lea (Kalatia 3:14).

Na iloa lelei e Tavita le alofa tunoa o le Atua. Na faia e ia le agasala o le fasioti tagata ma le mulilua. Na fultua o ia i le musumusuga a le Agaga o le Atua i lona olaga ae faia e ia nei agasala tetele lava. Ae ina ua ia iloa le leaga o nei mea ua ia faia, na tuuina atu o ia i le Atua e ui i le tatalo. Maitau upu nei:

“Ia alo Ou fofoga i a’u agasala, ma ia e soloiesea a’u amioleaga uma. Le Atua e, ia e faia se loto mama mo a’u; ma ia e faafouina se loto mau i totonu ia te a’u. Aua e te lafoaina a’u i ou luma; aua foi e te aveeseina lou Agaga Paia ia te a’u. Ia faafoisia mai ia te au le olioli o le olataga mai ia te oe; ia e taofimauiina foi a’u ma le loto fiafia.” (Salamo 51:9-12).

A tatou iloa ua tatou tau mamao mai le Atua, aua nei toe faama’imauiina se taimi ae saili loa le faamagalona a le Atua, ma ia ole atu mo le folafolaga o le faafouga a le Agaga o o tatou olaga, e pei foi ona faia e le auauna o Tavita. O le tulaga lea e foaina mai ai lava le manumalo i mea leaga uma ua faia e Satani i o tatou olaga. (Efeso 3:16-19).

O loo tatou auauna i se Atua alofa. Afai ua tatou se ese, ia tatou manatua:

“E alofa mutimuti vale ma alofa fua mai le Alii; e telegese lona toasa, a e tele lona alofa. E le aoai mai pea lava Ia; e le faamoemoe foi lona toasa e faavavau. E le faia e Ia ia i tatou e tusa ma a tatou agasala; aua e pei ona maualuga o le lagi i le lalolagi, e faapea ona tele o lona alofa i e matata’u ia te ia. E pei ona vava mamao o sasae ma sisifo, e faapea lava ona faamamao e Ia ia i tatou o a tatou solitulafono, e faapea lava ona alofa mutimuti vale o le Alii i e matatau ia te ia.” (Salamo 103:8-14).

#### IA TATOU MAUA LE ULUAI UAGA INA IA MAUAINA LE UAGA MULIMULI

Ua tatau ona oo mai le uaga mulimuli. Afai tatou te le mauaina le uluai uaga, le faatumulia lea o i tatou i le Agaga (Ioelu 2:23), ona le saunia lea o i tatou e maua le galuega a le uaga mulimuli. Ou te talitonu o loo galueaina e le Atua ona tagata ma taitaiina i latou ina ia latou maua leni lagona matagofie ua na o le le Agaga Paia e maua mai ai. Ua fautuaina mai e le tamaitai o Elena Uaita lea tulaga:

“A ua faamalieina ma nofoa’i tagata i le upu Moni, ae le saili le galuega a le Agaga o le Atua i aso fai soo i o latou loto, e iloa lea i le suiga o amio, o loo faamamaoina i latou mai le tapulaa e agavaa ai latou e faia le galuega a le Atua ma le faamaoni. E avea i latou ma ni leoleo le faamaoni i pa o Siona; aua ua faatauasoina i latou mai le galuega e tatau ona latou faia, ma e le iliina foi le pu i le leo e tatau ai.

“O le papatisoga a le Agaga Paia e pei ona molimauiina i le aso Penetekoso o le faafouga lea o le tapuaiga moni, faapea ai ma le faatinoina o galuega lelei uma. E maua le atamai faalelagi e tautatala mai ai i le gagana faalelagi. A faapea foi e galueaina e le Alii loto o tagata e pei ona ia faia e amata mai i le aso Penetekoso, atonu foi o le a toatele nisi o i latou e pei ona iai nei, ua fai mai ua latou iloa le mea moni ae latou te le malamalama i le auala e galue ai le Agaga Paia, ma fai mai ai,

“O tagata ia ua faatumulia i le uaina fou.” ‘Ua le o toe mamao le taimi e mana’omia ai e tagata se mafutaga vava lalata ma Keriso, se fesootaiga vava lalata ma le Agaga Paia, se sootaga e le’i iloaina muamua lava. Ae paga lea, e le maua lenei sootaga, vagana ai ua tuu atu atoa o latou loto ma o latou ala i le finagalo o le Atua ma ona ala. O le agasala lea fai mai o oe o le kerisiano ae e le tatalaina lou loto i le Agaga Paia. A faaali le naunau ia Keriso ma saili ina ia tasi ma Ia, ona faaetete foi lea aua e mafai ona avea lea ma mea ua matele ai ina ua maua ai le amio faa-fiaatua. A o ifo agelu a le lagi e mafuta ma i tatou, e tatou lava ona iai se liuga mautu e pei foi o liuga na tupu i le aso Penetekoso.

“Le au uso e, ia faaeteete ina ia aua tatou te taumafai e soona ave a’e le tulaga tapuai o le tagata i se maualuga ona o lagona o le taimi nei lava. Aua le avea i tatou ma i latou e mafua ai ona fesiligia ma masalomia le galuega a le Agaga o le Atua; aua e iai lava i latou e faitioina le taimi e pulea ai e le Agaga o le Atua le tagata ae le vaaia se suiga matautia ma iloa gofie atu ona o le eseeseaga o le auala e talia ai e le tagata le Agaga. (Letter 27, 1894, *Selected Messages*, Vol. 2, p. 56-57).

Afai e te le’i mauaina le papatisoga a le Agaga Paia, aua le faatuai nei, i le aso nei lava. O le taliaina o le papatisoga a le Agaga Paia ia avea o se mea e faamuamua i o tatou olaga. O le meaalofo e ala mai ai faamanuiaga o isi uma lava meaalofo e pei ona folafola mai mo i tatou. O le faatumulia o o tatou loto e le Agaga Paia e suia ai o tatou tagata e faaali atu foliga fiafia, o vaivai o le a avea ma malosi, o le tatou molimau atu foi o le a iai le malosi e pei lava ona molimauna i le aso Penetekoso.

#### O LE TAPENAGA MO LE TOE AFIO MAI O KERISO

Ina ia mau tapena i tatou mo le toe afio mai o Keriso, e tataua lava ona mauaina e i tatou le papatisoga a le Agaga Paia (Ioane 14:16-18, 1 Ioane 3:24). A tupu lenei mea, ona taitaina ai le o i tatou e faatusa e pei lava o Keriso i totonu o tatou olaga ma le auunaga mo Ia. O le faatumuina o tatou loto i le Agaga, o se mea e le taumateina lea tulaga mo i latou uma lava ua sauni e faatali mo lona toe afio mai. O se mea e tataua lava ona tupu. O le mea lea, o la’u tatalo mo i latou uma lava e faitauina lenei tusi, ina ia tupu pea le mea lea, o le faatumuina o le loto i aso fai soo i le Agaga Paia. Ia avea le papatisoga a le Agaga Paia o se mea mautu i le olaga o le kerisiano ina ia tatou maua le faatuatua e manumalo ai i taimi o faigata, ma sauni atu ai e talia lona toe Afio mai.

E matua’i leai lava se tasi mea e mafai ona aveesea mai ai tatou mai le tulaga faapalapala, le lagona faavaivai, le lagona ua tau leai se faatuatua, poo tulaga faa-Laotekaia, ae sauni atu mo aso faigata ma le toe afio mai o Keriso. Ua faamaonia mai e Elena Uaita e faapea:

“Ua na o le papatisoga lava a le Agaga Paia e tuuina i luga le ekalesia ina ia faasa’o ai lona tulaga, ma sauni ai ona tagata e faafeagai ma faafitauli o aso mulimuli o le a loluti mai” (Letter 15, 1889, Dr Burke).

O la'u tatalo, ia tatou faatauaina faatonuga ua tuuina mai e le Atua mo i tatou. Afai e te le o saili ma le loto atoa le folafolaga lea o le papatisoga a le Agaga Paia i aso uma, aua ia le toe faatali nei, ae saili loa ia faamanuiaga. O uluai faamanuiaga e maua mai pe a faatumulia tatou i le Agaga Paia e maua ai uma lava isi faamanuiaga e pei ona folafola mai, ma taitaiina atu ai i tatou ina ia maua le filemu mai le Alii o Keriso Iesu.

#### FESILI E FAATALATALANOAINA

1. E faapefea ona faafaigata e satani le galuega a le Agaga Paia?
2. O a nisi faaupuga e aveina i le papatisoga a le Agaga Paia?
3. O anafea na tupu ma avanoa ai le papatisoga a le Agaga Paia mo tagata kerisiano?
4. Se'i lisi mai ni mea na tutupu ia Iesu e faaali mai ai foi mea e mafai ona tutupu ia i tatou?  
Luka 1:35  
Luka 2:52  
Luka 3:21-22  
Luka 4:1-13  
Luka 4:14
5. O le papatisoga a le Agaga Paia o se mea lea e tatau ona maua e le tagata faatuatua pe ua na o se mea e pule lava le tagata pe manao iai pe leai?
6. O le a se mea e tasi e tupu i le tagata faatuatua pe a ia maua le papatisoga a le Agaga Paia? 1 Ioane 3:24
7. O a galuega ua fai mai Iesu e faia e latou e mulimuli atu ia te Ia? Ioane 14:12
8. Lisi mai nisi o galuega na faia e Iesu lea na faia foi e le au aposetolo.  
Galuega 2:46-47; 5:15-16
9. Na mauaina ea e le au faatuatua i Samaria, faapea Paulo ma le au faatuatua i Efeso, le papatisoga a le Agaga Paia ina ua papatisoina i latou i le vai? Galuega 8:12-17; 9:17-18, 19:1-6
10. O le a le auala na maua ai e le au faatuatua le papatisoga a le Agaga Paia ina ua mavae le aso Penetekoso? Galuega 8:12-17; 9:17-18, 19:1-6
11. E iai ea se eseese o le papatisoga i le vai ma le papatisoga a le Agaga Paia?
12. E manaomia lava ina ia faae'e lima mo se tagata ina ia mauaina le papatisoga a le Agaga Paia?
13. O le a le taua o le papatisoga a le Agaga Paia e pei ona faamamafaina mai e Elena Uaita?
14. I le faamatalaga a LeRoy Froom, aisea e manaomia tele ai lava le papatisoga a le Agaga Paia mo le kerisiano i aso o le i'uga?
15. O le a le mea e pito i fefe ai lava Satani?
16. O le a se mea e ao ina tatou faia ina ia tatou maua ai le papatisoga a le Agaga?

17. E faafia ona tatou saili le papatisoga a le Agaga Paia? Efeso 5:18
18. O a ni faamanuiaga e maua mai i le papatisoga a le Agaga Paia?
19. Lisi mai ni mea ua lapata'i mai ai Paulo e mafua ai ona faanoanoa ma fiu ai le Agaga Paia. Efeso 4:25-1 Tesalonia 5:14-19
20. Afai ua tatou iloa ua tatou faafiufiu i le Agaga Paia, o le a la se tatou mea e fai? 1 Ioane 1:9
21. O le a le mea na fai mai ai Elena Uaita o le a faia e le toatele pe a galue le Atua e pei foi na Ia faia mo i latou na iai i le aso Penetekoso?

#### TALOSAGA FAAPITOA

- Tatalo i le Atua ina ia:
  - Papatisoina oe e lona Agaga
  - Tausia oe ina ia aua e te faafiufiu i le Agaga Paia e ala i ou mafaufauga, o upu ma mea e te faia
  - Faamanuia i latou uma lava o loo i lau lisi tatalo



# ASO LONA LIMA MAUAINA ATOATOA KERISO

Afai e mauaina e le tagata faatuatua le papatisoga a le Agaga Paia, ua atoatoa foi lona mauaina o Keriso i lona olaga. Na uluai ta’u mai lava e Iesu lea tulaga ina ua ia folafola i lona au soo o le a Ia auina mai le “Fesoasoani” e mafuta ma i latou (Ioane 14:16). O le Agaga Paia lava lea. Toe fetalai mai ai lea o Iesu, “ou te ia te outou” (Ioane 14:18). O le mafuaaga lea, e ala i le papatisoga a le Agaga Paia, o le afio mai foi lea o Iesu e mafuta ma faatasi ai ma ona tagata. O le faatumulia o le tagata i le Agaga, o le ala lea e mafuta mai ai Iesu ma soifua faatasi ma ona soo uma lava (1 Ioane 3:24).

## E AFIO IESU I TOTONU O TAGATA FAATUATUA UA FAATUMUINA I LE AGAGA

Ua ta’uina mai e Ioane e faapea o le kerisiano o loo soifua ma ola pe a afio mai Iesu o le a pei o Ia (1 Ioane 3:2). E faapefea la ona tatou pei o Ia? O le faapei ai o Ia, e manaomia lava lea ia maua le papatisoga e le Agaga Paia o tatou tagata i aso taitasi, ona ola foi lea o Keriso i totonu o o tatou tagata. E pei ona fai mai Paulo:

“Ua faasatauroina faatasi i maua ma Keriso; ou te le toe ola a’u, a o Keriso o loo ola i totonu ia te a’u; o le ola foi ou te ola ai nei i le tino, ou te ola ai lava i le faatuatua i le Alo o le Atua, o le na alofa mai ia te a’u, ma foaiina mai o Ia e Ia mo a’u” (Kalatia 2:20).

E ala mai i le faatumulia o i tatou i le Agaga Paia, o le afio foi lea o Keriso i totonu o i tatou taitoatasi. E pei o se siitaga i luga, o le tagata talitonu ua faatumulia i le Agaga Paia, ua ia te ia foi le “faatuatua ia Iesu”. Aisea? Aua ua soifua Keriso i totonu o i latou.

O le tagata talitonu ua faatumulia i le Agaga ua ia te ia foi le mafaufau o Keriso (1 Koronito 2:16, Filipi 2:5). O loo iai uiga faa-Keriso i mea e mana’o pe le mana’o ai foi, o le alofa i le amiotonu faapea le inoino i le agasala e pei ona iai ia Keriso. O le a iai le faanaunauga ina ia usita’i i le Tama, e pei foi o Iesu (Salamo 40:7-8), ae maise le alofa i agaga, e pei lava o Keriso lava ia (Luka 19:10). Fai mai Paulo o le poto, amiotonu, ma le faapaiaina o Keriso e mafai foi ona maua e i latou (1 Koronito 1:30); o uiga ma tulaga maualuga uma lava o Keriso e fai mo latou na. E avea i latou e faapei o Keriso i lea aso ma lea aso a o suia latou ia faapei o Ia, “ua foliga i ai nai le pupula e oo i le pupula, faapei ona maua ai mai le Alii, o Ia o le Agaga” (2 Koronito 3:18).

A soifua Keriso i totonu o le tagata faatuatua e ala lea i le faatumuina i le Agaga e maua ai le amio a Keriso i le tagata lea. E fua mai fua o le Agaga Paia pe a nofo mau le Agaga i totonu o tatou olaga (Kalatia 5:22-23). O fua ia o le a suia ai amio ma olaga pe a pulea o tatou ola e le Agaga, i tulaga uma lava e oo iai o tatou olaga (1 Ioane 3:2). Faapea mai foi Elena Uaita:

“O le usitai faamaoni lava e afua mai i le loto; e galue i le loto faatasi ma Keriso. Afai tatou te talia, e iloa lava Ia i o tatou mafaufauga ma manaoga; o lea ia faaogatasi ia o tatou loto ma mafaufauga ma lona finagalo, ona avea lea o i tatou o nisi ua pulea e Ia. O faanaumauga uma o le a taula’i ma faamaualugaina ai le faia o lona finagalo faapea lana galuega. A tatou iloa le Atua, o se faamanuiaga lea; e avea foi tatou o nisi e ola usiusita’i. A tatou talia le amio faa-Keriso, e ala lea i le sootaga ma le Atua, ona tatou inoino lea i le agasala” (*Desire of Ages*, p. 668).

O faatinoga o le papatisoga a le Agaga Paia e faataumuina ai le folafolaga a Keriso e faapea e faia e le au faatuatua galuega na ia faia, ma e tetele atu foi mea latou te faia (Ioane 14:12). E faaogaina e Keriso le tagata faatuatua na te faia galuega e pei foi ona ia faia ao femaliua’i i le 2000 tausaga talu ai. E mafaia lea mea pe a maua e le kerisiano le papatisoga a le Agaga Paia, ma savali ai pea i ala o le Agaga. E maoa’e foi galuega ma mea e faia e le au faatuatua talu ai ona ua maua atoatoa Keriso. O le molimau atu i le lalolagi, o le faatinoga lava lea o le olaga o Keriso. O le a avea ai i tatou o fofoga, o lima, ma vae e faia ai galuega sa Ia faia; o le lauga atu, a’oa’o, faamalolo, tutuli temoni, ma isi lava mea sa Ia faia.

O le faatinoga atoatoa “o atalii o le Atua” o loo faatalitali mai ai o Ia. (Roma 8:19). A tupu loa mea nei, o le a faapupulaina atu ai loa i le lalolagi atoa le uiga moni o le Atua i lona mamalu, ona oo mai loa lea o le iuga o le lalolagi (Faaaliga 18:1).

#### O LE AMIO A KERISO MA GALUEGA UA FAAALIA MAI AI

O le faaaliga o le amio a Keriso, faapea ma galuega sa Ia faia, o le a ata mai lea i le olaga o le au faatuatua uma lava pe a latou mauaina le papatisoga a le Agaga Paia, ma faaauau ai pea le savaliga ma faamanuiaga o lea papatisoga. O le mafuaaga foi lea ua mautinoa ai faailoga e iloa mai ai mea e mafai ona tupu e pei o le faamalolo o ma’i poo le tulieseaa o temoni (Mareko 16:15-18). Ua tatou molimauina le faamaoni o fetalaiga a Iesu e amata mai lava i le aso Penetekoso e oo mai i ona po nei. Na faaaliga ona uiga e i latou uma lava na mauaina le faatumulia i le Agaga Paia (Galuega 2:46-47). Na faitau afe ma afe i latou na liua mo Keriso a ala i le laugaina o le tala lelei, ma faamalolo ai foi ma’i (Galuega 5:15-16).

O le galuega matagofie a Keriso na faaauau lava mo ni nai senituri amata o le au kerisiano. Ae ina ua pa’u ifo le aso pogisa i luga o le ekalesia a ala lea i le tele o ni aoaoga sese sa talia ma faaoga faasolo e le ekalesia, na le toe maua ai foi le malosiaga e le ekalesia. O tausaga o le tetee o le Atua moni na

avea ma faavaivaiga foi i le tino o Keriso. Ua lilo uiga moni o Keriso ma vaivai foi suiga o olaga o tagata, ma le toe iai ma ni faamalologa. O se vaitaimi ua oge ma matelaina le faaleagaga a le au kerisiano.

E le sao pe mamao foi le au kerisiano o nei ona po mai lea tulaga. E pei ona faailoa mai e le Atua i le feau mo le ekalesia i Laotekaia, o lea galala e tupu foi i le ekalesia o ona po nei, le mou atu lea o le faaaliga o uiga moni o le olaga o Keriso (Faaaliga 3:14-22). A o le mea e sili ai le leaga, o le le iloa lea o mea e vaivai ma faaletonu ai. E manatu lava ia ua lelei le mea ua ua iai, o le tau mafanafana poo le tau maalili; ua manaia lava le nofonono i le tulaga faaleogolua. E tataua ona toe faavevela le ekalesia ma ia mumu pei o se afi mo le Alii. O ai ua manaomia le afi ia mumu ai mo le Alii? O Ioane le Papatiso na ia valoia mai o Iesu na te papatisoina i le Agaga Paia ma le afi (Luka 3:16). O le papatisoga a le afi o le Agaga Paia ua na o le pau lava lea o le faamoemoega mo le ekalesia a Laotikaia.

A faaososoina le tagata faatuatua ua faatumuina i le Agaga Paia, e mana'o Keriso ia atagia mai le olaga manumalo. A oo mai faaososoga, o le ki o le manumalo o le liliu lea o le mafaufau o le kerisiano mai le faaososoga ma fesiligia Keriso ina ia faali mai lona manumalo ia toilalo ai ia faaososoga. Ia taula'i atu pea le vaai ia Keriso mo lea manumalo (Eperu 12:1-2). E pei foi ona fai mai le isi upu: "A tu'itu'i mai satani i le faitotoa o lou loto, auina ane Iesu e tatala le faitotoa"

#### E MANA'O KERISO E ULUFALE MAI I TOTONU

O le ata o Iesu o loo tu ma tu'itu'i le faitoto'a, ua faali mai ai le faanaunauga e fia ulufale mai o Ia i le loto o le ekalesia i Laotekaia ina ia avea Ia o se vaega tele lava o le au faatuatua e fo'ia ai faafitauli uma o loo feagai ai pea ma le ekalesia. O le afio o Keriso i totomu o o tatou loto e ala lea i le faatumuina o tatou i le Agaga Paia. O le feau lea a Keriso ia Laotekaia, o le valaau ina ia maua le papatisoga a le Agaga Paia, ona ofi mai lea o Keriso i o tatou olaga.

A maua e kerisiano o aso mulimuli nei le papatisoga a le Agaga Paia, ma savavali pea i aso uma ma Ia, o le a vaaia loa se faafouga ma le toe fuata'ina o le ekalesia. O uiga lelei uma o Keriso o le a vaaia foi i ona tagata. O le a faali foi lona finagalo ma le feau mulimuli a le Atua i se auala ma le malosiaga e le'i vaaia muamua lava. E maoa'e foi ni faailoga o le a faaaliga. Na tautala Elena Uaita e faatatau i le taimi lea e faapea:

"I faaaliga i le po, na ou vaaia ai ni foliga o se toe fuata'ina o le a tupu i tagata o le Atua. Ua faamalolo ma'i, ma le tele lava o isi vavega ua tupu. Na ou vaaia foi le tele o talosaga ua molia, e pei lava ona faia a'o lumana'i ai le Penetekoso...ua suia loto e le malosiaga mai le Agaga Paia" (*Testimonies to the Church*, Vol. 9, p. 126).

O le taulaiga lava o talosaga a tagata o le Atua ina ia maua atili Iesu, faateleina le faatumulia e le Agaga Paia. O le faanaunauga maualuga lava o le suia lea o loto; ia aua le matele i le vaai i agasala ma mea e to'ilalao ai, ae

olega ia “iloa o Ia” (Filipi 3:10). O le faanaunauga matagofie o le iloa lea o le manumalo ia Keriso. O le “iloa” lea e auala mai pe a faatumulia le kerisiano e le Agaga Paia.

E faaumaina lava e Keriso lana galuega i le lalolagi. Ua valaauiina i tatou tatou te molimauina le faaumaina o lea galuega i aso mulimuli. Ae pau lava le mea tatou te faia o le galulue faatasi lea ma Keriso, e ui lea i le faaogaina o i tatou e le Agaga Paia. O le mea lava lea na aunagi mai ai Paulo ina ia “faatumulia i le Agaga” (Efeso 5:18).

I la’u tusi o le “Papatisoga a le Agaga ma Faatala’iga”, o loo faamatala mai ai le taua o le sootaga vava lalata o le papatisoga a le Agaga Paia ma le molimau atu mo Keriso. Ia manatua, o le tagata talitonu ua faatumulia i le Agaga Paia na te maua mea taua lava na ia Keriso foi, o le naunau e usiusita’i i le Atua, faapea le naunau e saili ma faaola le agaga ua leiloa.

#### FESILI E FAATALATALANOA

1. O le a le mea e tupu i le olaga o le tagata faatuatua pe a ia maua le papatisoga a le Agaga Paia? Ioane 14:17-18; 1 Ioane 3:24
2. A toe afio mai Iesu, o ai o le a soo iai le au faatuatua? 1 Ioane 3:2
3. E faapefea se faamatalaga a Paulo e uiga i lona va mafuta ai ma Iesu? Kalatia 2:20
4. E faapefea ona maua le manumalo e le kerisiano ua faatumulia i le Agaga?
5. O faanaunauga o ai o le a atia’e e se tasi ua faatumulia i le Agaga Paia? Filipi 2:5
6. O a moomooga ma faanaunauga se lua na ia Keriso o le a mauaina e le kerisiano ua faatumuina i le Agaga? Salamo 40:7-8; Luka 19:10
7. O a nisi mea lelei na faaalua e Iesu o le a maua foi e le tagata faatuatua ua faatumuina i le Agaga? Kalatia 5:22-23
8. Faapefea ona faamatalaina e Elena Uaita suiga e tupu i le tagata faatuatua pe a na maua le papatisoga a le Agaga Paia?
9. Fai mai Iesu o a mea o le a faia e i latou e mulimuli atu ia te Ia? Ioane 14:12
10. O le a se faamatalaga a Paulo e faatatau ia i latou ua faataga Iesu e nofo mau ma ola ai e ui i le papatisoga a le Agaga Paia, ma faaoga i latou e auaina atu ai i isi? Roma 8:19
11. O le a le mamalu o le Atua? Esoto 33:18-19; 2 Koronito 3:18
12. O a faailoga o auunaga na fetalai mai ai Iesu e maua e le au faatuatua ua faatumulia i le Agaga? Mareko 16:15-18
13. O le a le mea na tupu ia Paulo e faamaonia ai le tonu o upu a Iesu? Galuega 28:3-6
14. Na faamaoni ea le valoia e Iesu o le a faamalolo ma’i e i latou ua faatuatua? Galuega 5:15-16

15. O le a le mea na tupu i le ekalesia kerisiano na latou faatagaina le faamutaina o vavega?
16. O le a le toe faamoemoega lava a le kerisiano i aso mulimuli nei ina ia latou o ese mai ai i le tulaga faigata faa-Leotikaia?
17. O le a le mea o loo faamatalaina mai o loo faia e Iesu a’o lapata’i mai le Atua i le tulaga o Laotekaia? Faaaliga 3:20
18. E faapefea ona tatala atoatoa e kerisiano faa-Leotekaia o latou loto ae faataga Keriso i o latou olaga? 1 Ioane 3:24
19. O le a foi se faamatalaga a Elena Uaita e faatatau i kerisiano faa-Laotekaia, pe a latou maua le papatisoga a le Agaga Paia ma faataga Iesu i o latou loto?
20. Mo le kerisiano ua faatumulia i le Agaga Paia, o le a se faanaunauga maua lava a lea kerisiano? Filipi 3:10
21. Aisea e faatauaina ai le “iloa” o Keriso? Ioane 17:3
22. O le a le fetalaiga a Iesu mo i latou e le’i sauni e feiloa’i ma Ia pe a toe afio mai? Mataio 7:23; 25:12
23. O le a le faatonuga a Paulo ia faia e kerisiano uma? Efeso 5:18

#### TALOSAGA TUU SA’O

- Talosaga i le Atua ina ia:
  - Papatiso oe e le Agaga Paia
  - Atagia Keriso i lou olaga
  - Faamanuia i latou uma lava o loo i lau lisi tatalo

# ASO LONA ONO USIUSITA'I MAI LE LOTO

E lua lava mafuaaga e ao ai ona faatumulia le tagata e le Agaga Paia: ia atagia ma faaali atu ai Keriso i lona olaga (1 Ioane 3:24; 2 Koronito 3:3), ma ia maua le malosiaga e molimau atu ai (Galuega 1:8). I la'u tusi o le Papisoga a le Agaga ma le Molimau Atu, o loo faamatala atu ai le sootaga o le papisoga a le Agaga ma le malosi e molimau atu ai. O le talanoaga la o le aso lenei, o le a tatou su'esu'eina le mafuaaga muamua; o le faaali ma atagia atu lea o le amio a Keriso i o tatou olaga.

## O IESU MA LE TULAFONO E SEFULU A LE ATUA

E le mafai ona tuu eseeseina Iesu ma le tulafono a le Atua. I le ma lea, o Iesu lava, a'o le'i fanau mai i le lalolagi, na ia tuuina ia Mose tulafono e sefulu. O le Atua lava lea na faaali ia Mose "O A'u o le Ola" (Esoto 3:14). Na ta'uina mai foi e Iesu "O A'u o le Ola" o le feagaiga tuai (Ioane 8:58). A faatusatusa atu le 1 Koronito 10:1-4 ma le Neemia 9:12-14, e manino lava o Keriso lava lea na alu ifo i le ao i luga o le Mauga o Sinai ma feiloai ai ma Mose.

Na iai foi le Agaga Paia i le taimi na tuuina ai le papa maa o le tulafono ia Mose. O le mea moni lava, o le Agaga lea na ia tusia tulafono e sefulu i luga o le papa maa. E manino le mea lea pe a tatou faatusatusa fetalaiiga a Iesu lea na faapea mai ai o le "a'ao o le Atua" o le "Agaga o le Atua" lava lea (Mataio 12:28, Luka 11:20). O lea la, o le Agaga Paia lea na Ia tusia le tulafono e sefulu i luga o le papa maa na tusia foi le tulafono a le Atua i loto o fanau a le Atua ua faatumulia i le Agaga (2 Koronito 3:3).

Na valoia mai e Isaia faapea o le Mesia na te faamaninoina le tulafono, (Isaia 42:21). O lea na soifua ai Iesu ma ia faataitai lona soifua ola i le tulafono; faamausali ai lona faanaunauga e faataunuu manaoga o le tulafono, ae le o le faaleaogaina lea o le tulafono (Mataio 5:17).

E lua lava ituaiga usiustai e ola ai le kerisiano faamaoni. Muamua o le a ta'ua o le usiustai mai fafo. O le usitai lea e tupu pe a faatino le tausiga o le tulafono ona e faapea ua fai le Atua e usitai iai. A'o le isi usitai o le tausi lea o le tulafono ae le o sau mai le loto. O le usiustai lea e tupu ona o le faanaunauga loloto o le tagata talitonu ia usitaia le Atua. O le usitai mai fafo e

aunoa ma le usitai mai i le loto e le o se mea e talia e le Atua (Salamo 51:16-17; Mataio 15:8).

Sa ou tau i se faataitaiga o le tulaga lea i ni nai tausaga ua levaleva atu ina ia faaata mai ai le eseese o le usiusitai mai fafo faapea le usitai e ala mai i totonu o le loto. Faapea la ua maliu lo'u tama, ma ua ou le mautinoa pe ou te nofo faanoanoa i le mea ua tupu. Ona ou alu lea ma fesili i se uo mo sana fautuaga. Ua ma faasoa pe o le a ou faia se faanoanoaga pe leai. Ona fai mai ai lea o la'u uo; "E tatau ona o ia o lou tama, ma o oe o lona atalii. O le mea lea e tatau ai ona e faanoanoa ai i lona maliu." Ona o le fautuaga lea, ua amata ai loa ona ou faanoanoa. O lea la ua faamaonia ua ou faanoanoa, ae ailoga o se mea mai lo'u loto, atonu o se mea mai fafo, lo'u faanoanoa talu ai ona o se mea e tatau lava ona ou faanoanoa la aua o a'u o le atalii. O le faanoanoa moni lava e sau mai le loto. E faamaoni lava le faanoanoa ia pe a sau mai le loto. E faapea foi le usiusitai i le Atua. A sa'o le mafutaga ma le Atua e ui lea i le faatumulia i le Agaga; e faatupuina lava le usiusitai mai le taele o le loto e aunoa ma tau mafaufau iai. E oo mai lava faaososoga ia aua le usiusitai. Ae e tanumia lava ia lagona ona o le malosi atu o le faaunauga ua tuuina e le Atua i le loto o le tagata ina ia usitai ai.

I le feagaiga tuai o loo folafola mai ai e le Atua e "faia e le Atua se loto fou" mo lana fanau, ma mafua ai ona latou savavali i ala o le tulafono (Esekielu 36:26-27). O le folafolaga lea e ala mai i le feagaiga fou lea na fetalai mai ai le Atua "ou te tuuina atu a'u tulafono i latou mafaufau, ma tusia i o latou loto,...", (Eperu 8:10). Faalatele atili mai lea e Paulo faapea o le tulafono a le Atua e tusia lea i le loto e le Agaga Paia (2 Koronito 3:3).

Na iloa foi e Tavita le mea ina ua ia tusia e faapea:

"...ia e faamalosia a'u e tusa ma lau afioga....ma ia e foai mai lau tulafono ia te a'u i le alofa....ua ou filifili i le ala o le faamaoni...le Alii e, aua e te faamaina a'u...Ou te momo'o i le ala o au poloaiga pe a e foai mai ia te a'u le loto matala;...Ia e aoao mai ia te a'u ona ou anaana lea i au tulafono...Ia e faaauai atu lo'u loto i au tulafono, a e aua ne'i i le matape'ape'a. Ia e liliueseina o'u mata ne'i ou vaai i mea le aoga; ia e faaolaolaina a'u i lou ala; ia e faaumauina lau afioga i lau auauna,..." (Salamo 118:25-38).

#### O LE PAPATISOGA A LE AGAGA PAIA MA LE TULAFONO A LE ATUA

Ona tatou toe foi mai lea i le mataupu o loo talanoaina. E ala mai i le papatisoga poo le faatumulia i le Agaga Paia, e faapea foi le tusia o le tulafono a le Atua i o tatou loto, ma usitai iai, mai le taele o o tatou loto. O le tulaga lea e le atoatoa pe a tatou talia Iesu ma papatiso i le vai. Fai mai Paulo e ao ina faatumulia i tatou i le Agaga. O le faatumulia i le Agaga o le papatisoina lea e le Agaga, poo le faauuina foi lea e le Agaga. O mea uma lava ia, o le faatumulia, papatisoga, ma le faauuina e faatatau uma lava i le mea e ao ina tupu i le olaga o le kerisiano.

E matua tataua lava ona tupu mea nei i le tagata talitonu. Fai mai Paulo a tatou faaavanoa o tatou loto, e faamautuina e le Atua i tatou mo Keriso, na te faauuina i tatou i lona Agaga, ona faamautuina ai lea o i tatou e le Agaga (2 Koronito 1:21-22; Efeso 1:12-13). O seisi lava usiusitai i fafo atu mai le faatumulia e le Agaga ua na o se mea e tupu faa-farasaio, o se usiusitai mai fafo ae le mai totonu o le loto. Aisea? Talu ai foi ona e le o tusia le tulafono i le loto; le mea lea e tupu pe a faatumulia le loto i le Agaga Paia. Fai mai le alii poto; “O mana'o a e amiotonu ua na ona lelei lea...” (Faataoto 11:23). O loo tautala foi Paulo e uiga i le tagata talitonu faamaoni faapea e usitai “mai le loto” ma avea ma “auauna” poo le pologa i le amiotonu (Roman 6:17-18).

Talu ai ona o le taua tele o le tusia o le tulafono a le Atua i o tatou loto, e faapefea la ona tatou iloa ua tupu lenei mea? Tau ia ina avatu se faataitaiga lenei: o le tele lava o i tatou e iai tv i o tatou aiga. Faapea la o loo tatou matamata i se polokalama manaia lava, ae iai ma ni nai ata o le mulilua (tulafono e fitu), faapea gagana faalefetaui (tulafono e tolu), fasioti tagata (tulafono e ono), pepelo (tulafono e iva), faapea le gaioi (tulafono e valu). A faapea la ou te mafai e aunoa ma sina faigata ona ou matamata nei polokalama, o lona uiga, e le o tusia le tulafono a le Atua i lo'u loto. Ana faapea o loo iai le tulafono i totonu o lo'u loto, se mea manu ou te le taitai lava ona ou taliaina nei mea ou te matamata iai ma e le mafai foi ona ou fiasia e matamata i nei ituaiga polokalama.

O faailoga e faamatalaina ai i latou i Siona ua sauni e failoai ma Keriso i lona afio faalua mai e aofia ai e ua “maua i le mata'u...ua moe foi ona mata ina ne'i vaai atu i le leaga;” (Isaia 33:14-15). O kerisiano ua faatumulia i latou i le Agaga, ma ua faataga le Atua e tusia Ana tulafono i o latou loto e le taofia le matamata i polokalama faapenei ona e faapea ua fai mai le tulafono e aua le faia mea nei. Ae e le matamata i mea nei ona ua talitonu mautu mai totonu o le loto e le fiasia ai e matamata polokalama faapenei. O le faaauu pea e matamata e aunoa ma se lagonaina o le leaga o nei ituaiga polokalama, o le teena foi lea o le leaga o le agasala e ma faamanumalo ai foi tuinanau, ae faavaivai le malosi e teena ai nei lagona agasala. E le aunoa ae faafiufiu i le Agaga ma oo ai lava ina toe foi i le tulaga mauualalo na iai ae le i maua le faatumulia e le Agaga Paia.

#### O LE FAAMAUFAAILOGAINA O LE GALUEGA A LE ATUA

O le ala o le faamaufaailogaina na vaaia i le faaaliga a Esekielu (Esekielu 9:1-7). Na tuuina le faamaufaailogaina i muaulu o i latou uma lava “ua mapuitiga, ma ua feoi ona o mea inosia uma ua latou fai i ai” i le aai o Ierusema (o le lalolagi lava lea). O mea “inosia” e faatatau i mea le talafeagai e faamaualaloaina ai tulaga o le olaga, mea ua tapuai ma faatauaina e le tagata, e pei o feusuaiga o alii ma alii, teine ma teine, faaletauaina o le ola o le tagata na faia e le Atua, ma le tele lava o amioga mataga ua faia ma vaaia foi i nei ona po. O i latou ua maua le faamaufaailogaina ua latou mauaina le tusia o le tulafono a le Atua i o latou loto, ma o le ala foi lea latou te teena ai nei



amioga mataga. O le faailoga e pei ona ta'ua e Esekielu o le faamaufaaailoga foi lea o loo ta'ua i le tusi o Faaaliga, lea e tuuina i le muaulu a i latou ua sauni e feiloai ma Iesu i lona toe faaali faalua mai (Faaaliga 7:1-3).

O i latou uma lava ua sauni e feiloai ma Keriso pe a toe faaali mai ua tusia ma faamauina le tulafono a le Atua i o latou loto (Isaia 8:16). O i latou uma foi ua tusia le tulafono a le Atua i o latou loto ua latou mauaina foi le papatisoga a le Agaga Paia.

A foliga mai e le o i lou loto le tulafono a le Atua, atonu lava o loo iai pea se faamoemoe ma se avanoa. Muamua, tatalo mo le faamagalona; lua, saili le faatumulia o lou loto e le Agaga Paia. A tatou saili le papatisoga a le Agaga Paia, ua tatou talia le aunagi mai a le Atua: "Ia outou saili i le Alii, outou uma ua agamalu i le nuu, o e ua faia lana faamasinoga; ia outou saili le amiotonu, ia outou saili le agamalu, atonu e lilo ai outou i le aso o le toasa o le Alii." (Sefanaia 2:3). E iai se naunautaiga ia faavave ona tatou usitaia le faatonuga a Paulo ina ia "faatumulia i tatou i le Agaga". Ua na o le pau lava lea o le faamoemoega pe a tatou fia tutu atu i lena aso tele o le toe Afio faalua mai o Keriso. O lena foi le tulaga ua mautinoa ai ua tusia le tulafono a le Atua i o tatou loto (Roma 5:5), ma o le mafuaaga maualuga lava lea e tatou te usitai ai i ana tulafono (Ioane 14:15, Roma 6:17). Afai e faia ia mea, ona mautinoa lea ua tatou alolofa i le amiotonu, ae fultua i le agasala.

Sa tautala mai foi Elena Uaita e uiga i le mea e tupu pe a tatou filifili e faatumuina i tatou i le Agaga, ma faataga le Atua e tusia lana tulafono i o tatou loto:

"O le usiusitai faamaoni e mafua mai i le loto. A tatou tali atu i lea galuega a Keriso, ona o gatasi ai lea o tatou manatu ma lona finagalo, o faamoemoega o lona Agaga, ma tutusa ai foi a tatou olaga e pei foi ona naunau iai o Ia. E tuuina foi i lalo o tatou lava manatu pe faia mea e uuna'i mai ai tatou e le tiapolo. O lo tatou faanaunauga e faapaiaina ma e faafiafiaina ai o tatou loto e faia lana galuega. A tatou iloa le Atua, e pei ona aumaia le avanoa tatou te iloa ai o Ia, o le avea loa o tatou olaga ma ola manumalo. Ona o le mautinoaga ua ola Keriso i totonu o i tatou, ma le mafuta mai o le Atua, ua tatou inoino loa i le agasala." (*Desire of Ages*, p. 668)

#### SOIFUA KERISO I TOTONU O LE TAGATA TALITONU

A tupu lenei mea, o lona uiga ua soifua Keriso i totonu o i tatou. E faaali atu Ia i mea tatou te faia ma amio i le matagofie o ona uiga mama. O le tupu ia i tatou mea ua faamatala mai e Ioane:

"O le tausi foi i ana poloaiga, o loo tumau lea i totonu ia te ia, o ia foi o i totonu ia te ia; o le mea foi lenei ua tatou iloa ai o loo tumau o ia i totonu ia i tatou, aua o le Agaga ua ia foaiina mai ia te i tatou" (1 Ioane 3:24).

O i latou nei e iloa lelei le Alii aua ua mau Keriso i totonu o latou loto i aso uma. A afio mai le Alii latou te le faalogoina upu na faia i taupou valelea lea na leai ni a latou suauu, o le Agaga Paia lea (Mataio 25:12). O i latou e

faatagaina Keriso e mau faatasi ma i latou e ala lea i le faatumuina i lona Agaga, ua toe faamautuina le mafutaga mafanafana ma Ia.

#### FESILI E FAATALATALANOA

1. O a ni mafuaaga o le papatisoga a le Agaga Paia? 2 Kortonito 3:3; Galuega 1:8
2. O le a le suafa na faaali mai ai le Atua ia Mose? Esoto 3:14
3. Fai mai Paulo o ai le Atua o le Feagaiga Tuai lea na taitaiina Isaraelu i le ao faaniutu, ma o ia foi o le “papa”? 1 Koronito 10:1-4
4. O ai na faaali ma tuuina tulafono e sefulu ia Mose i luga o le mauga o Sinai? Neemia 9:12-14
5. Na faapefea ona tusia e le Atua tulafono e sefulu? Esoto 31:18
6. I le fetalaiga a Iesu, o ai le “lima” o le Atua? Mataio 12:28; Luka 11:20
7. O le a le mea e faia e le Agaga Paia i le tulafono i aso nei? 2 Koronito 3:3
8. O le a se soifuaga o Iesu na iai faatasi ai ma tulafono e sefulu? Isaia 42:21; Mataio 5:17
9. O a ituaiga usiusitai e lua e vaaia i le olaga o se tagata kerisiano?
10. Mata e talia e le Atua se foliga usiusitai i le tulafono e faaali mai fafo ae le o tusia i le loto? Salamo 51:16-17; Mataio 15:8
11. Fai mai ea le Tusi Paia e uiga i le auala tatou te maua ai le loto fou e manaomia ina ia tatou usitai ai i le Atua e sau mai i le ta’ele o o tatou loto? Esekielu 36:26-27
12. O le a le folafolaga a le Atua i le mea na te faia mo le kerisiano e ala mai lea i se feagaiga fou? Eperu 8:10
13. O le a le mea na tatalo atu ai Tavita i le Atua ia faia mo ia? Salamo 119:25-38
14. E faapefea ona tusia le tulafono a le Atua i le loto o le tagata talitonu?
15. O le a le mea e tupu muamua i le tagata a e le’i faatumuina o ia i le Agaga Paia? 2 Koronito 1:21-22; Efeso 1:12-13
16. O le a le ituaiga usiusitai e tupu pe a le o faatumulia le tagata i le Agaga?
17. Se’i ta’u mai se faaitaiga e faaali mai ai e le o tusia le tulafono a le Atua i le loto o le tagata?
18. O le a le mea e tupu i le tagata o loo faatumulia i le Agaga pe a molimauiina ni mea sese o loo faia?
19. O ai e mauaina le faamaufaaailoga a le Atua? Esekielu 9:1-7
20. O na o ai la i latou ua sauni e feiloai ma Iesu pe a toe afio mai? Faaaliga 7:1-3
21. O le a le fesootaiga o le faamaufaaailoga a le Atua, le Suafa o le Atua, le mamalu o le Atua, ma le tulafono e sefulu? Esoto 33:18-19; Eperu 8:10; Faaaliga 7:1-3

22. O le a se faamatalaga a Elena Uaita e uiga i le mea e tupu pe a tusia le tulafono a le Atua i le loto a le tagata talitonu, ma ua mauaina foi le papatisoga a le Agaga Paia?
23. A tatou mauaina le papatisoga a le Agaga Paia, e faapefea le tatou sootaga e maua, ae maise le tatou mafutaga ma Iesu?

#### TALOSAGA

- Ole atu i le Atua ina ia:
  - Papatiso mai oe e lona Agaga
  - Tusia lana tulafono i lou loto ina ia avea lou usitai atu ia te ia e sau mai lou loto
  - Faamanuia i latou o loo i lau lisi tatalo

# ASO LONA FITU O LE FAAMAUFAAILOGAINA MA LE LULUUGA

E matuai taua lava le faamaufaailogaina ma le luluuga mo i latou o loo soifua ae lumana'i le toe afio mai o Keriso. O i latou ua faamaufaailogaina ua sauni i latou mo lena aso tele. O i latou foi e teena le faamaufaailogaina a le Atua, o se mea e auala mai ai le sauniuniga mo le toe afio mai o Iesu, o le a pau'u ese mai le ekalesia i lea luluuga.

## O LE FAAMAUFAAILOGA A LE ATUA

Ua fai mai le Tusi Paia o le faamaufaailoga a le Atua e tuuina le i le muaulu (Faaaliga 7:4). A mauaina le faamaufaailoga a le Atua, ona maua foi lea o lona suafa i le muaulu (Faaaliga 14:1). E tutusa lava le suafa o le Atua ma lana faamaufaailoga. I le taimi na feiloai ai Mose ma le Atua i luga o le mauga, na fesili o ia ina ia vaai i lona mamalu. Na fetalai le Atua o le ia ta'u atu lona "suafa" e iloa ai foi le atoaga o lona mamalu (Esoto 33:18-19). O le mea lena tatou te iloa ai o le faamaufaailoga, lona suafa, ona uiga, ma lona mamalu e faatatau lava i le mea e tasi. O lana feagaiga fou o loo folafola mai ai e le Atua na te tuuina lana tulafono i o tatou loto (Eperu 8:10). I le Feagaiga Tuai, o tulafono a le Atua na faapea e faailoa i o latou mata, e faatatau lea i o latou muaulu. O le mea lea e iloa ai e faatatau lava le faaataata o le faamauina o le tulafono i le muaulu (mafau).

I le mataupu o le "Usiusitai mai le Loto" na tatou talanoa ai i le galuega a le Agaga Paia o le tusia lea o le tulafono a le Atua i o tatou loto. Na tatou iloa ai foi o le galuega lena ua ta'ua o le "faamaufaailogaina," o le mea e tupu ona o le faatumulia lea i le Agaga (2 Koronito 1:21-22; Efeso 1:13). O le mea tonu lea a faapea tatou te mauaina le faamaufaailoga, le suafa, o uiga faaatua, ma le tulafono a le Atua i o tatou muaulu (mafau), ia faatumulia foi la i tatou i le Agaga Paia. Fai mai le Tusi Paia e leai lava se isi auala. Le mea tonu lava lena e taua ai le papatisoga poo le faatumulia e le Agaga o

le tagata talitonu. O le mafuaaga foi lea e naunau mai lava Paulo ina ia faatumulia i tatou e le Agaga (Efeso 5:18).

Na faaaliga foi ia Esekielu le auala leni o le faamaufaailogaina (Esekielu 9:1-7). Na ia vaaia se tagata ua ofu lino ma lana fagu vaitusi i lona itu, ua ia tuuina foi le faamaufaailoga i muaulu o i latou uma lava ua leaga i aai o Ierusalema, o le faatatau lea i le lalolagi.

Ua tatou iloa foi o le upu “amioleaga” e faatatau lea amioga leaga uma ua tatou inoino iai, mea e inosia e iai le ifo i tupua, feusuaiga le feagai ai o tane i tane, tamaitai i tamaitai, ma le tele lava o amioga mataga ma le inosia ua vaaia tele I nei ona po. O i latou uma lava ua faamaufaailogaina ma ua maua le tulafono a le Atua i o latou loto ua inoino i nei tulaga. O le faamaufaailoga na ta’u mai e Esekielu e tutusa lava ma le faamaufaailoga i le tusi o Faaaliga, lea e tuuina i le muaulu (Faaaliga 7:1-3). Ua tatou iloa foi o le faamaufaailogaina leni e tupu ona o le faatumulia lea, poo le faauuina e le Agaga Paia (2 Koronito 1:21-22; Efeso 1:12-13).

## O LE LULUUGA

I le faaaliga a Esekielu, o loo faaata mai ai le faaumatiaina o i latou e le maua le faamaufaailoga a le Atua. Ua leva lava ona talitonu le ekalesia Aso Fitu o le Toe Afio Mai e faapea o i latou e le o faamaufaailogaina o le lulu ese mai le ekalesia. O loo faaaogaina e Esekielu le upu “faaumatia” e faamalamalamaina ai i latou e le o faamaufaailogaina. O le faamaufaailogain ma le luluuga e faatatau i le ekalesia. O le mea lena e faailoa mai ai o le faamaufaailogaina ma le galuega o le luluuga e amata la mai totonu o le ekalesia a le Atua ona sosolo atu ai lava lea ile lalolagi, e aafia ai tagata uma, o tane, fafine, faapea fanau o loo i luga o le fogaeleele. O i latou uma lava e le o faatumulia e le Agaga Paia o le a luluina ma to’ulu ese mai lana ekalesia ma leiloa ai lava e faavavau.

O se vaaiga foi lea ua tuuina mai i le tusi o Faaaliga e uiga i le feau a le Atua mo le ekalesia i Laotekaia (Faaaliga 3:14-22). Ua tuuina mai i le ekalesia i Laotekaia le avanoa ina ia talia Keriso i o latou olaga, le mea lea e tupu pe a maua le papatisoga poo le faatumulia foi e le Agaga Paia (1 Ioane 3:24). Ua valaaulia i latou e faatau mai le “auro”, e faatatau le i le faatuatua ma le alofa, o isi nei o mea taua lava o fua o le Agaga Paia (Kalatia 5:22-23). Tatou te maua leni alofa e ala mai i le faatumulia i le Agaga Paia (Roma 5:5). Ia faatauina mai foi “ie lino mama”, e faatatau lea i le amiotonu a Keriso, o le faafeagai lea i le amiotonu a le tagata lava ia ua maua le usiusitai e ala mai mea o le olaga nei ae le o le usitai mai le loto. Ua fautua ina ia faatau ma faaaoga “vai mata”, o le fofu faaleagaga e mauaina mai lea i le Agaga Paia, ina ia iloa atu ai le tulaga moni lava o loo iai le tagata. O le

faafitauli la a le ekalesia i Laotekaia, o le faapea lea ua lelei lava le latou tulaga i le silafaga a le Atua. Ua latou faapea ifo ua le o toe manaomia le Agaga Paia, le auala lea e mauaina ai Keriso i o latou olaga. O le lapataiga la e faapea o le a “luai” mai i fafo mai le fofoga o le Atua pe a le faatagaina Keriso i totonu o latou olaga, lea e maua ai fua o le Agaga ma faaaliga mai ai foi i o latou olaga ua tusia le tulafono a le Atua i o latou loto. O le faaata leni o le “luai” mai i fafo o le fofoga o le Atua e faatatau foi lea i le “faaumatia” e pei ona vaaia i le faaaliga a Esekielu, o le luluuga foi lea.

I le tusi o le “Uluai Tusitusiga” a Elena Uaita o loo faamatalaina mai ai le faaaliga i le luluuga; ma ina ua ia fesili mo lona uiga, sa faamatalaina ia te ia e le Agaga e faapea:

“...o le a mafua mai i le molimau tuusa’o ua valaauina ina ia fautua ai le au Laotekaia. O le aafia tele ai le loto o le na te maua lea fautuaga ma o le a taitaiina ia e ta’u atu le mea moni ma le feau tonu lava mo le ekalesia. O le a toatele i latou o le a le talia leni feau tuusa’o. Toatele i latou o le a tutu mai e tetee, ma o le mafuaaga leni o le a lulu ai tagata o le Atua (*Early Writings*, p. 270).

I le tusi o Faaaliga, ua ta’u mai ai o Iesu lava o le “molimau moni ma le faamaoni” (Faaaliga 3:14). E iai le faanatinati o leni feau ma ia tatou faatauaina le fautua mai a Keriso ina ia faataga o ia i o tatou olaga, e ala mai lea i le liligi ma faatumulia o tatou loto i le Agaga Paia. O le a avea leni mea o le a tusia ai le tulafono a le Atua i o tatou loto, ona tatou vivii atu ai lea ma faaali uiga o le Atua i o tatou olaga ma upu tatou te tautatala ai. O ia latou e le o faatumulia i le Agaga latou te vaaia latou na ua faamaufaailogaina e pei o nisi ua matele i le fiaatua. Ae o i latou nei ua fiafia i le agasala ma tetee atu i tapulaaa a le Atua ma latou teena le Agaga ma le faamaufaailoga a le Atua. O le a latou le malamalama ma lagona ai le iloa tonu ola e pei o i latou ua faamaufaailogaina e le Atua. Fai mai Elena Uaita o le a faapea le lalolagi o i latou ua faamaoni i le Atua ma faamaufaailogaina ua pei ua “fiaatua” tele (*Fundamentals of Christian Education*, p. 289). O le a le na o le lalolagi la e sau ai leni manatu, ae o le a sau lava mai nisi o le au faatuatua, o latou ua le faatagaina le tulafono a le Atua ia tusia i o latou loto, ma le talia faamanuiaga o le faatumulia le o le loto i le Agaga Paia.

## O TAUPOU POPOTO MA E VALELEA

O le faataoto e uiga i taupou e to'a sefulu o loo tuuina mai ai foi ata tai tutusa lava o mea e tutupu. O le tala i vaega o taupou e toalua, o e popoto ma e valelea. O le eseesga la ona ua aumai suauu faaleoleo mo a latou moli e taupou popoto. O le upu "faatau mai" e taua tele i le tala lenei ma le feau a Iesu i le ekalesia i Laotekaia. E le o se upu na faia pe aumai i seisi lava tagata. Na faatusa foi e Elena Uaita tagata Laotekaia i taupou valelea e faapea:

"O upu 'taupou valelea' e faatatau le ia i latou e le i faaalua le amion a Keriso e afua mai i le loto ua galueaina e le Agaga O le Atua. O le afio mai o Keriso e le suia taupou valelea e avea ma taupou popoto.... Ma o le tulaga e iai le ekalesia o loo faaali mai lea e le au taupou valelea, ma o le tulaga foi lea o le faa-Laotekaia" (*Review and Herald*, Aug. 19, 1890).

Na talanoaina mai foi e le alii of LeRoy Froom e faapea:

"o le au valelea latou te faapea ifo o le au popoto lava ua latou faatauaina fua le talanoaga i le mataupu o le suauu" (*Coming of the Comforter*, p. 294).

O le manatu lava lea faa-Laotekaia. E mafaufau lava i latou o loo lelei pea lava lo latou olaga faaleagaga ae ua mamao lea mai le tulaga tonu o loo iai i latou. A faalogo i le feau e uiga i le papatisoga a le Agaga Paia, e tele lava ina le fia amanaia aua ua latou mautinoa ua uma ona latou maua le Agaga i o latou olaga. A faalogo i latou i le feau o le papatisoga a le Agaga Paia, e fai mai lava latou ua uma ona ia i latou le Agaga ma ua lava lea mo latou olaga. O lea na talanoa mai ai Elena Uaita e uiga i taupou valelea e faapea:

"O i latou na e pei o taupou valelea e le o nisi e leaga ni tapulaaa. O i latou nei ua malamalama lelei lava i le upu moni; latou te taliina foi le upu moni; ae paga lea, latou te le'i tuuina atoatoa o latou loto i le galuega a le Agaga Paia... latou na ua pei o taupou valelea le malilie lava i galuega faataunuu. Latou

te le iloa le Atua... ma o latou galuega ua na ona fai e aunoa ma se uiga o iai.” (*Christ Object Lessons*, p. 411).

## LAPATA’IGA MO LONA TAIMI

Na lapata’i mai Elena Uatia e faapea:

“O le papatisoga a le Agaga Paia e pei ona faia i le aso Penetekoso e taitaiina lea i le faafouga o le tapuaiga moni ma le faia faataunuu moni o galuega lelei. O le a iai le potu faalelagi mai le Atua e taitai ai tagata i mea uma latou te faia. Ae e tula’i mai foi ni tulaga e faapea ai nisi a faaalua mai uiga o le papatisoga a le Agaga Paia e pei ona vaaia i le ulua’i Penetekoso, ona latou fai mai lea ua faafia-agelu ma fia paia; ua faapea o nisi nei ua faatumu i le uaina fou.’

“Ae e leai. O le a oo mai le taimi e le o mamao o le a matua manaomia ai lava e i tatou le mafutaga loloto ma le vava lalata ma Keriso, se sootaga mafana ma le Agaga Paia. e sili atu lo seisi lava taimi muamua, vagana ai latou te le tuulafoaina o latou ala tuai ae tuu atu atoa latou i le Atua ma faia lona finagalo. O le agasala tele lava a i latou e fai mai o latou o kerisiano o le le tatalaina lea o latou loto ina ia mauaina ai le Agaga Paia. A galala loa tatou mo lona Agaga, ma saili ina ia tasi i tatou ma ia, ona faigofie lea ona faapea ifo e faaeteete ma aua le soona faia le “faaagelu”. Ae le o lea. A faatasi mai agelu o le lagi ia i tatou, ma faaoga i tatou o mea faigaluega, o le a molimauina le toatele o nisi e liua mai, e pei foi ona molimauina i le aso penetekoso.” (*Selected Messages*, Vol. 2, p. 56-57).

E le taumate o le a faate’ia le toatele e pei o taupou valelea ina ua fetalai mai Iesu: “out e le iloa outou”. O loo faamatala mai e Iesu i latou nei i le



Mataio 7:20-23, lea o loo faapea mai ai o taupou valelea i le tusi Mataio 7 e faapea: “Alii, Alii” ia Keriso. O i latou lava nei ua talitonu faamaoni ia te ia. O i latou nei sa malosi tele i le galuega ma tautuauina long finagalo. I lona suafa na latou faia ni vavega, tutuli temoni, ma mea matautia faapena. Na latou mautinoaina lava le sa’o o a latou mea o fai i le silafaga a le Atua ma ua sauni mo le toe afio mai o Keriso. Ae maitau mai le fetalaiga a Iesu: Latou te le’i “faia le finagalo a lo’u Tama oi le lagi”. Ua latou galulue i le “mea le sa’osa’o”.

Soo se galuega lava e fai mo le Atua e le talafeagai ai ma le faatuatua faamaoni ma le Agaga Paia o le agasala lea (Roma 14:23). Mo se tasi o loo maitau mai, e tai tutusa lava galuega a taupou valelea faapea ma latou popoto. Ae na’o le Atua na te silafia le loto. E faigata foi ona iloa se eseese o taupou popoto mai e valelea mai na o faailoga vaaia o latou e faatuatua, e pei o le tutuli ese o temoni ma faamalolo ma’i. E tau le iloa se eseese o latou ua faatumuina pe le o faatumuina foi i le Agaga e ala i faailoga i galuega latou te faia (Matthew 7:20-23).

## O LE ILOILOGA O LE SOO MONI

Pau lava le mea e iloa i latou ua faatumulia i le Agaga o le mauaina lea o le soifuaga e faaali mai ai “fua o le Agaga” (Mataio 7:20, Kalatia 5:22-23). Ua na o i latou lava ua faatumulia i le Agaga e vaia ai fua ia o le Agaga I o latou olaga. Ua na o i latou ua papatisoina e le Agaga e faaali atu le amio a Keriso i o latou olaga. Ua na o i latou ma le suauu faaleoleo, lea e faatusa i le papatisoga a le Agaga Paia, e sauni mo le faatoa faiava pe a afio mai. Ua latou aumaia suauu faaleoleo e manaomia e mumu pea i le po seia foi mai le faatoafaiava. E tumau ma faamaoni pea i latou seia oo i le iuga. Latou te iloa Keriso i se mafutaga vava lalata lava; e loloto lo latou alofa mo ia, e oo lava ina fia oti mo ia ae aua le to faamanualia pe faatiga ia te ia.

## PAPATISOGA A LE AGAGA PAIA MA LE LULUUGA

O le uluai liliigiina ifo o le Agaga Paia i le aso Penetekoso e ta’ua foi o le “uluai uaga” i le Tusi Paia. O le papatisoga la e le Agaga Paia o se gaoioga lea o le uluai uaga i le olaga o le tagata kerisiano.

O loo taua mai foi i le Tusi Paia le liliigiifo o le Agaga Paia a o lumana’i ai le toe afio mai o Keriso. O le toe liliigi ifo lea o le Agaga Paia ua ta’ua o le “uaga mulimuli”. A tupu loa lea mea, ua faataunuina ai lea o le galuega

a le Agaga Paia i le olaga o le tagata talitonu, e sauni ai lea o ia mo le toe faaali mai o Keriso i lona toe afio mai faalua. Ae ui i lea, a le mauaina e le kerisiano le uluai uaga, poo le papatisoga a le Agaga Paia, e le sauni foi la ia mo le uaga mulimuli. O le a tupu lava le liligi ifo o le uaga mulimuli, ae o le a le sauni le tagata faatalitali e maua faamanuaiaga o lea tulaga, ma e le aoga ai foi la mo lea Kerisiano. E manino lava le manatu a le tamaitai o Elena Uaita e faapea:

“I le itu i Sasa’e e pa’u le uluai uaga i le taimi e lulu ai; e manaomia lea mo le faatupuina ma faaola le fatu. O le tulaga le lea ua faaolaola ai e le uaga muamua fatu ma ua tuputupu a’e ai. A o le uaga e mulimuli mai e matua ma sauni ai le laau mo le seleselega. Na faaaoga e le Alii ata nei o le natura e faamanino mai ai le galuega a le Agaga Paia. O le sau faapea ma le uaga na muamua alu ifo e faatupuina le fatu ma faatuputupuina ia matua mo le seleselega; e faapea foi ona aumai le Agaga Paia e faataunuuina o vaega eseese ma le faatuputupuina lea o le olaga faaleagaga a le tagata talitonu. O le matua o le laau ua faataunuuina ai ma mae’a le galuega ma le alofa tunoa a le Atua mo le tagata. O le a faaali mai ai foi le atoatoa o foliga faaleatua i le tagata faatalitali, ma foliga ai ia Keriso.

“O le uaga mulimuli, ua matua le saito, o le faaata lea o le aloga tunoa faaleagaga e sauni ai le ekalesia mo le toe faaali mai o le atalii o le tagata. Ae a le faataunuuina le uluai uaga, o le a leai se ola; o le a leai se tupu lausiusi o le saito. A le faataunuuina le galuega a le uaga muamua, e le faataunuuina foi la le galuega a le uaga mulimuli.

“O le a toatele i latou o le a le mauaina le uluai uaga; ua latou le maua faamanuiaga ua foai mai e le Atua mo i latou. E faapea a i latou e tuu ai pea e maua pe a liligi ifo le uaga mulimuli. E manatu e tuu ai pea o le alofa tunoa o le a maua lava mulimuli. Ae paga lea, o se manatu sese tele lea.” (*Testimonies to Ministers and Gospel Workers*, p. 506-507).

Aua nei faaseseina i tatou i le manatu ua lapata’i mai ai le tamaitai perofeta. Tatou saili le Atua mo le uluai uaga, o le papatisoga lea a le Agaga Paia. A le tupu lea mea, o le a tatou le sauni foi mo le uaga mulimuli. O la a avea tatou ua pei o le vaega o taupou valelea ma polofesa mafanafana o le upu moni faa-Laotekaia. A tatou teena le uluai uaga, le papatisoga a le Agaga, e mautinoa lava o le a luluina ese tatou mai le ekalesia mulimuli a le Atua.

Viia le Atua pe a le avea tatou e pei o i latou o le a pa’u’u ese mai i lana ekalesia pe a luluina i aso o le iuga. O i latou e saili ma le loto maualalo i aso uma mo le liligiina ifo o le Agaga Paia o le a latou tuputupu i le aloga tunoa, mauaina ma faaali atu amio a Keriso (fua o le Agaga), mauaina le uaga mulimuli, ma sauni atu ai e feiloai ma Faaola pe a toe foi mai.

## FESILI E FAATALATALANO

1. Aisea e taua ai le mauaina o le faamaufaaailoga a le Atua? Faaaliga 7:1-3
2. O fea e tuu ai le faamaufaaailoga a le Atua i le tagata Kerisiano?  
Faaaliga 7:4
3. A mauaina e le tagata le faamaufaaailoga a le Atua, o le a foi le isi mea e maua? Faaaliga 14:1
4. A mauaina e le tagata talitonu le suafa o le Atua, o le a la lona uiga i le olaga o lea tagata? Esoto 33:18-19; 34:5-7
5. I le feagaiga fou, o fea o le a teuina ai le tulafono a le Atua? Eperu 8:10
6. I le Feagaiga Tuai, o le a le mea na mana'o le Atua e teuina i loto o lana fanau? Teuterenome 6:8
7. O le a se mea ua a'oa'o mai ia i tatou e mau ua lisi mai i fesili i luga?
8. O ai o le aiga Atua na te tusia le tulafono a le Atua i mafaufau o lana fanau ma faamaufaaailogaina foi latou? 2 Koronito 3:18; 1:21-22  
Efeso 1:13
9. O le a le mea e tupu muamua i le tagata kerisiano ina ia faamaufaaailogaina o ia?
10. O le a le igoa ua ta'uina ai e le perofeta o Esekielu le faamaufaaailoga a le Atua? Esekielu 9:1-7
11. O ai e mauaina le faamaufaaailoga a le Atua o loo fai mai ai Esekielu?  
Esekielu 9:1-7
12. Fai mai e a Esekielu i le mea e tupu ia i latou e le mauaina le faamaufaaailoga i o latou muaulu? Esekielu 9:5-6
13. O le a le aoaoga a le ekalesia Aso Fitu e uiga i le faaumatiaina o i latou ua le iai le faamaufaaailoga a le Atua?
14. E faatatau i le papatisoga a le Agaga Paia, o ai o le a lulu ese mai i le ekalesia?
15. Faapefea ona faamalamaina mai e le tusi o Faaaliga le luluuga pe a tupu? Faaaliga 3:14-16
16. I le feau mo Laotekaia, e faapefea ona foia ona faafitauli? Faaaliga 3:20
17. E faapefea ona tatou tuuina atoatoa o tatou olaga mo Keriso? 1 Ioane 3:24
18. O a nisi mea e tatau ona maua e kerisiano faaLaotekaia ina ia aua ai ona "luai" ese mai i le fofoga o le Atua? Faaaliga 3:18  
*Note: O le auro o le ata lea o le amio atoatoa a Keriso i le faatuatua ma le alofa; o le ofu pa'epa'e o le ata lea o le amiotonu a Keriso; ae o le vai mata o le mauaina lea o le papatisoga a le Agaga Paia.*
19. Fai mai Elena Uaita o le a le mafuaaga o le a luluina ai le ekalesia?
20. O ai le Molimau Faamaoni? Faaaliga 3:14

21. E faapefea la ona tu atu se tasi e tetee i se molimau a le Molimau Faamaoni?
22. I le faasoa mai a Elena Uaita, o le a le faaigoaina a latou e teena le papatisoga a le Agaga Paia ia i latou ua talia ma faatumuina e le Agaga?
23. O le faataoto i taupou popoto ma e valelea e faasino tonu lava i le ata o loo faamatalanina mai i le Esekielu mataupu e iva, faapea foi ma le lapataiga mo Laotekaia. O le a la le mea na iai i taupou popoto e le'i iai i taupou valelea? Mataio 25:1-12  
*Note: O le suauu faaleoleo o le ata lea o le papatisoga a le Agaga Paia.*
24. O le a se fetalaiga a Keriso na fai i taupou valelea pe a toe foi mai? Mataio 25:20-23
25. Pe na faia ea e taupou valelea ni galuega lelei ma le maoa'e mo Keriso? Mataio 7:20-23
26. O le a se mea e iloa ai le eseese o taupou popoto mai taupou valelea? Mataio 7:20; Kalatia 5:22-23
27. Aisea e maua ai e taupou popoto fua o le Agaga i o latou olaga? Kalatia 5:16; Efeso 5:18
28. O le papatisoga a le Agaga Paia ua ta'ua o le "uluai uaga" a le Agaga ma e na amata lava ona liligi ifo talu mai le aso Penetekoso. O le a la le isi liligi ifo o le Agaga e tupu i taupou popoto?
29. O le a se faamatalaga mai ia Elena Uaita e uiga i mea o loo faia e taupou valelea ina ua latou teena le maua o le uluai uaga, ae manatu latou te faatalitali mo le uaga mulimuli ona faato'a sauni ai lea mo le toe afio mai o le Alii?
30. O fea la le vaega o taupou e te fia iai pe a afio mai Iesu?

## TATALO FAAPITOA

- Ole atu i le Atua ina ia:
  - Papatisoina oe e lona Agaga
  - Faamaufaailogaina oe e lona Agaga Paia
  - Faamanuia i latou o i lau lisi tatalo

# ASO LONA VALU

## O FUA O LE AGAGA PAIA

O le valaau a Keriso mo le tagata talitonu, o le fua mai lea o le olaga i fua o le Agaga (Ioane 15:1-2, 5, 16). O le faatasi mai o Keriso i le tagata talitonu, o le faatumulia foi lea i le Agaga Paia (1 Ioane 3:24). A le fua mai le Kerisiano i ni fua lelei, o lona uiga e le o iai foi le Agaga ia te ia. Afai e le o faatumulia le tagata i le Agaga Paia, fai mai Iesu, “ou te le iloa outou” ma o le mea maumaloa lava na te le iloa lava (Mataio 7:20-23; 25:1-12). A faatumulia le kerisiano i le Agaga, o lona uiga, o loo soifua foi la Keriso in totonu o lea tagata.

O fua o loo saunoa iai Iesu o fua ia o le Agaga. O loo faamatalaina mai e Paulo fua ia i lana tusi i le ekalesia i Kalatia:

“A’o le fua o le agaga o le alofa, o le olioli, o le filemu, o le onosa’i, o le mataalofa, o le agalelei, o le faamaoni. O le agamalu, ma le amio mama; e le faatulafonoina mea faapena.” (Kalatia 5:22-23).

O le uluai papatisoga a le Agaga Paia e matuai taua lava; ae e le gata ai iina. Ia faaauau pea le savaliga a le tagata faatuatua faatasi ma le Agaga (Kalatia 5:25). Ia faafouina pea lea tulaga i aso fai soo; ia faatagaina o tatou tagata ia taitaiina pea lava pea e le Agaga Paia ina ia faaali mai ai pea fua o le Agaga i o tatou olaga i aso uma.

### O SE MEA MAOA’E E TUPU

O le tuputupu a’e o le olaga faaleagaga o le tagata kerisiano o le iloa lea o le Atua ma le alofa tunoa e maua mai i le Agaga. O le ala lea e oo atu ai lava ina “atoaatoa” (Eperu 6:1-3). O le ta’u amiotonuina i le faatuatua, amiotonu i le faatuatua, ma tulaga faapena, o tulaga vaaia ia o le amataga ua i le tagata faatuatua. Ae o le faatumulia i le Agaga Paia o le faasililiga lea o ia mea e ao lava ona tupu i lea tagata. Tatou te maua le faapa’iaga o i tatou pe a ua faatumuina i tatou i le Agaga ma nofo mau ai i totonu ia i tatou. E le mafai, le mafai lava ona kopiina le soifua o Keriso. Ia soifua Keriso i totonu o le tagata faatuatua. O manatu, o upu, o taaga, o mea e fai, o manatu, e mai ia Iesu ia. O lo tatou faamoemoega mo se mamalu, e mai ia Iesu ia (Kolose 1:27).

“O le usiusitai moni e sau mai le loto. O le galuega o le loto e mai ia Iesu lea. A tatou gaua’i iai, na te faailoa mai o ia i o tatou mafaufauga ma fuafuaga, ina ia o gatasi o tatou loto ma lona finagalo; a tatou usiusita’i iai, o le a le toe faia ai lea o tatou lava loto. O se manatu ua faalelei ma faapaia, o le a maua le fiafiaga pe a faia galuega lelei mo Ia.

A tatou iloa le Atua, e pei ona aumaia avanoa e iloa ai o Ia, o o tatou olaga o ni olaga o le a faaauau pea le usiusita'i. O le tatou iloa o Ia tatou te ola ai e pei ona Ia faataita'i mai, e ala lea i le fesoota'i pea ma le Atua, ma o le a tatou inoino foi lea i le agasala" (*Desire of Ages*, p. 668).

O loo ta'u mai e Paulo e afio Keriso i o tatou loto i le faatuatua, ma o le ala lea e mautu ai i totonu o tatou loto fua o le Agaga, aua a'o le alofa o le sili lea o ia mea (Efeso 3:17). A tatou mauaina le Agaga e ui i le faatuatua, ua tatou maua foi Keriso (1 Ioane 3:24; Kalatia 3:14). A mau Keriso i totonu o o tatou loto, tatou te savavali pea ma Ia (2 Koronito 6:16). E soifua o Ia ma tatou. Le soifua na soifua ai, ua tatou ola ai foi. O galuega na Ia faia, tatou te faia (Ioane 14:12). E tupu lenei mea pe a tatou "savavali ma le Agaga" (Kalatia 5:25).

O papatisoga i le vai e faatusa i se sauniga o le faaipoipoga. O se sauniga e molimauina ai e tagata lautele le talia o Keriso. O le papatisoga a le Agaga Paia e faatusa lea i le faatasiga a le ulugalii, e faamautuina ai le mafutaga vavalalata a le tane ma lana ava. O le taliaina ma le taatumulia o le tagata i le Agaga Paia, o le faato'a iloa tonu ai lava lea o lo tatou Alii. O le mafuaaga lea na fai mai ai Iesu mo i latou e teena lea tulaga mai le Agaga, "ou te le iloa outou" (Mataio 25:12). Mo taupou valelea, ua fai mai Elena Uaita e faapea:

"O le vaega ua pei o taupou valelea e le o nisi ua fultua mai i le mea moni. Latou te taliaina le mea moni; latou te tauta'uina atu foi le upu moni; e fiafia i latou e faalatalata atu ia i latou ua iloa le upu moni, ae paga lea, latou te le i tuuina atu atoa i latou ia pulea e galuega a le Agaga Paia...le vasega lea o taupou valelea; ua lava lava ia tau ina ta'ua latou o kerisiano ae e le tusa ai lava ma amio ma mea e fai. Latou te le iloa le Atua...e fai fua foi galuega." (*Christ's Object Lessons*, p. 411).

## O FUA O LE AGAGA

A tuuina atoatoa e le kerisiano ia lava ina ia faatumuina e le Agaga Paia, e fua mai i lea tagata fua o le Agaga. O le a pulea ma amio e pei o Keriso. Se'i tatou iloiloina lava fua o le Agaga i le Kalatia 5:22-23.

O le fua muamua o le "alofa". O le alofa faa-akape lea, o le alofa pito i maualuga lea i ituaiga alofa uma lava. O le ituaiga alofa lea e alofa mai ai le Atua ia i tatou. Le alofa lea na te faia ai le mea silisili mo le ua alofaina. Ua faamatalaina mai e Iesu le ituaiga alofa lea e faapea:

"Ae ou te fai atu ia te outou, alofa atu ia i latou ua ita mai ia te outou, ia outou tatalo mo e ua faasaua mai ia te outou" (Mataio 5:44).

Ua faamatalaina mai e Paulo le alofa faa-akape i upu nei:

"e onosai le alofa, e agamalu, e le losilosu le alofa, e le mitamita vale le alofa, e le faafefeteina. E le amio mataga, e le sailia e ia ana lava mea, e le faaitaitagofie, e le faitau leaga ua tuuina mai e nisi, e le fiafia i le amio leaga, ae

faifia i le faamaoni. O le alofa e lavatia mea uma, e leai se mea e gata mai ai lona faatuatua, ma lona faamoemoe ma lona onosai.” (1 Koronito 13:4-7).

O le fua lona lua o le “olioli”. O le fua, poo le amio lea, e maua ai le fiafia ma le olioli o le loto. A maua e le tagata le fua lenei, e fiafia i le Alii i taimi uma lava” (Filipi 4:4).

O le fua o le “filemu” e faasaga lea i le nofo lelei ma isi; ia mafuta ma galulue faatasi mo Keriso e aunoa ma se fevaevaeaiiga pe loto eseese. Tatou te molimauina le fua lenei i le taimi ua te’a le Penetekoso (Galuega 2:46-47). O le filemu lea e mauaina foi i le olaga o le tagata lava ia. Na tusia e Paulo le tulaga lenei e faapea:

“...aia ua a’oa’oia a’u ia toafilemu lo’u loto i mea ua ia te a’u” (Filipi 4:11).

E mauaina e le tagata talitonu le filemu lea i lona olaga, tusa lava poo a tulaga o le olaga e oo mai. Na fetalai Iesu e faapea:

“Ou te tuuina atu ia te outou le manuia; o lo’u manuia ou te avatu ia te outou; ...aia le atuatuvaile o outou loto, aia foi tou te matatau” (Ioane 14:27).

O le fua lenei e aofia ai ma le leleiga ma le Atua. A tatou maua ma talia Keriso e avea ma o tatou faaola, ua tatou mautinoa ua taliaina i tatou e Ia, ma le mautinoga o le ola e faavavau (1 Ioane 5:11-13).

O le fua o le “onosai” e mafua ai le tagata ona faapalepale ma taofiofi manatu ita ma leaga ae na te le’i faatinoina se mea. O le fua foi lenei e mafua ai i le tagata talitonu ona le faia se mea e afaina ai foi ia. Na tuuina mai ia i tatou e Iesu se faaitaiga manino lava i le taimi na tu ai o ia i luma o i latou na tuuina o ia e pei ona faamatala mai e Peteru e faapea: 1 Peter 2:23:

“O le sa agateleina, ae le toe agatele atu; na faatigaina o Ia, a e le’i faamata’u atu, a ua tuuina atu o ia e ia i le na te faamasino tonu.”

O le fua lenei na te aumaia i le kerisiano le onosai o le faatuatua i taimi faigata o mea e oo mai. O le faatumulia e le Agaga e taitaiina ai le tagata e iloa le Atua i se auala faapitoa e mautinoa ai e aapa mai lava le Atua na te tali mai i taimi faigata.

“Mataalofa” o se fua e aofia ai foi ma tulaga o le agalelei. O ia tulaga e mafua ai ona faafaigofie mea faigata; o le fua e faaali mai ai se taunuuga ae le o le mea o le a faia. O se mea e faaali mai ai le pule lelei o ni lagona malosi ma le ita, e to’a, e filemu, ae fiafia lava foliga ma aga e fai.

O le “agalelei” o se fua e faaalua ai se mea e faaauau i faatinoga uma. O le tagata ua tumau i lona loto le fua lenei o le agalelei, e sa’o lava mea ua i lona loto ma lona olaga; ua faaosofia e fai mea lelei faapea amio e faaali atu i isi. Na te le faia se upu poo se mea e faaleagaina ai se tasi, ae maise lava i luma o isi tagata, a fai se tala, e mai se mafuaaga tataua lava. Na faaali mai foi e Iesu uiga nei ina ua ia faamama le malumalu mai faiga-tupe a le au le popoi

(Mataio 21:12-13). Tatou te vaaia foi lea tulaga i mea na faia e Paulo i le taimi sa ia vaaia ai le fai mea faaitu'au o Peteru (Kalatia 2:11-12).

O le “**Faatuatua**” e aumaia ai lagona loloto ma le tumau i se talitonuga mautu. E aafia ai foi le faamaoni e loloto mai le ta'ele o le loto. E taitaiina ai le tagata talitonu ina ia aua le faaluafesasi pe le mau tonu le mafaufau (Iakopo 1:8) ae faaali le mautu o le talitonu i le faamaoni o le Atua.

O le fua o le “agamalu” e maua mai ai le loto maualalo ma le faapalepale. O le alofa mai totonu o soo se tasi lava e faaali mai ai uiga uma i mea e fai; e pei o le faalegaoia e faasaga i le Atua, o uiga lelei, talitonu o mea lelei e faatupu teleina ai le alofa i le Atua. O le agamalu e faaalua ai le talitonu faamaoni e “...galulue faatasi mea uma mo e e alolofa i le Atua” (Roma 8:28).

O le agamalu foi e aofia ai le ita i le agasala o le tagata. E faaalua lena manatu i faatinoga a Iesu ma lona va ai ma le loto maaa o le au Iutaia e pei ona fai mai ai le Mareko 3:1-5. E iai le ita ma le inoino i mea leaga; vaaia foi i le inoino o i latou ua faamaufailogaina i le faaaliga a Esekielu ina ua latou vaai atu i le leaga ua iai le lalolagi (Esekielu 9:4). O le tagata faatuatua ua iai le fua o le agamalu e le toe tupu ai le ita faamoemoe, ita teu loto; ae o le a maua e ia le olaga e pulea e le amiotonu o le a atagia mai ai le to'a ma le filemu o le Atua.

O le “amio mama” e faaalua i le pulea lelei o le tagata lava ia. O le tagata ua fua mai i le fua o le amio mama e le soona faia se mea, e fai faatatau lelei i mea uma lava e fai (1 Koronito 9:25). Na te faia mea uma ma le pulea lelei o ona manaoga faapea mea e fiafia iai, e iai foi ma mea 'ai. O le fua lena e manumalo ai le tagata i tuinanau e aofia ai foi ma le le faaaogaina o le 'ava, tapaa, fualaa faasaina, o mea ai le tataua ona faaaogaina, ma isi lava mea faapena. Na te le iloa le taua o mea e faamuamua aua ua pulea le olaga e tuinanau ma manaoga e le mai le Atua.

## E LEAI SE FUA E AUNOA MA LE PAPATISOGA A LE AGAGA PAIA

O uiga faaalua uma lava e pei ona iloa ai fua o le Agaga e matua faigata ona ausia e aunoa ma le faatumuina o i tatou i le Agaga Paia. Tatou te le ausia ma faiaina pea lava pea pe afai tatou te taumafai e fai se mea i lo tatou lava malosia. E na o le Agaga lava o le Atua e faamautuina ai fua lelei, fua o le Agaga, i le olaga o le kerisiano, ma faaaogaina ai le Agaga Paia e pulea atoatoa loto, o le mafaufau, faapea mea e fai e le tagata talitonu. E faaalua i le olaga manumalo pe a tupu a'e manaoga mai le loto fou ua tusia ai le tulafono a le Atua. E faaalua lava foi i mea uma e faia e le tagata talitonu, ua ola i le soifua a Keriso; ua faataga Keriso e pulea uma ana mea e fai.

Ua folafolaina mai e le Atua fua matagofie tatou te maua pe a tatou faataga le afio mai o le Agaga Paia e faatumuina o tatou loto. E toatele le au kerisiano e mananao i fua nei ma fai mea e tele ma le faigata ina ia latou mauaina ai nei fua ma le le iloa, e foai ma maua fua mai i le Atua e ala lea i le



faatumulua o tatou loto e le Agaga Paia. O le mea foi lea ua taumafai malosi ai lava le tiapolo ia aua tatou te mauaina nei meaalofo. O le faapaiaga moni lava e maua lea ia Keriso pe a mafuta o Ia ma i tatou e ala i le papatisoga a le Agaga Paia.

E mafai lava ona fai mai le tagata o ia ua talitonu ia Iesu Keriso. E mafai lava foi ona fai mai ua ia faia galuega tetele mo le Atua, e oo lava i le tutuli ese o temoni i le suafa o Iesu. Ae a le faaaliga mai fua o le Agaga i le olaga o le tagata, o lona uiga e le o iai Keriso ma e le o iai le Agaga i lea tagata. E pei ona fai mai Paulo:

“Afa e te tautala i gagana a tagata atoa ma agelu, ae leai so’u alofa, ua avea a’u ma ‘apa memea taalili, po o se sumepalo tagitagi; afa foi o ia te au ona perofeta ane, ma le iloa o mea lilo uma, ma le malamalama uma lava; afa foi o ia te au le faatuatua uma e ave ese ai mauga, ae leai so’u alofa, ou te le aoga lava. Afa foi ou te tufatufaina a’u mea uma e fagaina a’i e matitiva; afa foi ou te tuuina atu lo’u tino ina ia susunuina, a e leai so’u alofa, e leai lava sona aoga ia te a’u.” (1 Koronito 13:1-3).

O le faaaliga atu o fua o le Agaga i o tatou olaga, o le faamautuina foi lea o le moni o lo tatou ta’u Kerisianoina. Ua mana’omia lava e tatou le “vai mata” lea na folafola mai e Keriso ina ia tatou mauaina (Faaaliga 3:18). Ua lapata’i mai Ieremia e faapea: “E sili ona faa’ole’ole o le loto i mea uma, ma ua matua leaga lava; poo ai na te iloa?” (Ieremia 17:9). Ua na o le liliuina ifo o le Agaga, e maua ai le vaai manino faaleagaga, tatou te iloa ai foi le tulaga o loo iai lo tatou ola faaleagaga. O le vaaiga ma le iloa lea o o tatou tulaga o loo iai e faatagaina ai le alofa o le Agaga Paia na te faaumatia galuega leaga ae tuuina mai fua o le Agaga (Galatians 5:24).

Afa e te le’i mauaina le papatisoga ma le faatumuina o lou loto i le Agaga Paia, aua le toe faama’imauna se taimi ae saili nei loa o Ia. A faapea ua e lagona ua ia te oe faamanuiaga o fua o le Agaga, ia tatalo pea ina ia faatumuina ia fua lelei i aso uma. Ua pau lava lenei o le mea e mafai ai ona faaaliga atu Keriso ua i totonu o o tatou olaga.

## FESILI E FAATALATALANOA

1. A tatou talia Keriso, o a ni mea o le a tupu i o tatou olaga? Ioane 15:1-2, 5, 16
2. O le a le mea e taua ai le fua mai o fua o le Agaga i le tagata kerisiano? Ioane 15:2
3. E faapefea ona tatou faaogaina fua o loo talanoa mai ai Iesu? Ioane 15:5
4. E faapea ona mafuta Iesu ia i tatou? 1 Ioane 3:24
5. O ai le peresona o le aiga Atua lea o loo galue malosi ina ia tatou maua fua lelei? Kalatia 5:22-23

6. Lisi mai uma fua o le Agaga lea na uunaia Paulo e Keriso ina ia tusia.  
Kalatia 5:22-23
7. O a tonu uiga o fua o le Agaga? Ioane 15:11; 14:27; Faaaliga 14:12
8. Faamatala mai i au lava upu fua o le Agaga o loo lisi i lalo?  
Alofa  
Olioli  
Filemu  
Onosa'i  
Mataalofa  
Agalelei  
Faamaoni  
Agamalu  
Amio mama
9. E faapefea ona faamatalaina mai e Paulo le kerisiano na te faia mea lelei mo le Atua ma ona uso a tagata ae e le iai fua o le Agaga?  
1 Koronito 13:1-3
10. O le a le mea e faaali atu ai e moni lo tatou kerisiano? Mataio 7:20-23
11. E faapefea le olaga o le tagata soifua e le o iai fua o le Agaga?  
Kalatia 5:19-21
12. E faapefea foliga faaalua o le Kerisiano o loo iai "tulaga faa-Atua" o loo famatalaina mai e Paulo i ona po mulimuli? 2 Timoteo 3:1-5
13. O le a le mafuaaga o le a le maua ai e kerisiano fua o le Agaga i o latou olaga? 2 Timoteo 3:5
14. O le a tala a Iesu ia i latou e ta'ua o kerisiano ae e le o iai fua o le Agaga i o latou olaga pe a toe afio mai o Ia? Mataio 7:23
15. O le a igoa e faaigoa ai e Iesu latou nei e le o fua mai i fua o le Agaga i le faataoto o taupou e to'a sefulu? Mataio 25:1-12
16. I le faataoto i taupou e to'a sefulu, o le a le mea na eseese ai taupou valelea mai taupou popoto?  
*Note: O le suau faaleoleo o le papatisoga lea a le Agaga Paia.*

## TALOSAGA MOLIA

- Ole atu i le Atua ina ia:
  - Papatisoina oe e lona Agaga
  - Faaalia uma fua o le Agaga i lou olaga
  - Faamanuia i latou o loo i lau lisi tatalo

# ASO LONA 9

## SAVALI I LE AGAGA

O le faatuatua o le auga lea o mea uma lava tatou te manumalo ai. O le faatuatua tatou te mauaina ai le faamagalona. O le faatuatua tatou te maua ai le lavea'iga o tatou lagona ma o tatou tino mai le tiapolo. O le faatuatua foi tatou te ola manumalo ai i aso uma mai faaososoga e tuuina mai e satani i o tatou ala.

E pei ona tatou vaai iai, e lua lava mafuaaga e tuuina mai ai e le Atua i le tagata ua talitonu le faatumuliaina e le Agaga Paia. Muamua, o le malosiaga e molimau atu ai; ma lona lua, ia faaalii foliga o le olaga manumalo o Keriso, o fua ia o le Agaga Paia.

### TATOU TE MANAOMIA LE MALOSIAGA

E le o ia te'i tatou le malosi e maua ai fua o le Agaga i o tatou olaga. O le pule ma le malosi e maua mai lea ia Keriso ma lona Agaga ua nofo mau i o tatou loto.

O le faatasi mai o Keriso ia i tatou e ala mai lea i le papatisoga a le Agaga Paia o se mea e manaomia ina ia faaali atu ai fua o le Agaga i o tatou olaga. Ae peita'i, o se lesona faigata tele lenei e aoa'oina. Ia tatou iloa le tatou faalagolago tele ia Keriso ma lona Agaga ina ia atina'e ai le amio a Keriso pe afai e iai so tatou faamoemoe tatou te manumalo i vaega ia o o tatou olaga. O le ki o le tatou mauaina o foliga o Keriso o le faataga lea o le Agaga ia fua mai ona fua i o tatou olaga. A tatou taumafai e maua fua ia i lo tatou lava malosi, ailoga a tatou manumalo i le tiapolo ma ana mailei i finauga nei tatou te fetia'i pea i lea aso ma lea aso?

Poo le a lava le tele o lo tatou taumafai; poo le a foi le tele o lo tatou naunau, tatou te le mafaia ona maua fua o le Agaga i o tatou olaga mai lo tatou lava malosi. Ua na o le Agaga lava e mafai ona tupu ai lena mea. E mafai ona tatou faatauaina le papatisoga a le Agaga Paia. E mafai ona faia uma lava galuega ia e pei ona manaomia ia faalelei ai tatou. Ae a le faatinoina ma faamatala atoa o tatou loto ia pulea ai i tatou e le Agaga Paia, tatou te le maua lava fua o le Agaga.

### FAATUATUA, UA NA O LE FAATUATUA LAVA

E faapefea la ona mafai ona tatou faaali atu foliga o Keriso i o tatou olaga? Tasi lava, ma e na o le tasi lava le auala; o le Agaga ma le faatuatua i folafolaga a le Atua! E tatau ona tatou ola i le olaga faakerisiano i le auala e pei ona tatou ulufale mai ai i le olaga faakerisiano, e ui lea i le faatuatua.

“O lenei, faapei ona outou talia o le Alii Keriso Iesu, ia savavali ai outou o ia te ia.” (Kolose 2:6).

E faapefea ona faaolaina i tatou ma faailoa atu ua amiotonu? E ala lea i lo tatou faatuatua ia Keriso Iesu. E faapefea ona tatou mauaina le faamagaloga o a tatou agasala? E ala lea i le faaali o a tatou agasala ma ia faatuatua e faamagaloina (1 Ioane 1:9). E faapefea ona tatou iloa ua tatou maua le ola e faavavau? E ala lea i le faatuatua i folafolaga a le Atua (1 Ioane 5:11-15). O le olaga ma le faatuatuga sili foi lea e tatau lava ona maua i o tatou olaga faakerisiano; aua tatou te ola i le faatuatua pe afai o tatou o ni kerisiano moni.

“...a e ou te le toe ola a’u, a o Keriso o loo ola i totonu ia te a’u; ...ou te ola ai lava i le faatuatua i le Alo o le Atua...” (Kalatia 2:20).

O le faatuatua o le talitonu lea e faia e le Atua mea na ia fetalai mai na te faia. A feapea na folafola mai e le Atua na te faatumulia oe i lona Agaga pe a e ole atu, ia e mautinoa o le a faataunuuina lava lea mea (Luka 11:13). E le o se lagona le mea lea, ae o se mautinoaga o le faatuatua. E te maua le Agaga Paia pe a e ole ia te Ia e faataunuuina lana folafolaga; e faataunuuina lava e pei ona Ia folafola mai.

E faapea foi le olaga o le kerisiano. E faaalua lava fua o le Agaga Paia i o tatou olaga pe afai tatou te talitonu e faia lea mea e le Agaga.

## MAFUTA IA KERISO

Na faaoga e Iesu le manatu o lala vine e faamatalaina ai le tagata faatuatua ma Ia (Ioane 15). Fai mai Iesu o Ia o le vine a’o le au faatuatua, o lala i latou. Na fetalai mai foi o Ia a pipii atu le au faatuatua ia te Ia, ona fua mai ai lea o ni fua lelei i le olaga o le tagata faatuatua. O le lala ua na o se sootaga e auala mai ai le malosiaga ia maua ai fua lelei e le lala. O le mea foi lea e tupu i le tagata faatuatua. E fua mai fua o le Agaga, o le amio foi lea a Keriso, pe a faatasi atu ia te Ia. E faapefea la ona tatou mafuta atu ia Keriso? E ala lea i le tatou faatagaina o le Agaga Paia faatasi ai ma le Afioga a le Atua i o tatou olaga, (Ioane 15:7; 14:17-18).

E faapefea la ona tupu lenei mea i o tatou olaga? Se’i fai la se faata’ita’iga o se kerisiano e ita gofie. A tupu loa se mea e masani ona oso ai lona ita, ma taumafai lava ia e taofi lona ita, pau lava le mea e fai o le talitonu e faaalua lava e le Atua ia te ia lana auala e pulea ai lona loto ma ola ai i le talitonuga lea. E amata lona aso i se tatalo faapea: “Le Alii e, faatumu mai a’u i lou Agaga i lenei aso ma faaali mai fua o le Agaga i lo’u olaga. Ou te faafetaia lau Afioga ona o le faatagaina fua o le Agaga ia faaalua atu i lo’u olaga, ae maise le fua o le pulea o lo’u loto ina ia aua ai le toe oso lo’u ita i lenei aso.” A tula’i mai se tulaga e ono oso ai lea ita, e suia lava lea manatu ma le faaososoga ae fesili loa ia Keriso ina ia faaali mai Lona loto maualalo ma Lona filemu, ma faafetaia foi le Atua ona o Lona foai mai ia te ia le malosia e teena ai le loto ita, ae maua le filemu. O le a le finau ma lena faaososoga poo lona loto ita. Pau lava le mea o le talitonu i le Atua na te faia le mea na ia folafola mai o le a Ia

faia, ma galulue ma le Agaga ina ia le tumau lona mafaufau i le faaososoga lea na tupu e masani ona oso gofie ai lona ita.

O le pulea lelei o le loto lea na faaali mai e le Atua na aumaia e Keriso lava ia, o le o loo soifua i totonu o le tagata faatuatua, e ala mai i le papatisoga a le Agaga Paia. O le uiga lea o le “savavali ma le Agaga”.

“Ou te fai atu, ia outou savavali i la le Agaga, ona le faia lea e outou o le tu’inanau o le tino.” (Kalatia 5:16).

O le savavali ma le Agaga o le “ta’ita’iina” foi lea e le Agaga (Kalatia 5:18). A tatou savavali ma le Agaga poo le ta’ita’iina e le Agaga, o le valaauina foi lea o le Agaga tatou te amataina le aso faatasi ma ia. Ona tatou iloa lea o loo faatasi mai o Ia ma i tatou; tatou te lagonaina ai le uunaiga ma lo tatou faalagolago pea ia te Ia mo le manumalo mai i faaososoga. O le uiga foi lea na tusi mai ai Paulo “Afai ua tatou ola i le Agaga, ia tatou savavali foi ma le Agaga.” (Kalatia 5:25).

E le mafai ona tuu eseeseina mai le Agaga ma le Afioga a le Atua, o le Tusi Paia lea, mai le savaliga a le tagata Kerisiano. E faaaoaga e le Agaga le Afioga a le Atua e faamalamalamaina ai o o tatou mafaufau i le finagalo o le Atua mo i tatou. O le afioga a le Atua e ta’uina mai ia i tatou le sa’o ma le sese, ma e faaali mai ai foi pe faapefea ona tatou galulue ma le Atua i o tatou olaga i aso taitasi. E pei o lenei: o le kerisiano e pei ona talanoaina muamua e uiga i lona ita gofie, e maua lona aoaoga i auala e fo’ia ai lea tulaga leaga mai Lana Afioga, faapea auala e taofia ai le tupu pea o lea tulaga. O le a iloa ai foi le taimi o lea faaososoga ia ita; o se mea e sese, o se mea ua na o satani e mafua mai ai, ona liliu loa lea i le Atua mo se manumalo. E iloa mai le Tusi Paia ia faatuatua’i mea leaga ma mea sese aua o mea lava ia a satani, o faaososoga uma lava ma agasala.

“Le au uso e, o le toe upu lenei; o mea uma ua moni, o mea uma ua ta’uleleia, o mea uma ua tonu, o mea uma ua mama, o mea uma ua matagofie, ma mea uma ua logoleleia, afai foi o se isi amio lelei, po o se tasi mea e viia, ia outou manatunatu i ia lava mea.” (Filipi 4:8).

## TAUA O LE MAFAUFAU

Ua tatou maua mai le Tusi Paia o le agasala e amata mai lava i le mafaufau. O le mea lea na fai mai ai Paulo:

“Aua foi tou te amio faatasi ma le lalolagi, a e peitai ia liliuina i le toe fuataiina o outou loto...” (Roma 12:2).

E finau pea satani ina ia maua o tatou loto; o le mea lea ia muamua ona tatou manumalo i o tatou lava loto ma mafaufau. Afai tatou te faatali seia oo mai faaososoga ina ia maua le manumalo i ia faaososoga, ua na o i latou lava e malolosi ona tetee atu i ia faaososoga atonu e manumalo ai, ae e le o taimi uma; ma o lea foi manumalo pe afai e maua, o le manumalo o le tino ae le o le Agaga. O manumalo ia o galuega mamate. Ua na o manumalo e

maua mai i le Agaga o manumalo moni ia. O manumalo ia e mua'i maua i o tatou loto ma tatou ola ai pe a oo mai faaososoga.

Na silafia e Iakopo le taua o le loto pe a feagai ma faaososoga:

“a ua taitasi ma faaososoina, pe a tosina ma maileia i lo na lava tu'inanau; pe a to le tu'inanau ona fanau mai ai lea o le agasala; a matua le agasala ona fanaua mai ai lea o le oti” (Iakopo 1:14-15).

O le faaososoga e maua mai lava lona tali i o tatou natura agasala. E iai lo tatou saolotoga e filifili ai. E mafai ona tatou tali atu iai mai o tatou lava loto, ma e oo ina manumalo ai o tatou uiga agasala, pe mafai foi ona tetee i lea faaosoga ae tuu atu o tatou loto i le Atua na te pulea ma manumalo ai i lea faaosoga, ona tatou faafetaia ai lea o le Atua. O le taua e amataina lava lea i o tatou loto ma mafaufau; o iina e manumalo pe faiaina ai foi.

E faapefea la ona tupu lenei mea? Se'i tatou vaai i se alii faaoga 'ava oona ma onaona e faaigoa ia Simi. Ua iloa lava e le alii o Simi mai le afiga a le Atua o le 'ona e sese, ma o le faaogaina foi o 'ava oona e faaleagaina ai lona tino. Ua tuuina i lona loto e le Agaga Paia le faanaunauga ina ia taofi lea amioga o le 'ona. Ona taumafai malosi ai lava lea o ia e taofi lea amio. Ae paga lea; a lutia loa Simi i faafitauli ma puapuaga o le olaga nei, ma ua foliga ua mamafa le avega o faaletonu o le olaga, o le faaososoga tele lava e i'u ai lava ina faigofie ai ona toe tagofia le 'ava e faapea e maua ai sona mapusaga o nei faafitauli. Na te vaaia faasalalauga o pia ma 'ava malosi; na te toe manatua fale ava sa masani ona uia ma afe iai pe a maea galuega; e gaua'i pea i faaososoga ua le manumalo iai. O se faaloto vaivai lea tulaga. Atonu na te ole atu i le Atua ina ia manumalo o ia i nei faaososoga ae ua mamao ia mai nei mea ua toilalo ai. O ana folafolaga uma lava o le a suia le olaga ia lelei ua na o ni folafolaga fai fua ia; ma ua oo ai lava ina foliga ua manumalo le tiapolo toe leai se malosi e tetee ai lea vaivaiga. O le mea moni lava, ua leai se malosiaga ua iai ia Simi. O a lava ana folafolaga e fai ua na o ni upu fai fua ia. Aisea? E le i iloa lava e Simi le mea o loo tauina le taua ma e mafai foi ona ia manumalo ai, o lona mafaufau lea. Ona tau ane ai le o Simi i le faitauga o le Tusi Paia e faapea:

“Aua o e i la le tino e loto atu i latou i mea a le tino; a o e i la le Agaga e loto atu i mea a le Agaga.” (Roma 8:5)

O le tulaga lea ua iloa ai foi e Simi e sese le auala ma mea sese o loo faamuamua i lona mafaufau. Na tele atu lona manatu i le faaososoga e toe tagofia le 'ava. Na alu lona malosi e tauivi ai ma tuinanau o le agasala e faaoga le 'ava e maua ai lona mapusaga mai ona puapuaga. A'o lenei la, ua ia faato'a iloa e tataua ona tuu atu lona mafaufau i le faanaunauga a le Agaga Paia mo ia. Ona tatalo ai loa lea e faapea:

“Le Tama e, faamagalalo mai la'u agasala o le pulea lea o a'u e le 'ava. Faafetai mo le faamagaloina o a'u. Faatumu a'u i lou Agaga ma faaali mai fua o le Agaga i lo'u olaga. Ae faapitoa ona ou mauaina le pulea o

lo'u loto ia ou manumalo i le 'ava. Faafetai mo le aumaia lea ia te a'u o le manumalo mai le mai le tiapolo ma le faaaoga o le 'ava malosi. ”

O lea la, mo Simi, ua le gata i le tatalo, ae ua ia iloa ma manatua ua fai mai le Tusi Paia ia tuu atoa lona mafaufau i le mea ua mana'o ai le Agaga mo ia. Ua liliu ese lana vaai i faasalalauga o 'ava ma mea faapena. Ua faatumu lona mafaufau i folafolaga a le Atua e manumalo ai; e faaalu lona mafaufau i folafolaga nei a le Atua i taimi uma lava e tau osofa'i mai ai le tiapolo ma le faaaoga o le 'ava. A lutia loa le olaga o Simi i faafitauli ma mafatiaga o le olaga nei, ona mafaufau loa lea i folafolaga a le Atua e mafai lava ona ia manumalo ma e siitia ia e le Atua mai faigata o le toilalo ma le agasala. E faatauaina foi i lona loto folafolaga a le Atua o le a pulea lava e ia lona lava loto faatasi ai ma le fesoasoani mai a le Agaga Paia e manumalo ai. Na te le faatagaina sina avanoa lava e mafaufau ai i se mea e latalata i tuinanau o le tino ae na o faamanuiaga mai le Agaga Paia.

O le manatu lava e faigofie. O mea e faaalu ai o tatou mafaufau ma manatunatu iai, o mea foi ia tatou te faia. O le loto ua faatau tuinanau ma uiga agasala o le tino e faatumauina lava faaososoga e oo mai. O le tulaga ia Simi, o le 'ava ma le 'ona. Mo nisi, e le taumate o se isi tuinanau, o mea ai, o tupe, o le matamata i taaloga, o ata tifaga, poo nisi lava mea faapena. Ae o le mafaufau ua faatau le Agaga ma le Upu moni, faapea fua o le Agaga, e faanaunau lava le Atua ina ia tatou mauaina le manumalo i le tiapolo ma ana agasala. (Kalatia 5:22-23).

## O LE TOE IAI O LE FAATUATUA

O le faatuatua o le ki lea o le suiga e manaomia i o tatou olaga. Ia iai le tatou talitonuga atoatoa e faia e le Atua le mea na Ia folafola mai na te faia. Na tatau lava ia Simi ona talitonu e faaali mai lava le Atua lana auala e pulea ai e ia lona olaga mai faaososoga. Na tatau lava ona talitonu o loo soifua Keriso i totonu ia te ia ma e faaalua lava le maualuga o Lana amio i lona olaga. E tatau foi ona iai lo tatou talitonuga tatou te manumalo i le agasala.

“Ia faapea foi la outou taofi, ua outou oti i la le agasala, a ua outou ola lava i la le Atua i lo tatou Alii o Keriso Iesu. O lenei, aua ne'i malo le agasala i o outou tino auga vale, i lo outou gauai i ai i ona tu'inanau.”  
(Roma 6:11-12).

O le manumalo i faaososoga ma le agasala o se mea e mafai ona tatou maua pe a tatou talitonu o le taua i o tatou loto. O le manumalo e maua lea i o tatou loto ma ua folafolaina mai pe afai ua tuuina atu o tatou loto e pule ai le Agaga Paia.

O le mea lea e matua'i taua ai tele le faatumulia o tatou loto e le Agaga Paia. A aunoa ma le iai pea o Ia i o tatou loto, tatou te le maua lava le manumalo ua folafola mai e le Atua mo i tatou. E le faapea foi o le a le toilalo le kerisiano ua faatumulia e le Agaga. Ae ui i lea, atonu e mautinoa lava, e le tupu soo lena mea; ma afai e toilalo, e vave lava ona toe tu i luga ma

soifua i se olaga manumalo. E le faavaivai gofie; e tuputupu a’e lona malosi i lea aso ma lea aso i le la savaliga ma Keriso, e pei foi ona faaali mai le savaliga a le Atua ma Enoka:

“Na la foea’i foi, o Enoka ma le Atua; ua le iloa foi e ia, aua ua avea o ia e le Atua.” (Kenese 5:24).

## O FESILI E FAATALATALANOA

1. O le a se ki taua lava i lo tatou manumalo ia Satani?
2. O a ni mafuaaga e aumaia ai e le Atua le papatisoga a le Agaga Paia i le tagata kerisiano?
3. O a ni fua o le Agaga Paia e maua mai ona o le papatisoga a le Agaga Paia?
4. Mata tatou te maua fua o Agaga Paia mai a tatou lava taumafaiga?
5. Fai mai e a Paulo e uiga i le faaauauina o le olaga kerisiano i le tagata faatuatua? Kolose 2:6
6. E faapefea ona maua e le Kerisiano le faamagalona ma le ola e faavavau mai ia Keriso? 1 Ioane 1:9; 5:11-15; 2 Peteru 1:4
7. Fai mai e a Paulo e uiga i le soifua o le olaga kerisiano? Kalatia 2:20
8. O le a se faaitaiga mai le natura na faaoga e Iesu e faailoa mai ai le soifuaga faakerisiano ma Ia? Ioane 15:5
9. E faapefea ona faaali mai e Keriso le ola faakerisiano i lo la va ma Ia? Ioane 15:5
10. E faapefea ona mau o Ia ma tatou faapea foi tatou ia te Ia? Ioane 15:7; 14:17-18
11. Ina ia tatou ola i le soifuaga manumalo, o le a se mea ua faimai ai Paulo e tatau ona tatou faia? Kalatia 5:25
12. O le a le mea e faaogaina e le Atua ina ia faateleina ai lo tatou malamalama i lona finagalo mo i tatou? Salamo 119:105
13. A faosoosoina i tatou, ia aua ne’i tumau pe le mafaufau i le faosoosoga ae mafaufau i le a? Filipi 4:8
14. O fea e amata mai ai uma lava faosoosoga? Iakopo 1:14-15
15. O le a le mea tatou te mananao e faia e le Atua i o tatou loto? Roma 12:2
16. E faapefea ona “faafou” e le Atua o tatou loto? Esekielu 36:26-27
17. E faapefea ona faamatalaina mai e Paulo le eseese o le olaga agasala ma le kerisiano e soifua i le olaga usiusitai i le Atua? Roma 8:5
18. O le a se mea taua e tatau i le kerisiano ona maua ina ia manumalo ai i le agasala? Roma 6:11-12
19. O le a se mea e tatau lava ona iai i le loto o le kerisiano ina ia faatumauina ai pea le manumalo ai le agasala?



## FAATAUAINA I TALOSAGA

Ole atu i le Atua ina ia:

- Papatisoia oe e lona Agaga
- Taitaiina oe i le lua savaliga ae le o oe lava ia
- Faamanuiaina i latou o loo lau lisi tatalo

# ASO LONA SEFULU

## O LE TATALO MA LE PAPATISOGA A LE AGAGA PAIA

A tatou maua le papatisoga a le Agaga Paia, o le a faatupu teleina lo tatou faanaunauga ina ia tatou mafuta atili atu e ala i talosaga i lo tatou Tama oi le lagi. E mafai lava ona tatou talia lea faanaunauga mai le Atua pe aua foi le amanaia lea faanaunauga ma avea ai tatou ua na o ni kerisiano ae le o ni kerisiano e masani i le tatalo. Ae peitai, afai tatou te fia mauaina le loloto o mea mai le Atua, le faatumulia o o tatou olaga ia Keriso, ia tatou tuuina atu i tatou o ni kerisiano soifua ma naunau i le olaga tatalo. Afai tatou te fia molimauina ma vaaia mea tetele e mafai e le malosiaga o le tatalo ona fai i o tatou olaga, mea e sili atu i mea uma lava e aumaia e satani e faasalavei ai o tatou olaga fia taumafai, ona tataua ai lava lea ona faaaluina o tatou taimi e fesootai ai ma le Atua e ala i le tatalo.

### TELE LE SAOLOTOGA I MEA UMA UA MAUA

Ua lava lava ona tatou iloa le taua o le tatalo. Ua tele foi taimi tatou te taumafai ai ia maua avanoa faapitoa mo talosaga, ae o le tele foi o nei taimi o taimi o faigata ma puapuaga ua oo mai ia te i tatou ma e le umi tele ai la taimi o talosaga. O le tele lava foi o taimi ua tatou manatu ua tatou manuia lava tatou e oo lava foi i le ekalesia ma le galuega a le Atua. Ua tatou faamoemoe lava i lo tatou malosi e faia ai le galuega a le Atua. Ua tele ni fuafuaga ma polokalama ua tatou faia. Ua manatu ane lava i tatou ua lelei ma ua tatou faamoemoe i la le tino e faia ai le galuega a le Atua. Mai lona alofa tunoa, ua foliga ai ua faamanuiaina o tatou taumafaiga vaivai. Ae peitai, o loo faatali mai faamanuiga tetele atu lava pe a na tatou faatagaina le papatisoga a le Agaga Paia e taitaiina i tatou. Ua na o lea le tulaga e avea ai o tatou fuafuaga uma o fuafuaga a le Atua, faapea mea uma tatou te faia o faatinoga mai le Atua ia.

Na tele ma loloto le malosiaga na iai i le mafutaga a Iesu ma lona Tama. O lenei mafutaga vavalalata na faapea mai ai Iesu:

“O a’u nei ma le Tama, e tasi lava i ma’ua.” (Ioane 10:30)

O mea uma lava la na fai e Iesu na faia lava i lalo o le taitaiga a lona Tama. O a na upu na tautala ai, o a na mea sa fai, sa faia lava ma le malosi na tuuina mai e le Tama. O lea na ia fetalai mai ai:

“E te le talitonu ea o a’u o i totonu o le Tama, o le Tama foi o i totonu ia te a’u? O upu ou te tautala atu ai ia te outou, ou te le tautala fua na o a’u; a o le Tama o loo nofo i totonu ia te a’u, o ia lava na te faia ia galuega.” (Ioane 14:10).

Na faapefea ona maua e Iesu le mafutaga matuai vavalalata lava ma lona Tama? Na ala lea i le tatalo. Ina ua papatisoina Keriso i le vai, sa tatalo o Ia (Luka 3:21). I le tali mai i lana tatalo, na alu ifo ai le Agaga Paia ma na faapepepepe i luga a’e o Ia. Na Ia maua le papatisoga a le Agaga Paia; o le tali lea o lana tatalo. I le maea ai ona maua le papatisoga a le Agaga Paia, na feagai ai loa o Ia ma le 40 aso na anapogi ma tatalo ai i le vao. Ina ua maua le mafutaga vavalalata ma lona Tama, na amataina ai loa Lana galuega na ia sau ai i le lalolagi e fai. Ua faamalosi o Ia e manumalo ma faa-faia’ina Satani.

#### O FAATA’ITA’IGA A IESU

E matua’i tele lava taimi ua tatou molimauina mai le Tusi Paia le olaga tatalo o Iesu a o galue o Ia i le lalolagi. A uma ona a’oa’o motu o tagata ma faamalolo o latou ma’i, o lana masani o le atu toatasi i le vao ma tatalo (Luka 5:16). Ae le’i valaauina lona au soo e to’asefulu ma le toa lua, na alu le po o tatalo o Ia i lona Tama (Luka 6:9). Na uunaina malosi lava e le Agaga Paia Iesu ina ia mafuta atu i lona Tama e ala i le tatalo. Sa ia maua le loloto o le taua ma le pa’i mai o lona Tama i taimi faapitoa o ana talosaga faifai pea. O taimi foi ia na Ia iloa ai e tasi ai o Ia ma lona Tama, ma maua ai le malosi e feagai ai o Ia ma lana galuega na sau ai i le lalolagi.

Na mauaina e Iesu le manumalo i lona fili o Satani i taimi o lana fesosotaiga ma lona Tama i talosaga. Tatou te faitauina taimi na faafesaga’i ai Keriso ma Satani i olaga o alii ma tamaitai faapea le natura, e pei o le ulufia i temoni, ma’i, oti, afa, ma isi tulaga faigata na feagai ai ma Ia. Tatou te le mauaina i taimi ia o tau tatalo Iesu i lona Tama mo se laveaiga poo se malosi. O taimi ia ua uma ona maua e ia le malosiaga mai lona Tama ona o taimi o talosaga sa faia na o ia lava ma fesootai atu ai i lona Tama. O taimi uma lava e fetai’i ai ma Satani ma ana faaosoosoga, e tali lava o ia ma fetalai mai lona lava fofoga i le malosi ma le pule mai lona Tama, ona faatoilaloiana ai lea o Satani ma a na taumafaiga sese. O fetalaiga a Keriso na tulia ese ai temoni, faamalolo ma’i, faatutu mai e na feoti, ma faamalu afa.

E manino lava lesona ia. Na faamautuina le tasi o Iesu ma lona Tama, ma maua e ia le malosiaga e manumalo ai i ona fili, e ala i taimi faapitoa na ia faaogaina mo talosaga. I le maea ai o taimi tatalo faapitoa nei, na maua ai e

Ia le malosiaga ona o le tasi o Ia ma lona Tama. Na iloa e ia le faatasi mai o lona Tama i soo se mea na te faia. O taimi uma lava e faasalavei ane ai Satani, ua sauni o Ia e feiloa'i ma lu'itau uma mai le fili, ma manumalo ai lava. Aisea? Ona o lona olaga tatalo.

#### O FAATAITAIGA A LE AU SOO FAAPEA LE FEAGAIGA TUAI

E le'i galo faataitaiga a Iesu ma lona olaga tatalo e lona au soo. O talosaga o se tasi lea o mea na faaaluina tele ai o latou taimi a o faia a latou galuega ma Iesu. Ina ua tupu tele le ekalesia ma ua manaomia tele foi taimi mai le au aposetolo, na tofia ai loa tiakono ina ia fesoasoani i galuega fai i ekalesia. Na iloa lava e le au aposetolo le manaomia o latou taimi e tatalo ai:

“A o i matou, matou te finafinau i le talotaloga ma le auauna i le upu.”  
(Galuega 6:4)

Na taitaiina e le Atua ona tagata i le feagaiga tuai ina ia tatalo faatolu i le aso, e pei ona fai mai ai Tavita:

“O le afiafi, ma le taeao, ma le tutonu o le la, ou te tagi ai, ma ou uio; ona faafofoga mai ai lea o Ia i lo'u leo.” (Salamo 55:17).

Na mulimuli foi Tanielu i lea masani:

“Ua iloa e Tanielu ua tusia le tusi, ona alu atu ai lea o ia i lona fale, ua avanoa faamalama o lona potu e faasaga i Ierusalema, ua ta'i faatolu i aso ona tootuli o ia i ona tulivae, ma tatalo ma faafetai i luma o lona Atua, faapei ona masani ai o ia.” Tanielu 6:10.

I le feagaiga fou, pei foi ona iai i le feagaiga tuai, tatou te maua ai e faatolu taimi ua atofaina mo talosaga; o le itula e tolu, o le ono, faapea le iva, e faauiga ia o le 9 i le taeao, 12 i le aoauli, ma le 3 i le afiafi. I le tusi o Galuega tatou te mauaina ai le au aposetolo o loo latou tausia ia taimi tatalo (Galuega 3:1; 10:9).

O alii ma tamaitai o le uluai ekalesia o i latou nei na malosia tele i le tatalo, e pei ona tusia e faapea:

“Ua tumau pea i latou i le mataupu a le au aposetolo, ma le mafuta faatasi, ma le tofitofiga o le areto, ma talotaloga” (Galuega 2:42).

O uluai au faatuatua nei o le ekalesia na tatalo i latou i le malumalu, i o latou fale, faapea fafo i le siosiomaga o natura:

“Ua o foi i matou i le aso Sapatu i tua o le aai i le auvai o le vaitafe, o le mea ua masani ona fai ai o tatalo; ua nonofo foi i matou i lalo ma tautala atu i fafine e na potopoto ai” (Galuega 16:13).

O le aposetolo o Paulo o se tagata lava o le tatalo. Na tatalo ia i le ao ma le po mo le au faatuatua (1 Tesalonia 3:10). I se tasi o taimi a'o aga'i atu o ia mo talosaga, na ia tulieseai ai foi le tiapolo mai lea tamaitai (Galuega 16:16-18).

O le au aposetolo foi o ni tagata tatalo i latou. O latou o nisi ua maua malosiaga mai le Atua. O le au faatuatua o le uluai ekalesia o nisi o kerisiano na malosi i le tatalo. Ona o le tulaga lenei, na faaaogaina latou e le Atua e faatinoina ai ni galuega maoae tele lava. Ona o le tatalo, ua mafai ai nei ona tufatufa atu ai le tala lelei i le lalolagi atoa. (Kolose 1:23).

#### IESU, LE TAMA, MA I TATOU; IA TASI I TATOU

Tatou te mananao ea i le malosi ma faamanuiaga na maua e le au aposetolo o le uluai ekalesia? E tatau la ona pei i tatou o alii ma tamaitai ia pei o i latou, o nisi e malosi e tatalo. E le na o se tatalo mo se minute faatasi i le aso, a ia tatou iloa ona tatalo faaleaunoa i aso uma. Ia tatou iloa faaoga fautuaga a Paulo: “ia tatalo e le aunoa” (1 Tesalonia 5:17). Ia siosiomia tatou i se siosiomaga o talosaga e le aunoa. O le auala lea e mau ai pea Iesu ma i tatou e le aunoa. Na tusia e Elena Uaita manatu e faapea:

“E mafai ona tatou tuu ese ni amioga le lelei i nisi taimi tatou te tuu ese ai Satani; ae a leai se sootaga ma le Atua, e ui lea i le tuuina atoa o o tatou tagata ia te Ia i taimi uma ma e le aunoa, e mafai lava ona tatou toilalo i auala a le tiapolo. A leai se tatou sootaga faaauau pea ma Keriso, e mafai lava ona tatou pa’u i faaososoga a le fili, le tiapolo, ma e iu lava i le gataaga.” (*The Desire of Ages*, p.324).

Na iai le “tasi” faapitoa a Iesu ma lona Tama. Sa iai foi le “tasi” faapitoa a le au soo faapea ma le uluai ekalesia ma le Alii. O loo faaavanoa mai pea foi lea tulaga mo le au faatuatua i le aso. Na silafia lelei lava e Iesu e manaomia le “tasi” ma le Tama ina ia manumalo ai i le tiapolo. O le mea foi lea na tatalo ai Iesu i lona Tama e faapea:

“Ou te le ole atu ina ia e ave ese ia te i latou i le lalolagi, a ia e tasi ia te i latou ina ne’i leaga. E le faapito la’u tatalo mo i latou nei, a o i latou foi e faatuatua ia te au ona o la latou upu; ina ia tasi i latou uma, faapei o oe le Tama o i totonu ia te a’u, o a’u foi o i totonu ia te oe, ina ia tasi i latou i totonu ia te i ta’ua; ina ia talitonu le lalolagi ua e auina mai a’u. o a’u o i totonu ia te i latou, o oe foi o i totonu ia te a’u, ina ia faaatoatoaina i latou ia tasi; ina ia iloa ai foi e le lalolagi ua e auina mai a’u, ma e alofa mai ia te i latou, faapei ona e alofa mai ia te a’u.” (Ioane 17:15, 20-23).

Na silafia lelei lava e Iesu o le tagata faatuatua, pe afai e tasi ma le Tama ma lona Alo e mautinoa lava le manaomia ina ia tasi i latou ma le Atua e mafai ai ona teena ma manumalo i le tiapolo. Na mafai lava e Iesu ona teena ma manumalo ia Satani ma lona malosi i soo se auala lava na femaliua’i ai Iesu ona o lona tasi ma lona Tama. A vagana ai le tasi o i tatou ma Keriso i o tatou lava olaga, ona faatoa mafai lea ona tatou manumalo ia Satani ma ana faaososoga. Ia tasi i tatou ma le Atua, faapea Keriso, e ala i auala faapitoa tatou te mafuta atu e ala i le olaga tatalo. E le o se mea lilo le manaomia ia

tasi i tatou ma Keriso, e ala lea i le tatalo, ona tatou maua lea o le manumalo i o tatou olaga.

#### O LE MANAOMIA O LE PAPATISOGA A LE AGAGA PAIA

O le mafuaaga tonu lava o le manaomia o le papatisoga a le Agaga Paia ona a le faatumulia le kerisiano e le Agaga, ona le mauaina foi lea e le kerisiano se faanaunauga mo se mafutaga vavalalata ma le Atua. E ui lava ina e mafai ona iai se faanaunauga mo se mafutaga e ala i talosaga, ae e faataataa aluga ma e vave foi ona mavae lea tulaga. O le a faia talosaga e foliga o se tiute poo se mea na ona faataunuu ae leai se loloto o se faanaunauga e tatalo.

O le liligiina ifo o le Agaga ia faatumulia ai le tagata talitonu e faatauina ai le sootaga ma le faanaunauga mo Iesu. Pei lava ona fai mai Paulo: “Ina ia ou iloa o Ia, ma le mana o lona toe tu mai...” (Filipi 3:10).

Ao tatou tu lata atu i le toe afio mai o le Alii Faaola, o le a tele foi taimi e faaogaina e le tagata ua faatumulia e le Agaga Paia e mafuta atu ai ia Keriso e ala i le tatalo; e le na o ni minute, a o itula. E le na o ni talanoaga faatopetope ae o fesootaiga e loloto ma taua. Ia tatou iloa ona faalogo mo le leo malu o loo fetalai mai e faaali mai ai le finagalo o le Atua mo i tatou. A o tatou sauni atu e tau ma Satani ma ave i luma le feau, e tatau lava ina ia le aunoa ona taitaiina pea i tatou e le Atua, e pei lava ona faia e Iesu. O le mea tonu lava lea na talanoa mai ai Iesu e faatatau o Ia lava o le Vine ae o lala i tatou:

“O a’u nei o le Vine moni, a o lo’u Tama o le galue vine Ia.... Ina tumau ia o outou ia te a’u, o a’u foi ia te outou. Faapei o le la e le mafai ona fua pe a na o ia, pe afai e le mau i le vine; e faapea foi outou, pe afai tou te le tumau ia te a’u. O a’u nei o le vine, o la outou. O le tumau ia te au, ma a’u ia te ia, o ia lava e fua tele mai; aua e le mafaia e outou ona fai o se mea e tasi pe a a’u le iai. Afai e le tumau se tasi ia te au, ona lafoaiina lea o ia i tua pei o le la laau, ma faapopoina, ona faapotopotoina ai lea e tagata, ma lafo i le afi, ua susunu ai. Afai tou te tumau ia te a’u, a tumau foi a’u upu ia te outou, o mea uma lava tou te manano iai, tou te ole atu ai, ona faia lea mo outou” (Ioane 15:1, 4-7).

#### TATALO UA FAIA ONA O SE MANAOGA

A iai se tulaga ua mauaina ai se mafutaga loloto ma le Agaga Paia i le olaga faaleagaga o se tasi, na te lagonaina lava le vaivai ma le maualalo o lona tulaga faaleagaga. O lea le tulaga e iu ai ina iloa le manaoga ia mafuta atu i talosaga ma le faamoemoe ia Keriso mo le malosiaga mai le lagi. O le alii o Etuati Payson, se alii faifeau i Amerika i tausaga o le senituri 1800’s, sa ia fai mai: “E le mafai ona e faia i se tagata mauoa e aisi e pei o se tagata mativa; e te le mafai ona e fai atu i se tagata o loo maona e tagi atu mo se meaai e pei o le tagata o loo galala i le fia ai; e pei foi ona e le mafai e se o loo solo lelei lava o ia ona olega ma tagi atu mo se avanoa e pei o le tagata mativa pe a manao i se mea.” Ua nao le vaai moni lava i le loto o le kerisiano lava ia na te iloaina ai le loloto o lona manaomia o le Agaga Paia e taitaiina lona olaga faaleagaga. E pei ona fai mai le alii o Etuati Payson:

“O le tatou iloa o le leaga o le agasala i o tatou lava olaga e faafetaui foi ma le tatou iloa o le manaoga o le mamalu faapea le paia faalelagi; o lea e le tatau ai i le kerisiano ona soona iai se lagona eleelea pe manatu faapea e le aoga iai le alofa o le Faaola, pe lagona foi ua le talafeagai ni faamanuiaga mo lona tagata. E pau le mea e ona tupu pe a iloa ifo le tele o le alofa o le Atua o lona manatu salamo lea ona o le le amanaia o le musumusuga mai o le Agaga Paia e talia le feau a le Agaga Paia i long olaga. O le salamo ona o le talia o le musumusuga a le Agaga Paia ma iloa le Keriso lea na ofoina mai lona lava soifua o se taulaga ola mo i tatou, o se faataitaiga matuai taua lea aua ua le iai foi lea o se avanoa e avea ai le tagata talitonu o se molimau atu i isi. O se tulaga faigata o le salamo ane ma faatagi atu i le Alii mo se faamagalona ona o le teena o lona alofa ae ua maimau avanoa e faaali atu ai i le Atua ua e talia lona alofa ma e manaomia ia tufa atu ana faamanuiaga.” (*Complete Works of Edward Payson*, p. 513-4).

O le malamalama o le tulaga leaga o loo iai o tatou tagata pe a faatusa i le mamalu o le Atua tatou te mauaina lava e ala mai lea i le faatumulia o tatou tagata e le Agaga Paia. O le lagona moni o le salamo mai le olaga agasala o le a faamaualugaina ai le taua o le talia o le musumusuga a le Agaga Paia. O le lagona “salamo” lea o loo tautala mai ai Paulo i le 2 Koronito 7:10. O le salamo lea e lagona ai le mafutaga vavalalata ma Keriso ma e faatupulaia ai foi le faalagolago ia te Ia mo le faaolataga lea ua ofoina mai e Keriso. O le loloto foi lea o le lauga a Keriso i luga o le mauga o loo faamatala mai i le tusi o Mataio 5:3-11). O i latou ua “fia aai ma fia inu i le amiotonu” e lagonaina lava lea tulaga o le galala i le itu faaleagaga, ma e loloto foi lona lagona o le salamo mai le leaga; o le tulaga agasala lea ua manaomia tele ai le tuuina atu o latou loto i le agamalu mai le Atua. Ua na o i latou lava ua iai i laasaga nei e tolu: galala mo le amiotonu, latou e faanoanoa, ma i latou e loto mauualalo, e iloaina le tulaga “galala mo le amiotonu” e iloaina foi le manaomia ia atiae ma maua le amio a Keriso ma lona alofa mama ma lona filemu ina ia mafai ona faamausaliina le amiotonu a le Atua ma iloa atu ai e tagata Keriso i o latou lava olaga. O le gaua’i o le tagata ona o le mafuta mai o le Agaga Paia e avea ai o ia ma se e molimau atu ai le manumalo i le agasala ma le tiapolo. O se molimau foi lea o i latou i le tupulaga o aso mulimuli e avatua le feau a le Atua i le lalolagi ua galala mo lona finagalo alofa. O i latou foi ia o le a mafai ona tutu atu e talia lona toe afio mai ina ia ave a’e faatasi i latou mo lona malo.

#### E MAFAI E LE TATALO ONA AUMAIA LE MANUMALO

Ua faatalitali nei e le tagata kerisiano faapea le ekalesia le manumalo e na o le Atua e maua mai ai. O le manumalo lea e maua mai i taimi o talotaloga ma le fesootaiga ma le Atua. Pe a tatou tutu a’e mai o tatou tulivae ina ua maea talosaga, ua tatou sauni foi e fetaiiai ma le fili, ona faato’a tatou iloa lea o le manumalo.

O talosaga faapenei e faailoa atu ai e le fanau faamaoni e talitonu i le malosiaga o le faatumulia e le Agaga o le Atua o le auala tonu lea e faafetaia'i ai satani, ma manumalo ai i ana faaososoga ma mailei. E le manumalo "faitotoa o seoli" ia te i latou. Latou te talepe puipui a le fili, o satani lea. E alu manumalo le feau o le tala ia Keriso Iesu. O alii ma tamaitai e faaolaina mai auala uma lava e ono osofaia ai i latou e Satani, poo le itu faaleagaga, faaletino, pe o tulaga tau i le olaga i aso taitasi. O temoni o le tuinanau o le tino, tuinanau o mata, o mitamitaga ma faamaualuga uma o le olaga e le mafai ona toe manumalo i le ua talitonu ma talia Iesu. O faaososoga o le matau'a, o le ita gofie, fevaevaeaiga, o le le loto faamagalo, ma mea uma na e le toe ofi i le loto o le ua faatuatua i le malosi o le Agaga Paia. O le faatumulia i le Agaga Paia e le toe loto vaivai ai ona o faama'i, o tiga o le olaga nei, poo mea e faalotovaivai ai le tagata ua le iai le Atua. Ae o le a avea le malosiaga mai le tala lelei ona ua le o toe pulea e satani le olaga ua manumalo ia Keriso. O le a toatele foi i latou o le a talia le galuega a le Atua i le lalolagi. O le a faaalua le malosi o le mana o le Atua e ala lea i auala eseese o le a folafolaina ai le feau mulimuli i le lalolagi, ma o le ofoofogia o faailoga o le mana e maua mai lea i le faatumulia o le tagata talitonu e le Agaga Paia o le a molimauina e le lalolagi uma ma o le a talitonu iai.

O a mea o le a tutupu ma vaaia ai ia tulaga i aso nei? Aua foi o i latou ua faatumulia i le Agaga o le a latou iloa le Atua i se auala faapitoa, ma o le a le toe iai se loto masalosalo e faia e le Atua mea ua ia fetalai mai na te faia, ma e taunuu lava. E le toe maluelue lo latou faatuatua, e mautu. O le a latou agai i luma e faia mea lelei ma avatu le feau ma le talitonu i ana folafolaga:

"E le aoga ia te ia i aso fai soo, pei o ia faitaulaga e muamua ona fai o taulaga mo ana lava agasala, ona fai ai lea mo agasala a le nuu; aua ua tu tasi lava ona faia e ia o lea mea ina ua avatua o ia e ia ma taulaga."  
(Eperu 7:27).

O le faia o le galuega o le faaolataga e le Atua e faaolaina ai le tagata talitonu ma le faatuatua mai puapuaga uma, ae maise ai le faaolaina mai i le agasala, o faamai, faapea tulaga uma o loo pologa ai tagata uma i le lalolagi nei. E faaeaea e le Atua ma le atoatoa e pei ona folafola mai. O i latou ua papatisoina i le Agaga ma mafuta atu ai ma le Alii e talitonu atoatoa lava ia te Ia ma le loto ma le agaga atoa. O lo latou faatuatua o le a avea lea ma mea e manumalo ai i tulaga uma e foliga faigata i le vaai a tagata talu ai ona o loo latou vaai i tulaga uma ma lo latou faatuatua mausali i le Atua. Poo le a lava osofaiga a le tiapolo, latou te le maluelue lava mai le talitonuga i le mana o le Atua.

O folafolaga a le Atua e mautinoa. A tatou le vaaia le faataunuuga o nei folafolaga, e le tuua'ia le Atua ae faasino lima lava tatou ia i tatou lava, e pei ona fai mai Paulo:

"E faapea foi le Atua, ina ua finagalo ai o ia e faailoa atili ai i e ua tofia i mea na folafolaina, o lana lava pule e le mafaia ona liua a ia faaopoopo i



ai le tauto, ina ia ia i tatou o mea e lua e le mafai ona liua, e le mafai ona pepelo ai le Atua, tatou te maua ai le faamafanafanaga tele, o i tatou luma...” (Eperu 6:17-19).

I le tusi o Kalatia 3:29, o loo ta’u mai ai e Paulo ia i tatou e faapea o le tagata talitonu ia Iesu o le suli ia o folafolaga a le Atua. O i latou uma ua papatisoina e le Agaga Paia, e mafuta i le Atua e ala i le tatalo fai fai pea; e iai le mautinoaga ma le talitonuga mautu i folafolaga a le Atua.

E te fia mauaina ea lea malosiaga mai le Atua e pei ona ia folafola mai? E te fia vaaia ea ua soloi pa ma motusia noanoaga a le tiapolo o loo e pologa ai? Ua Ia saili nei le faauuga a le Agaga Paia. Ia e gaua’i nei ma talia le musumusuga a le Agaga Paia; talia le olega mai e saili le Atua e ala i le tatalo i aso uma, ona latalata mai foi lea o Ia. Tumau ai i talosaga ma faalogo i le musumusuga ma le leo malu lea tatou te maua ai le mautinoaga o le malosiaga mai le Atua tatou te manumalo ai, e pei foi ona manumalo ai Keriso ia Satani. Ia tumau pea le mafutaga ma Ia i taimi uma, aso fai soo. E faataunuu ai foi fetalaiga a Keriso i lou olaga:

“E moni, e moni, ou te fai atu ia te outou, o le talitonu mai ia te a’u, e faia lava o ia o galuega ou te faia; e fai foi e ia mea e sili i ia mea, aua ou te alu i lo’u Tama ona o le Atalii.” (Ioane 14:12).

E te mauaina le Agaga e pei foi ona maua e Iesu. E manumalo foi e pei ona manumalo o Ia. E te mauaina foi le malosiaga e pei ona mauaina e Iesu. O le a soifua Keriso i totonu ia te oe ma o le a galue foi o Ia e ala atu ia te oe. E faamalepeina le malosi o satani i ou luma aua o le tatalo ma le talitonu, ma le faatuatua e taunuu ai folafolaga a Iesu. A e fetai’i ma le malosi o satani, e te talitonu ma tautala ma le mautinoaga mai ia Keriso, ona ave lea i lalo o le malosi a le tiapolo. E pei ona tusi mai ai Iakopo i le mea moni lea: “O le mea lea ia outou gaua’i ai i le Atua; ia outou tetee atu i le tiapolo, ona sola ese ai lea o ia ia te outou.” (Iakopo 4:7)

O le kerisiano ua faatumulia e le Agaga Paia ma ua malamalama i le uiga tonu o le olaga tatalo e matuai avea ia o le fili a satani ma lana pule i le lalolagi. O se faamatalaga a se tasi alii tusi tala e uiga i le taua tele o le tatalo, ua faapea mai:

“E sili atu le fefe o Satani pe a e tatalo nai lou olaga fia paia poo se molimau faataunuu. E mafai ona avea lou olaga o se molimau ua na ona teuteu ai se mea faatino, se molimau ua faigata ona taofiofia; ae o le tatalo ua faatusa lea i se faatupu faalavelave e faatoilaloina satani, faaumatia ana galuega ma tulia ese o ia mai loto ua manatu o ia ua ia pule ai.” (Phillip Samaan: Christ’s Way to Spiritual Growth; pg 212)

#### FESILI E FAATALATALANOAINA

1. E faapeafea ona aafia lo tatou olaga tatalo i le papatisoga a le Agaga Paia?

2. O le a se tasi o se faafitauli a le kerisiano faa-Laotekaia i le faia lea o le galuega a le Atua?
3. O ai tonu lava na faatinoina galuega a Iesu? Ioane 14:10
4. O le a le mea na faia e Iesu ina ia maua e ia le papatisoga a le Agaga Paia? Luka 3:21-22
5. O a ni mea na tutupu sa tatalo ai Iesu i mau nei?
  - Luka 5:16
  - Luka 6:12
  - Luka 9:29
6. Aisea na matuai tele ai le taimi o Iesu na faaalu i talosaga?
7. O a ni mea se lua na faatauaina e le Agaga Paia ina ia taitaiina ai le au Aposetolo? Galuega 6:4
8. Na faafia ona tatalo Tavita? Salamo 55:17
9. O le a se mea e ta'u mai i le mau lenei e uiga i le olaga tatalo a Tanielu? Tanielu 6:10
10. O a taimi atofaina e tatalo ai mai le Tusi Paia? Galuega 3:1; 10:9
11. O a ni mea se fa (4) na masani lava ona faia e le au uluai kerisiano? Galuega 2:42
12. O Paulo ea o se tagata tatalo? 1 Tesalonia 3:10
13. Na faamanuiaina ea galuega o le faasalalau o le tala lelei e le au uluai kerisiano? Kolose 1:23
14. O le a se fautuaga a Paulo mo i tatou? 1 Tesalonia 5:17
15. O le a se tala mai a Elena Uaita e uiga i le tatalo e le aumoa?
16. O le a se fetalaiga a Iesu e uiga i le faasitepu muamua lava pe afai e fia avea se tasi e pei o Ia? Mataio 5:3-11
17. E faapefea la ona tupu lenei mea?
18. O fea le taimi e amata ai ona tatou manumalo ia Satani?
19. O fea tonu le vaega o o tatou olaga e aafia i o tatou olaga tatalo?
20. Fai mai e a le Tusi Paia i le mea e tupu i le tiapolo pe a tuuina atu i tatou i le Atua, mafuta atu ia te Ia e ala i talosaga, ma tetee ia Satani i le Suafa o Iesu? Iakopo 4:7-8
21. O le a sou manatu? E fefe ea satani pe a e tatalo? Aisea?
22. E te manatu ea pe mafai e le tiapolo ona faalavelave ia te oe ina ia aua ai ona iai sou olaga tatalo? Aisea?
23. Se'i lisi mai ni suiga i lou olaga tatalo ua e filifilia e faatino?

#### FAATAUAINA I TALOSAGA

- Ole atu i le Atua ina ia:
  - Papatisoina oe e le lona Agaga
  - Taitaiina oe ina ia e tatalo i le Agaga i aso fai fai pea
  - Faamanuia i latou o i lau lisi tatalo

# FAAOPOOPO MUAMUA

## O SE MEA NA TUPU I SE TASI O EKALEZIA

Talu lava le sailia o le papatisoga a le Agaga Paia i le tausaga e 1999, ua taitaia e le Alii lana fanau i faamanuiaga ma ni mea tetele na tutupu i le ekalesia. Ou te fia faasoa atu mea nei na tutupu i ni ekalesia sa ou galue ai, faapea nisi o ni koneferenisi ma ekalesia eseese lava i nisi o vaega o le lalolagi. O le mea la lenei na tupu ina ua matou sailia le Alii e ala i talosaga ma faafouga a'o tapena se sauniga faatala'i i le nofoaga o New Haven, Connecticut, i Amerika. E le galo le mea na tupu, ma e tatalo pea i le Atua na te taitaiina pea i tatou i se mafutaga loloto ma faatasi ai ma Ia a'o tatou galulue e faasoa atu Lona finagalo i le lalolagi.

Ina ia iai lenei faamoemoe i fuafuaga o le tausaga a le ekalesia i New Haven, na matou fuafua ai ni polokalama se lua; o le tasi o nei polokalama o le 10 Aso mo talosaga ma anapogi. O le tasi polokalama o ni aso ia e 6 mo ni sauniga o faafouga. Na amata faatasi nei polokalama i se po o le Aso Sa. O sauniga o faafouga na fuafua e faauma i le po o le aso Faraile, ae o le polokalama o le anapogi e uma i se aso Lua, le aso lona sefulu o talotaloga ma anapogi. O le mea la lea, o talotaloga ma anapogi, e 4 aso e faaaau ai talu ona maea polokalama o faafouga.

### 10-ASO O TALOSAGA MA ANAPOGI

O se manatu lava o le 10-Aso o Talosaga ma Anapogi o le mulimuli lea i polokalama o loo faamatala mai i le tusi o Galuega 1, le taimi lea na tatalo ai le au so'o mo le afio ifo o le Agaga Paia i le aso Penetikoso, e pei ona faatonuina ai i latou. O le manatu ina ia aveeseina mea faalavelave mai e masani ai, e pei o tv, leitio, o tusi ma nusipepa o le lalolagi, faaaogaina o computer ma le internet, poo taaloga foi, ma le tele lava o mea e faia ua faaomia ese ai ni taimi mo le Atua. I le taimi o le polokalama o le 10-Aso, na faamalosi ai lava le ekalesia ina ia tatalo mo le papatisoga a le Agaga Paia (Efeso 5:18), faapea ma le faafouga mo o latou lava olaga taitoatasi (2

Nofoaiga Tupu 7:14, Salamo 85:6), faapea le ekalesia. Na fautuaina foi ina ia ole atu o le Atua mo le liligiina mai o le agaga Paia i le Ekalesia (Sakaria 10:1) faapea foi ma sauniga o le a feagai ai.

Na amataina faatasi lava sauniga o le faafouga i le po lava e tasi lea na amataina ai polokalama o talosaga ma le anapogi. O le autu mua lava i ia polokalama fai faatasi e faapea: Saili le papatisoga a le Agaga Paia, ia faafouina, faapea le liligi ifo o le Agaga Paia. Ou te le'i faia lava ni polokalama faapenei muamua ma ou te le'i mautinoa foi pe o a tonu ni feu e avatu i le faalapopotoga, ae pe o le a foi le mea o le a tupu pe a maea nei polokalama.

## O NI MEA NA MAUA MAI AI

O le taumafaiga ina ia saili le Atua mo lona faafouina o loto ua galala mo le Agaga Paia na maoae lava ma manuia tulaga na faaalua i le faaiuga o nei polokalama; e le gata i faamanuiaga na ou molimauina ia te a'u lava ia o le faifeau, ae faapea foi i latou uma na au ai. Na matuai loloto lava le lagona faafouina i le maea ai o aso muamua o faafouga; e faigata ona faamatalaina ia lagona i se gagana. E faigata ona malamalama vagana ai lava pe a iai le tagata lava ia. O le faatasi mai o le Atua ma faamanuiaga e foliga e tupu tele mai lea aso i le isi aso. O le galueaina e le Agaga Paia o olaga taitoatasi, o le fiafiaga i le mafutaga na matuai maoae le matagofie. Fai mai se tasi o tina na auai, "e matagofie le toe maua o le uluai alofa mo Iesu." Mai lea po i lea po, na faalogoina le faagaetia o agaga ma loto o i latou na iai, ona o le faafouina o lo latou mafutaga ma le Atua.

Sa taitaiina e le Atua le faasologa o le polokalama sa feagai ai aua e le'i iai lava so'u mautinoaga i le auala ma le faasologa e fai a'i ia polokalama ma sauniga. Na matou feagai ai ma pesepesega ma viiga masani ai faapea pese mai tusi pese tuai. O i latou na iai na faatasi i vaega o talosaga se lua. Na fautuaina latou na au ai ina ia tatalo ma le loto gatasi (Galuega 1:14) ae le o le tatalo mo soo se mea lava e alu a'e i le loto; ae ia tatalo mo: (1) faafouga, (2) le papatisoga taitoatasi lava mai le Agaga Paia, (3) le liligi ifo o le Agaga o le Atua, faapea ai ma le (4) olega faapitoa lava ou te avatua mai le Afioga a le Atua i lena lava po. O le tuufatasia o loto mo talosaga e pei ona faia i lea po ma lea po na avea o se faamanuiaga tele lava. E iai lo'u talitonuga e tele le aoga o lenei auala na matou faia i le faamanuiaga na matou maua. Na matou matua malamalama tele i le mea na fetalai mai ai Keriso e faapea: "...afai e loto gatasi se toalua o outou o i le lalolagi i

se mea la te ole atu ai, e faia lea mo i laua e lo'u Tama o i le lagi.”  
(Mataio 18:19).

Na taitaiina e le Atua le faasologa o mataupu e faaaoga i lea po ma lea po. O la'u masani o le taapena mamao atu lava mataupu e faaaogaina i polokalama e faia. Ou te muai sauni ma lisi faapitoa lava mataupu ma lauga ou te faaaogaina i sauniga faapenei. Ae le'i tuumaia e le Atua se tulaga faapena i nei polokalama ua feagai ai. Na foliga foi ua ou le mafai ona sauni ma fuafua mamao mataupu e faaaogaina i nei sauniga. I le maea ai o faatasiga i lea po ma lea po, a'o o'u toatuli ma tatalo pe o se a se finagalo o le Atua i se mataupu e avatu i le po e sosoo ai, na faamaninoina mai lava ia mea i lo'u mafaufau e le Agaga. Ae le'i amataina le sauniga o le po e sosoo ai, ua maea le mataupu o lea lava po. Na tupu lenei mea i po uma vagana ai le po o le aso Faraile ma le po o le aso Toonai; ma o se fiafiaga foi lenei ona sa ou iloa e pisi tele le aso Sapati, ma e laititi taimi e sauni ai mo le sauniga o le po o le aso Toonai.

## FAATULAGAINA O MATAUPU

O le faasologa nei o mataupu na faasino mai e le Atua ia suesueina:

1. *Lapataiga faa-Laotekaia* —na lauiloa Laotekaia i latou togafitiga e faaaogaina ai le vai, e faaaogaina ai le vai malulu fapea vai mafanafana. O le ekalesia Laotekaia e le vevela pe maalili foi. O le mea lea e le aoga ai o ia i le Atua ona o lona tulaga faaleogo-lua, e le vevela pe maalili. O lea ua manaomia ai tele lava se faafouga; o manaoga mo olega i po taitasi e faapea: (1) o le papatisoga a le Agaga Paia, (2) faafouga, ma le (3) liligi ifo o le Agaga Paia. E le i toe iai lava nisi mea na ole atu ai i le po muamua.
2. *O la matou vaega i le sailia o le faafouga* (2 Nofoaiga Tupu 7:14)—Olega ma le tuu atoatoa atu o loto i le Atua o ni mea e manaomia lava pe afai e tupu le faafouga moni. O le isi manaoga i talosaga o le ole atu lea i le Atua ina ia fesoasoani ia aumaia le malosiaga e mafai ai ona tuu atu atoa le 100 pasene mo Ia.
3. *I le faafouga, o le ola fou ua na'o Iesu lava e maua mai ai* - o le faafouga e le o le sueina lea o se lagona poo se faagaetia o se manatu e tupu ae i se taimi vave lava. O le faafouga foi, o le sailia lea o Iesu ma faaavanoa le loto ina ia ulufale o Ia iai na te pulea atoatoa lou olaga (Faaaliga 3:20). O talosaga faaopoopo o le ole atu lea i le Atua ina ia aveese ni mea o loo poloka ai le faitotoa ma mea o loo avea ma puniala e le ulufale mai ai Iesu i o tatou loto.
4. *I faafouga, ua tatou fesuiaia o tatou olaga ma le ola o Iesu i totonu o i tatou*—Ia avea i tatou e pei o Iesu. O talosaga faaopoopo o le ole atu lea ina ia avea o tatou ola mo Iesu, ina ia ola ai Iesu i totonu o tatou loto.

5. *O le naunau mo agaga ua leiloa*—Na matou vaai i le faanaunauga na ia Iesu ma le uluai ekalesia kerisiano mo i latou uma ua leiloa. O le tatalo faapitoa na faapoopo o talosaga ia mo le Atua ina ia aumaia le faanaunauga lea mo agaga sa ia Iesu foi.
6. *O le faaolataga ua ofo mai e Iesu*—Na matou suesueina pe na faapefea ona manumalo Iesu i agasala uma lava na faafeagai ma Ia. O talosaga faapitoa na sailia ai le atoaga o le laveaina a le Atua mo lana fanau.
7. *Savavali i le Agaga*—O le iloa ona savavali faatasi ma le Agaga Paia, o se mea taua ma e manaomia e tagata uma i o latou olaga. Na faatalatalanoaina pe faapefea ona savavali pea ma le Agaga i aso fai soo. O le tatalo faapoopo ma faapitoa o le ole atu lea i le Atua ina tuu i lalo le olaga agasala ma manaoga le aoga i tagata uma ae ia faamaualugaina le naunau ia talafeagai ma le finagalo o le Alii.
8. *O le malosiaga ma le pule ua ia Iesu*—O le mea tatau lava ona iloa le malosiaga ma le pule lea e ia Iesu. Na talanoaina le taua o le iloa o le malosiaga faapea ma le pule mai ia Iesu ina ia manumalo ai le tagata talitonu i le tiapolo ma ana faaosoosoga. O tatalo faapitoa na faapoopo o le ole atu lea i le Atua ina ia aumaia le malamalamaaga o le malosiaga ma le pule lea e maua mai ia Iesu ina ia teena ai satani ma ana mailei i taimi uma e fetaiia'i ai ma ia.
9. *O fua o le Agaga*—Na matou talanoaina pe o a fua o le Agaga ma pe faapefea foi ona faaali atu fua o le Agaga i o tatou olaga pe a soifua o Ia i totonu o i tatou. O talosaga faapitoa na ole atu ai i le Atua ina ia faaali mai fua o le Agaga i olaga i taimi uma.
10. *O meaalofa a le Agaga*—Na matou suesueina meaalofa a le Agaga i le po mulimuli o a matou sauniga o faafouga. O le faamoemoe o talosaga faapitoa lava o le ole atu lea i le Atua ina ia faasino ma ia faaali mai meaalofa a le Agaga ua Ia filifilia mo i tatou, ma ia aumaia le loto tele e auauna atu ai i meaalofa nei.

E tasi le lesona na faaali mai ia te a'u e le Alii, o le faataua lea o le saili loloto mo Lana taitaiga o le polokalama atoa e pei ona fuafuaina, e aofia ai faasologa o mataupu faapea mataupu o lea po ma lea po. Na faaalua mai foi le faatauaaina o talosaga taitoatasi ia faapea ai ma le tatalo faatasi o le au faatuatua ina ia lagona ai le loloto o le mafutaga vavalalata ma Ia.

## O SE MEA NA TUPU E LE I FAAMOEMOEINA

O nisi nei o mea na tutupu ma molimauina ou te le'i manatu lava e oo iai ni tulaga e pei ona vaaia. Muamua, na matou lagonaina le ese o le faatasi mai a le Agaga ia te i matou i po uma lava ao feagai ai matou ma le polokalama. Lua, na tele le suiga na oo i loto o i latou uma na au faatasi ai, e ala lea i le galue malie a le Agaga Paia i tagata uma.

O le faamoemoe ina ia faataunuu sauniga o le faafouga i le aso Sa, aso Gafua, aso Lua, aso Lulu, aso Tofi, faapea le aso Faraile. Ae ina ua matou

taunuu i le aso Faraile, na amata ona fesilisili latou na au ai pe le tatau ona faaauau pea le polokalama o le faafouga seia uma foi ma le 10-Aso o talosaga ma anapogi. Ua iloa le galueaina ma le faatasi mai o le Agaga o le Atua i o latou olaga i se auala faapitoa ma sa le manana'o e faauma i le aso Faraile e pei ona fuafuaina. O lea la na filifili ai loa e faaauau seia oo i le aso Lulu o le vaiaso e sosoo ai, e tasi le aso e tea ai ma le 10-Aso atofaina o le polokalama o talosaga ma anapogi. O se tasi foi lenei o mea e le'i tupu muamua lava ia te a'u, o le talosaga mai lea o nisi o se ekalesia ina ia faaopoopo ni faatasiga faapenei.

O faamanuiaga a le Atua na maoae lava i lenei polokalama, ma na tonu ai loa o le a faaopoopo foi se sauniga o molimau i sauniga o le Sapati na sosoo ai. Toatele i latou na faasoia mai o latou lagona i mea tetele ua latou iloina ai le mafuta mai o le Atua i o latou lava olaga. Na valaaulia le ekalesia atoa e au ai i se sauniga faapitoa i lena lava po. E masani i matou sauniga o le faafouga pe to'a sefulu i latou na au mai ai. Ou te le'i iloa pe o le a le mea o le a tupu i le po lea o le Sapati i le fuafuaga e faia lea sauniga faaopoopo aua ua loa foi sauniga o lea Sapati; o nisi foi na o atu e asiasi ma molimau atu i tuaoi i le aoauli o lea aso. Mo le toatele, ua alu le taeao faapea le aoauli i le falesa. Ae ui i lea, e to'a 60 i latou na au ai i le sauniga na toe faia i lea lava po. O lea na ou mautinoaina ai lava o le malosiaga o le Atua e aumaia ai ni tagata Aso Fitu i se sauniga tatalo i se po e le masani ai, e tusa ai foi pe na tele naunau sauniga na feagai ai i lea aso Sapati. Pau le mea na ta'u mai ai foi ia te a'u i le mea na ou vaia o le faanaunauga taua ma le loloto ua uunaina ai e le Agaga loto o tagata ekalesia, ma ua manaomia ai foi e tali atu i manaoga ua tula'i mai i le au faatuatua.

Na faaauau polokalama o talosaga ma anapogi seia oo i le aso Lua ae faaauau sauniga o le faafouga i le aso Lulu. E le i gata faamanuiaga a le Atua. O po uma lava na faaopoopoina le loloto ma le lautele o le faatasi mai o le Atua i agaga o i latou na au ai, e viia ai le Alii.

O le po mulimuli lava o nei sauniga o le faafouga, lea ua 11 nei aso e fai ona uma ai i le po o le aso Lulu, na ou masalosalo pe ailoga lava a toe toatele nisi e au ai ona o lea ua 11 nei po sosoo o fai lava matou sauniga. Ae ou te le mafai ona faamatalaina le mea na tupu, ona e sili atu foi i latou na faatasi mai i lea po nai po uma lava e sefulu muamua. O le lagona o le faatasi mai o le Agaga o le Atua faapea ma le olioli na ou lagonaina e le mafai ona faamatalaina. O lea na matou filifili ai loa e faaauau pea matou sauniga o le faafouga i po o aso Lulu uma lava ina ua maea polokalama fuafuaina.

O sina tala: Sa iai se alii mai Aferika na auai i matou polokalama o faafouga faapea talosaga ma anapogi. O lea alii e mai le faatuatuga Moaselemi. Na auai lava lenei alii mo ni vaiaso ma susesueina ai foi le Tusi Paia. I le po lona 9 o sauniga na mulimuli ane, na molimau ai loa lea alii o le a ia talia Iesu Keriso e avea ma ona faaola. O se fiafiaga i o matou loto na alu a'e ina ua matou maua lenei molimau ola i le malosi o le mana o le Agaga Paia pe a tatou tuu atu atoatoa o tatou faamoemoe ia te Ia. Tatou tatalo pe

mo i latou o loo feagai ai pea ma lu'itau ma faafitauli o le olaga ae o loo latou suesue pe o le a se finagalo o le Atua mo i latou.

## O LE LUMANA'I

Ou te le'i iloa pe o le a le finagalo o le Atua mo vaiaso ma masina o i luma. Ae tasi le mea ou te iloa, ou te le faagaloina lava le mea na tutupu i New Haven sa faia e le Atua, i le auala na faaali mai ai o Ia i ia taimi faapitoa. Na ou fesili ifo lava a'u: "Mata e toe leiloa atu lagona o le mea na tupu?" E faamoemoe lava le tali ia te i tatou. A tatou faaauau pea le saili o le Atua ma le loto atoa, ma faaavanoa taimi e mafuta atu ai ia te Ia e ala i talosaga ma le suesueina o lana Afioga, o le Tusi Paia lea, ailoga lava e te'a ese lea lagona matagofie. E mafai lava ona tupu lea lagona i totonu o aiga faapea totonu o le ekalesia.

## O LESONA NA MAUA MAI I MEA NA TUTUPU

Ou te mautinoa lava o le papatisoga a le Agaga Paia i o tatou olaga taitoatasi o se mea tatau ona maua pea ina ia faamalosia ma faamautuina lo tatou mafutaga vavalalata ma le faaanauga sili, o le maua lea o le faatasi ma le Atua i taimi uma. O le sailia o le faatumulia e le Agaga sa avea lea ma manaoga faapitoa a o matou feagai ai ma le matou polokalama i le 11 o aso. E maualuga foi i le tamaitai o Elena Uaita lea tulaga mo le au faatuatua, ina ia mauaina le papatisoga a le Agaga Paia i aso uma. Na faafofoga le Atua i la matou faatoga i aso ia e 11, ma o lana tali mai na sili atu lo mea na matou faamoemoe iai. Ae sa le tatau foi ona faateia ai i matou i lea tulaga.

E mautinoa e faula'i ma le tele naua ana faamanuiaga. Na iloa e Paulo le mea lenei ina ua ia tusi mai e faapea: "Ia ia te ia o le na te mafaia ona faia o mea uma e faasilisili lava i mea tatou te ole atu ai ma mafaufau i ai, e tusa ma le mana o loo matua galue i totonu ia te i tatou." (Efeso 3:20).

E iai le fofu mo le tulaga o le Kerisiano i aso o le iuga, le tulaga faa-Laotekaia. O le fofu lena o le "faafouga"; lea na fai mai ai le tamaitai perofeta o Elena Uaita e faapea:

"O le faafouga faale-Atua o manaoga aupito i sili lea mo i tatou i le taimi nei. O le sailiga o lea mea o le uluai galuega lea e matuai taua iai le faamuamua." (*Selected Messages*, Vol. 1, p.121)

Na malamalama lelei lava foi le tamaitai i le taua tele o le fesootai o le papatisoga a le Agaga Paia ma le faafouga:

"O le papatisoga a le Agaga Paia e pei ona tupu i le aso Penetikoso e taunuu lea i le faafouga o le ekalesia fou faapea ai ma le mafaia o galuega matagofie." *Selected Messages*, Vol. 2, p. 57

O se tasi o lesona taua lava ua ou mauaina talu mai sauniga ia na faia o le faaauau pea lea o le mafutaga faatasi a le au faatuatua ua faatumulia i le Agaga Paia. Afai tatou te mananao ina ia faaolaola ma mu pea le afi i lotu o le au



kerisiano faapea le ekalesia, e manaomia tele le faaauau o le mafutaga. O le mafutaga o kerisiano faamaoni e avea lea ma auala e atia'e atili ai meaalofo a le Agaga ma e faaailia foi ia tulaga i auala faapitoa e tuputupu ai pea le olaga faaleagaga a tagata taitoatasi o loo iai i lea mafutaga. O mafutaga foi nei e aoga tele ma e tatau foi ona faaaogaina e tosina mai ai nisi ia Keriso.

# O SE FAAMATALAGA E UIGA I LE ALII O COLIN HONE



O Colin Hone, o se alii na te faasalalauina ma gafa ia ma le aoaoina tagata e uiga i le polokalam o le 10-Aso o Talosaga ma Anapogi. O ia o le faatonu o le Holy Spirit Ministries. I le 29 o ona tausaga, a’o savalivali o ia i se tasi aso i le matafaga i Bondi Beach, Ausetalia, na tuu atu ia te ia e se talavou kerisiano se tusi o le “Tanielu ma le Faaaliga” (Daniel and Revelation). Ina ua uma ona faitau o ia i lea tusi, na tonu ai i lona manatu e iai se Atua na te pulea mea uma mai le amataga e oo i le iuga. Na suesue pea ma e ina ua uma ona faitauina foi tusi o le “Finauga Tele” (Great

Controversy) faapea le “Faanaunauga mo Tupulaga” (Desire of Ages), ma faaaau le suesueina o le Tusi Paia, na papatisoina o ia ina ua te’a le 6 masina talu le aso na tuu atuina ai ia te ia le tusi muamua lava. O Colin e fai aiga ma e to’a 5 ona alo, ma e iai lana pisinisi mo fuafuaga o itu tau tupe i mea faapisinisi i le Central Coast i Ausetalia lava.

Ina ua maea ona au atu i se polokalama o le faafouga i le tausaga e 2009 na taitaia lava e le alii faifeau o Pr. Dennis Smith (le na tusia le polokalama o le 10-Aso) ma faitau foi i isi tusi a le alii faifeau e faatatau lava i le papatisoga a le Agaga Paia, faapea le amiotonu e ala i le faatuatua, ae maise ai foi le lagona na iai o le alofa o le Atua, na faatoaga loa e le alii o Colin ona saili ma tatalo mo le papatisoga a le Agaga Paia i aso uma. Na maoae le faatupu teleina o le olaga faaleagaga a le alii o Colin. Na tupu tele lona

naunau e suesue le afioga a le Atua ma tatalo mo isi. Na faatupulaia foi i lona loto lona naunau ia molimau atu i isi le alofa o Iesu ma lana fuafuaga ia laveai uma i tatou mai le agasala ma le oti e faavauvau.

Na taitaia e le Atua le alii o Colin e lauga atu aoaoga ua ia maua. O lea la o loo galue nei le alii o Colin o se failauga faapitoa e le gata i Ausetalia ae i atunuu eseese lava mo le polokalama a le Holy Spirit Ministries faatasi ai ma Pastor Dennis Smith talu mai lava le tausaga e 2009. Ua taitaia e le alii failauga o Colin ni polokalama o faafouga i ekalesia i atunuu e pei o Ausetalia, Borneo Malaysia, Thailand, Indonesia, USA, Philippines, Ethiopia and Zambia. I Filipaina, e 319 latou na papatisoina i le maea ai o se sauniga na faia ai. I Ethiopia e 3000 tagata na au ai i po taitasi ma e faitau selau ma selau i latou na papatisoina, a o le toatele na toe faafouina la latou mafutaga ma le Atua ma tatalo pea mo le papatisoga a le Agaga Paia. Ua molimauina e le alii o Colin le taitaiga a le Atua i le afe ma afe o tagata ua faatauina le saili mo le papatisoga a le Agaga Paia ma le mafutaga loloto mai a Iesu i o latou olaga, ma ua fai foi lea ma ala e maua ai le manumalo i faafitauli ma tofotofoga a le tiapolo i olaga taitoatasi, ae faasilia ai le iloa o le alofa silisili mai le Atua.

O le faanaunaga lava a le failauga o Colin o le faamalositia lea o tagata talitonu i le Atua faapea ekalesia i soo se mea lava o le lalolagi ina ia faaaogaina lena polokalama o le 10\_Aso o Talosaga ma Anapogi faapea foi le polokalama o le 40-Aso o Talosaga ma Anapogi, lea na tusia e le alii faifeau o Dennis Smith, ina ia avea ma auala e atiae ai olaga faaleagaga o tagata faatalitali uma, faapea ekalesia. A o auai i latou taitoasi ma ekalesia i nei polokalama o le 10-Aso ma le 40-Aso o talosaga faapea le saili o le papatisoga a le Agaga Paia i aso taitasi, ia avea lea ma auala e maua ai le faafouga ma le toe fuataiina o loto o le au faatuatua. O le a avea lea ma auala e suia ai e le gata o latou lava olaga, ae taitaiina ai foi i latou ina ia tatalo mo isi ina ia latou iloa Iesu ma sauni atu ai mo lona toe Afio mai.